

Jonr

dwandfamo gutnius mrokfot

Barkof kfo nuhas mrokfom

Nda Jonr wandfayuk Gutnius mrokfom, Jonr kfo memor, “Jisasr Bro Nkifrarhu toh nkifraniyuk Mrokfoyer, nd Mrokfor tfit yima yonr kanjo yak dborhanehato yimanompno nia mitohmor.” Nda Gutnius mrokfot htayuk yima Jonr duka memor, “Yimam nda gutnius mrokfomn Jisasrhu tndh mrokfom hti duka tungunaruhamn, Jisasr hti mirahm tu Bro Nkifrar kfo htamo Yoner. Bro Nkifrar rorn kfomor yimaroh minrfa htiyakneft. Nd dukefrpar yimam yakitohruhamn toh nkifrarahm.” Jonr nd dukefetrn rorhu gonborngt wandfamort (kfo nuhas mrokfot htikfot 20.31).

Barkof mrokfom Jonr htaknimom, kfo memornom, “Bingot Mrokfor Bro Nkifrarpo afo wutohmour.” Ndt kfonimortn tfit Jisasr hingrnamao mirakerroh mrokfom kfo nuhasmornom. Jonr duka memor, “Nd Jisasr hingrnayuk mirakerroh mrokfom yimam tndh nuhasrhotanm rom htiruhamn rroh yima yuhum duka mirahm, ‘Jisasr tor tu Bro Nkifrar kfo htamo Yonr nmoh minrfa htiyakyukr.’ ” Yo nd mirakerroh mna yuham ndm Jonr kfo hik nuhas bugamornom. Jisasr mirakerm inji hingrnamotr womm Jisasrn rroh yima yuhum htahato hikwomr, womm nhai.

Sapta 13-17 Jonr kfo tndhmr wuroh yifungr Jisasr turhu disaipermmpno wuroh mrokfom hi hasetrn yahr kmim yaknihato kot htanihato bgre mis htamo yuhat. Tu wuroh mrokfomne Jisasr sinyanihato disaiperm htimo yuhathu mrokfom htamor.

Nda Jonr wandfayuk gonborngt, htirahn bok tkitm Jonr Kristenroh tohyuk toheft tfit yimam yihof href toh hasiwa toheftpno rim kfo nhombrakmourm. Ndnnett htirahn buparoh mrokfot, bretparoh mrokfom, nukefthu mrokfot, wain tofthu mrokfot, sifsifroh tohukatohru mrokfot, nd ndm yakhato kfo nhombramourm Kristenroh tohyuk tohefm.

Mrokfor yimar kanjo niahato yimampno mitohmo yuhat (*Sapta 1*)

Mrokfor yimar kanjo niamo yuhat

1 ¹Mrokfor bingot bi rhu gungonmor. Mrokfor bi ruhetrn ee kto nda mounti bbinysoft trhamof. Mrokfor bi Bro Nkifrapno rhumorn, to nd Mrokfor Bro Nkifrar kanjo rhumor. ²Bingot Mrokfor to bi Bro Nkifrapno rirhungotakmor. ³Mrokfor kfomor, nd tamoh tamohr Bro Nkifrar hingrnamorr. Mrokfor akfo duha yir, nhai wom tamohr Bro Nkifrar hingrnamorr. Nhai. Mrokfor bi ruhetrn nd Mrokfor kfomor tamoh tamohr Bro Nkifrar hingrnamorr. ⁴Mrokfor yimaroh ruhefr tohefr kakitoworr. Yakitohhato nukeftpno yimaroh wiyauyau nmbuhak kak hta bohtewurm. ⁵Nd nukeft yifung tahasiwut, to nhai tfit yifungpamn yakaknihato nd nukeft yifungpamn yak tasifkfot.

⁶To tor wom yimar niamor, rorhu yufat Jonr. Bro Nkifrar kfomotr niamor. ⁷Ror be nukeft hatohyuk yimarhu mrokfothu kfo nuhasneft niamor. Niahato tuhan yindarim kfo nuhasmotrm be nd mrokfot yakhato hikmomt. ⁸To mirahko ka Jonrn nd nukeft hatohyuk yimayer. Nhai. Jonr to be nd nukeft hatohyuk yimarhu mrokfothu kfo ptha nuhasneft niamor. ⁹Tu yima bugaroh hayuk nukef mift hatohyuk yimar bi niamor ndar bbinysoft.

¹⁰Nd yimar to bi ndar bbinysoft tohmor. Bingot ror kfomotr ndar bbinysofti mount trhamof. To nda bbinysoft tohwa met yindarim nhai hti nhtarmomr. ¹¹Turhu kantri mifko yimor. To nd turhu kantriko tohwa kmi Judam nhai kfakrmomr. ¹²Wom womrpamn hti nhtahato kfakmomr. Kfakhato rroh yima yuhum rorn htamom. Ndnettn romn yakhato htamorm Bro Nkifrarhu yonm. ¹³Nhai be yifamaroh kkupam yak nhombrewa yuhatn Bro Nkifrar nd yuhatn yifemrorm. Nhai. Rroh yima yuhum Kraistrn htamomm. Bro Nkifrar ndt htihato to be rorn yifemrorm.

¹⁴Nd Mrokfor tfit yima yonr kanjo yak dborhanehato nia mitohmor nmoh buha. Bi htimonomt rorhu bro yufati rorhu bbukeft. Nd Yonrpar Bro Yifemrhu yoner. Bro Nkifrarhu tu yuhuwafeti yafothet nef mift tu bro mifwotr. ¹⁵Jonr rorhu nia mrokfot kfo pthahato kfo nakuyaf memor, “To nda yimarn na kfo hna memoya, “Tor nanhu mongko nierahr wom yimar, ror bi Bro Nkifrapno rpat ritohngotakmor. Ndnettn rorn buriwura.’”

¹⁶Nd yimar, yima yuhuwafeftn tu bromotr. Nd rorhu yima yuhuwafeftn, yima yimanom yihof href kak marnya hasiwurnom. ¹⁷Rot boririfhut Bro Nkifrar hemornom Mosesrhu tirtn. To tfit Jisas Kraistrpno, htitnom Bro Nkifrarhu tu yuhuwafeti tu yafothet nef mift. ¹⁸Nhai nom nda bbinysofthu yimanom Bro Nkifrar bi hti nkrirmonomr, be tu nhai

mif. Nd tu Bro Nkifrarhu Yonr, ror tu Bro Nkifarn, tu Yifemrpn toh tany niern, rorpn Bro Nkifrarhu ruheft htimonomt.

Jon Baftaisr pthamo mrokfom
(*Matyu 3.1-12; Mak 1.7-8; Luk 3.15-17*)

¹⁹Judaro bro yima boyimat kfo tkrurafmomm prismi yo Lifaim. Taun Jerusalem htanyhato yimomn Jonr kfo ttiwon memomr, “Nine frohe?” ²⁰Be Jonr nhai marimor finji kforuhar. Toh bugamotm kfohe memorm, “Na mirahko na ka nd rom kfiwa Kraisa.”^a ²¹Tfit ttiwon hasuknakni memomr, “To nine frohe? Ka Irajaye?” Tfit Jonr kfo memorm, “Nhai.” “E, frohe, ka nd Mosesr kfomo profetr nom gari hasiwar, ka nd profete?” Tfit ror kfo memor, “Nhai.” ²²Tfit wompam kfo memomr, “Ni to frohe? Nom kangnom ni wakfo nuhas marnyafkahtnnom, nom awany marnya tanykahnomn, ee bt yiruhanomn, nom kfo tkrurafyuk bro yimam kfo marnya bomarnyarahnomm.” ²³Inji kfomotm profet Aisaiar kfomo mrokfot yakhato kfo ptha hik memorm, “Na nd nungur tik furat kfo nakuta yimaya: ‘Bro Nungothetrhu niayuk yihotat bi wayak marnya bomarnya hasohekomr.’ ”

²⁴Farisimn nd yimam kfo tkrurmotmm niamomn, ²⁵Jonr kfo ttiwon memomr, “To ni Kraiss rhu duha yi shoft, o Irajian rhu duha yi shoft, o nd profetr rhu duha yi shoft, to tamohmpno yimam baftaiswanm?” ²⁶Jonr tfit rroh mrokfot kfo wok memorm, “Na be bupa fura baftaisimwanm yimam, to tor wom yimar tor nikompno tohor. Niko nhai tawisaf-kahkomr. ²⁷Nd yimar nanhu mongko niewur. Na, na be yima furaya rorhu senderfhu ki jbkafyuk mtinf kak nyusakahukanr.”^b ²⁸Jonr nd mrokfot pthamohat tek Joden mkukor yorhwa kmi Betanit nd mrokfot pthamort. Nd tkittn Jonr yimam baftaisimmourm.

Jisasr Bro Nkifrarhu sifsif yoner

²⁹Tfit hwe fnah ndwom marrn Jonr htihakmorr Jisasr. Htiyakhato kfo memor, “Wahtiko. Ndr Bro Nkifrarhu sifsif yoner. Rorn bbinysoft tohwa tuhan yindari bugaroh fasoh fasoh nefm yak thuhirahrm. ³⁰To nda yimarn na kfo hna memoya, ‘Tor nanhu mongko nierahr wom yimar, ror bi Bro Nkifrarpn rpat ritohngotakmor. Ndnnetn rorn buriwura.’ ³¹Na nhai tawisafmoyanr. Na tamohr kfo marimora, tor nd yimarn Kraiser? Nhai. Na, na be yimaroh tekthu baftaisimhato Isrermpno nd yimarhu myak nriyafyuka. Nd nayukann niamoya.”

^a **1.20** Nd Kraiss yufat, Grik mrokfothu yimbu yuhat inji kfiwut, “Bro Nkifrar yak htamo yima nrfa hbhakyuk yimar.” ^b **1.27** Wom yimar hatohyuk senderroh ki jbkafyuk mtinf yak nyusak thumohat, tu yufapa duha yima furapamn womr hatohyuk senderm kak thumoumm.

³²Tfit Jonr kfo ptha memor, “Na nd yimarhu baftaisimneftpno htimoyant Bro Nkifrarhu Yafothat yura hefenr wutoh tanyhato ganyom mmkrs kanjo yak nhombranhato fawihnamot. Be nd ganyom mmkrs yawihnehato be yimarn mifakmort. ³³Na to tamohr kfo marimora, tor nd yimarn Kraiser? Nhai. Na tuhan yindariroh baftaisim-nefthu kfo tkrurafyuk yimarn bi kfo memora, ‘Yimam baftaisim hanyhato wahti hanyswa fitoh yimar htin Bro Nkifrarhu Yafothat yawihnehato mithu nawohwotr, tor nd yimarn Bro Nkifrarhu Yafothaye tfit baftaisimrahm tuhan yindarim.’ ³⁴Na tukianhu nyingaye htimoyanrn kfiwanko, nd yimar tu Bro Nkifrarhu Yoner.”

Jisasrhu barkof husfirpa disaiperm

³⁵Hwe nfha ndwom marrn Jonr tfit turhu uhik ahik htfasyuk hus yimafpno tek Jodent toh hasomom. ³⁶Jonr htiyaf hanymorr Jisasr fau hanymotr, nd turhu uhik ahik htfasyuk yimaf kfo memorf, “Htifnr. Bro Nkifrarhu sifsif yoner.” ³⁷Be nd yima husf inji wanyhato be Jisasr mfau hikakni twanhomof. ³⁸Jisasr kekutakhato htimorf yau hik hanymotr, kfo ttiwon memorf, “Nifne tamohmn hambro hnewafn?” Tfit rof ttiwon memorf, “Rabai, ni fitoh kunys tohwa?” Nd Rabai mrokfothu yimbu yuhat inji kfiwut, Tisa. ³⁹Be Jisasr kfo memorf, “Wania. Wahtifn.” Marr bi 4 kilok tohmo. Be rof yimofn nd ror tohmoa kunys htihato nd krifr be rorhu kunysn rhu krif bugamofr.

⁴⁰Nd Jisasr yau hikaknimo yima husf, to Andrur tor womr. Andrur, Saimon Pitarhu najomr. ⁴¹Andrur Jisasr htanyhato barkofpam afo turhu najom Saimonr yau hambra-khato kfo memorr, “Nd profetm kfomoa yima Mesaiar bi hitawo-nomr.” Nd Mesaia yufathu yimbu yuhat, Bro Nkifrar yak htiwa yima nrfa hbhakyuk yima Kraiser. ⁴²Be turhu najom Saimonr mkfakhato Jisasrpno hanymorr. Jisasr htiyakhato kfo memor, “Ni Jonrhu yinem Saimone. Kto yimam yutarahmn Sifas.” Grik yarmumatn nd Sifas yufat kutewumt Pita. To tfit nd Sifas yufat yo Pita yufat, nd yufafhu yimbu yuhat, tahis.

Jisasr Filif, Natanier yima husf nakuyakmo yuhat

⁴³Tfit ndwom marrn Jisasr memor Galiliko aiya, Filifir yihom htimorr. Yihom htihato kfo memorr, “Wania, wahikna.” ⁴⁴Filifir taun Betsaida thofr. Nd kmi Betsaidat Andru Pitarof tohmoa kmiyet. ⁴⁵Tfit Filifir yau hanyhato Natanierr mhtimorr. Mhtihato kfo memorr, “Bare, nom wanymoa tndh kfothu yimar, nd Mosesrhu boririfhu gonborngm kfo tndhmoar, yo nd profetroh gonborngm kfo tndhmoa yimar, tor bi htimonomr. Nd yimar, Nasaret thof Jisasr, Josefrhu yinembr.” ⁴⁶Tfit Natanierr sinyahato kfo ttiwon memorr, “Nasaret to te fi kmiyenet. To nhai ndtet te fi kmiyentn ndtet bro yufet yimar mfnahkfot.” Tfit wom Filifir kfo memorr, “To tu waniekahnn afo wahtitwa.”

⁴⁷Jisasr Natanierr htiyak hanyhato kfo memorr, “Asor tu Isrer thofen mifr. Ror nhai wom kfo nhehefen nmbuham rhukahmr.” ⁴⁸Natanierr inji wanyhato tfit Jisasr kfo ttiwon memorr, “Nane fitoh yiha htihato inji kfiwa?” Tfit Jisasr kfo memorr, “Ni afo tafi Filifr mnakuyak duha, na bi htitawoyann fik tihathu tpitn rhu hasetnn.” ⁴⁹Natanierr nd mrokfot wanyhato kfo memor, “Tisa, ni Bro Nkifrarhu Yone, Isrerroh Kinge.” ⁵⁰Jisasr kfo memorr, “Kfo yamukann ndu fik tihathu tpit rhu hasetnn bi htitawoyann. Ka ni ndt wanyhato ninhu dukefr sinyahato famuna, ni Bro Nkifrarhu Yone. Kfiwann, ndt rot be inji htitwont. Kto bro bro nefm yak nuhasrhotann htirahnm.” ⁵¹Tfit wom kfot Jisasr kfo memor, “Na kfo mifwanko, kto htirahkomt mount frtnehhato rim rhu mrhuruhatt mounmotm mano hefenko muh tfit Bro Najomanpno nia, yo tfit hefenko muh, tfit Bro Najomanpno nia inji naruhatm htirahkomm.”

Jisasrhu bro yufati mirakerkfo rihingrnakmo yuhathu mrokfot

(Sapta 2–4)

Taun Kanat wom yimar tuhan yakomo yuhat

2 ¹Filif Natanierrrof Jisasr yakmohat tfit wom hus marf rhunihato ee Galili profinsko yorhwa taun Kanatn wom yimar tuhan fakmor. Nd yima sawohf nayak tatrutmo yihart Jisasrhu mmemt rot yihato rhunhomotm. ²Yo Jisasri rorhu disaiperm rom to inji buga nakumotmm yimomt nd yima sawohf nayak tatruthato htamo yemro burwat. ³Nd yima sawohf nayakyuk yiha yayuk wain bus yihany yi hanymomtn be fe bugamomm. Jisasrhu mmemt inji hti tanyhato Jisasrpnno yimotn mkfo memotr, “Nd yima sawohfhu nayakyuk yiha yayuk waikfot bi yihna yi hnarommn, be bi fe bugaromm.” ⁴Inji mkfomottr tfit Jisasr kfo wok memort, “Mamai, to nanpno mkfiwann to na finji narhoya? Na nhai bi arihatn na tamoh nefm bi finji narhota. Nanhu mirakerroh hingrna yihar tor afo riyorhwor.” ⁵Be wom mmemt inji kfomotrt, yimotn hingrna yimam kfo ptha memotm, “Ror finji kfiwurko, to be ror kfo pthayuk tng yuhatn hikkfot.”

⁶Nd kunys rhumoum 6-pela bro bu rohm. Nd bro bu rohm 100 lita bupam tas hmbremoumm. Nd bu rohroh bupam tu Judam nkifra yuk truf o tir kifsa inji nayukmn kakitohmoumm. ⁷Nd bu rohm brioh bupa duhatmn Jisasr kfo memor, “Bupam watas hmbrekomm.” Be nd bu rohm tas furkih hany bugamomm. ⁸Be tas hmbreni bugamotmm Jisasr kfo memorm, “Nd asomif tas hmbrehani bupamn wahanyhekomr nd burwat mtohekwa yimar.” Be inji kfomotr wompam hanyhemomr. ⁹Nd bupa mifm bi wain bupam kekutmom. Nd bupam hanyhemotmr nd burwat

tohakyuk yimar fesiwonmorm. Ror be yesiwonhato nhai tawisafrmor nd wain bupam niayuk yuhat. Nd bupam yakyuk hingerina yimarpam tawisafrmor nd bupam niayuk yuhat. Nd burwat toh yukatohyuk yimar tfit nakuyakmorr nd tuhan yakyuk yimar. ¹⁰Nakuyakhato kfo memorr, “Bare, dodh yima bugam inji newum, nd tu marukfet dborioh wain bupam hihany hi hanyinitamm, bi fe furkihme ee tfit wom wain bupa furam yakhato kahukmm. To ni nhai inji nakahn. Nhai. Ninhu tu marukfet dborioh wain bupam afo yak htatamonmn tfit asomif fak htenm.”

¹¹Tot barkof mirakerkfor Jisasn rihingerina gngonakmot. Galili profinsko yorhwa taun Kanat tohato nd mirakerkfor hingerinamort. Nd mirakerkfor hingerinamot, ror yakitohwa yufati bbukefthu yak nuhasyuk neft fak nuhasmor. Nd nefmn disaiperm htihato to be rroh dukefm Jisasn htamom.

¹²Be Jisasn turhu mmemt, yo nmemrom, ee turhu disaiperm nd taun Kanat htanyhato tfit Kaperneamko yohnehato ndha tohmom wom yiham.

Bro Nkifrarhu temperr maket htamoa yimam Jisasn yak thumo yuhat
(*Matyu 21.12-13; Mak 11.15-17; Luk 19.45-46*)

¹³Judaroh wom bro yihar kutewumr Pasofa Burwat bi brboh hnamot.^c Nd yihar bi brboh hanyetn ndnetn Jisasn yimor Jerusalemkor.

¹⁴Jerusalem yimorn Bro Nkifrarhu temperr gna habrimo gnathu yifhatikt rim fnahnimor. Rim fnahnihato rim htimorm yimam tarioh mthayuk bulmakaum, sifsifm, ganyom mmkrm maketim hasomomm. Tfit manoko maruha yak tuknayukm rhuhato maruham nayak tukna-moum.^d

¹⁵Ndhtet ndhtet hingernefm hingerinamotm Jisasn rim htihato wom mtitof nmbuham yakmorn wift kanjo hingerinahato nd wiftpno yimam hik nembos tubatumorm. Nd rom maketim haso hanyuk bulmakau sifsifm, rpat fak tubatumorm. Yimam maruha yak tukna hasoyukm, ndm nhaf maruham frbrur bobrur fnahhato teborm yakhato fak kekut fnahmorm.

¹⁶Be nd nungam maketmoa yimam kfo hutt memorm, “Be na kfiwa asomif nungam tamohm wayakni hany wafnahniko! Ndarte ka nikmoh ndhtet ndhtet hingernefroh hingerinayuk kunyet? Nhai nanhu Yifemrhu kunys rhukaht? Tamohmpno ndar temperr tfit maket swirt nhombriwat?”

¹⁷Ror namo neft turhu disaiperm htihato tfit dukamomt Bro Nkifrarhu rfa borngtn Defitr kfomo mrokfot. Nd mrokfot inji kfo memot,

“Nanhu bro yima yuhur ninhu temperrn bro dukefr korhwor.

Ndnetann kanga nd temperr be inji arhu marnya hasor.” Sng 69.9

^c 2.13 Nd Pasofa yihar Judam bro burwat htahato tfit dukamomt rroh nkifram Ijift tohetmn Bro Nkifrar nrafa htihakmohat. ^d 2.14 Romroh gafman maruham yak tuknakhato tfit tu Judaroh maruham yakhato temperrhu takis nd tu Judaroh maruhaye wiknamoum.

¹⁸Judaroh bro yimam nd Jisasr namo nmbuhat htihato kfo ttiwon memomr, “Bare, frohm kfo memomn ndhtet neft wanatwa? To bt asomif wom mirakerkfot wahingrnakahtnt ndt htihato nom kfo mirahnom, ‘Awi, nd yimar Bro Nkifrar kfo tkrurafmorr. Tempert maket htayuk yimam ror nia yak thuneft, nhai mrokfom.’ ” ¹⁹Inji kfomotm tfit Jisasr kfo wok memorm, “Nda tempert wayak tasohkomt. Watasohkahtkomt tfit nann husfirpa yiharpa kasinyaruhant.” ²⁰Be nd yimam Jisasrhu kfomo mrokfot wanyhato kfo memom, “Bar yimako, nda temperr hingrnamohat 46 gunyjim bugam hingrnamomt. Tfit ka ninn be husfirpa yiharpa bmbri kasinyahato hingrnarahnt?”

²¹To nd ror kfomo tempert nhai tu temper mift kformor. Turhu thatipt kfomor. ²²Ndnettn kto Jisasr nohhato husfirpa yiham yopt ruhato tfit sinyamohat, disaiperm tfit dukamomt ror kfoyuk mrokfot. Nd mrokfot dukahato memom, “Bro Nkifrarhu rfa borngt rhuyuk mrokfom yo ror kfoyuk mrokfom fipet mrokfoym.”

Jisasr htitworm yimam niwa nefm yo rom dukewa dukefm

²³Jisasr afo nd Pasofa burwa yihar Jerusalemr tohhato bok mirakerkfot hingrnamoam bok met yindarim htimoumm. Htihato ndnetmn rroh dukefm rorn htamoum. ²⁴⁻²⁵To Jisasr yimaroh yima yuhu mifm bi htitworm. Nhai wom yimar tfit rorpno yihato kfo nuhaskfot. Ndnettn inji htimohat, duka memor, “Rroh yima yuhum nann be inji hta tefinitamnn tfit kto mong trohrahma.”

Jisasr Nikodemusrpno pthamo yuhat

3 ¹Wom yimar, rorhu yufat Nikodemusr, nd yimar Farisiroh hingrneft yakitoh yo Judaroh bro yimar toh inji namour. ²Nd yimar turpathato Jisarpno yifung yimorn mkfo memorr, “Tisaye, nom wom Judanom htitwonomn ni Bro Nkifrar kfo tkrurafoyuk tisaye. Bro Nkifrarhu Yafothat mthu nawoh duha yimar nhai ndar ni hingrnewa kanjohot mirakerkfot hingrnakfot.”

³Ror inji kfomotr tfit Jisasr kfo memorr, “Na kfo mifwann, yimar nhai miyak dborharfor nfri yonm kanjo, nd yimar nhai htiruhatr Bro Nkifrarhu kingdomkfot.” ⁴Tfit Nikodemusr ttiwonmorr Jisasr, “To yimar bi tabou hanyetr, to finji tfit mmemt fkniruhatr mmemt wompam hiyauruhatr?”

⁵Inji kfomotr Jisasr tfit kfo memorr, “Na kfo mifwann, yimar nhai bupami Bro Nkifrarhu Yafothat yak kekuthato nfri yimar frdborharfor nd yimar nhai fkniruhatr Bro Nkifrarhu kingdomkfot. ⁶Yima sawohfn kasinyewar, yima mif thetr kak nhombrewur. To tfit Bro Nkifrarhu Yafothatn hteuwtr yafothar. ⁷Mirahn bok dukefm ayaka nd na kfo yamukohat, ‘Nfri yonm kanjo miyak dborhakfot.’ ⁸Wifort wifor thombat, rot be tuthu yiyeft kitt. Ni

be mirefrpat wanukantn, nhai htikahnt rot sinya tanywa tkitt yo rot yita tkitt. Bro Nkifrarhu Yafothat yimam yak kekuthato nfri yimam frdborha thombat, to inji htirahnm. Nhai htiruhantn Yafothathu hingrna yuhat.”

⁹Tfit Nikodemusr ttiwonmorr Jisasr, “To nd Yafothathu hingrnaneft finji kanjo rhuruhat?” ¹⁰Tfit Jisasr kfo memorr, “Bare, ni to Isrerroh tisaye. Tamohmpno ni tawisaf duha yita? ¹¹Na kfo mifwann, nom kfo pthiwohat, nom bi tunom tawisafhato, yo nom tunmoh nyingaye hti hik bohiket nefmn nom kfo ptha nuhas-wonomko. Nhai be kfo furakahnom. To niko, nom kfo pthiwa mrokfot yekwakomt mongko htewukomt.

¹²Nda bbinysofthu wuskam, na kfiwanko, nhai wany yakiokahkma. To na tfit yura hefenkorhof wuskam wukfo ptha thombat, to niko finji kanjo wany yakioruhakma? ¹³Nhai nda bbinysofthu yimar yura hefenr muhmr. Nhai. Bro Najomrpar yura hefenr bi muhmr. Tur yura hefenr wuhtanyhato fawihnamor. ¹⁴Bingotn Mosesr nungur tik furatn snekbras tuhegirmo kanjo, Bro Najomr tuhegirrahmr. ¹⁵Nd yuhatn, fitoh fitoh yimam rroh bro dukefm Bro Najomrn htemm, be inji toh nkifranirahm.

¹⁶Bro Nkifrar ndar bbinysof thofm be tu mfro marbit hta mifmorm. Ndnetrn nd rorhu rpa yon mifr tuhemorm. Memor, ‘Inji anakahta, fitoh yimam rorn rroh dukefm htemm, be nhai nohruhatm. Nhai. Be inji tahi nrwim kanjo toh nkifranirahm.’ ¹⁷Bro Nkifrar nhai turhu Yonr ndar bbinysofthu met yindariroh nefroh kothu yakitoh hanyeftn kfo tkruraf-rmorr. Nhai. Rroh nrfa hbhakneftn kfo tkrurafmorr. ¹⁸Fitoh met yindarim rroh bro dukefm nd Yonrn htewumm, nhai mrokfo duhatem. To nd Bro Nkifrarhu rpa Yon mifrparr nhai rroh bro dukefm htakahmm, nd yimam bi mrokfetm korhm. ¹⁹To nd rom kotkfot tohruha nmbuhat nhai be sfno. Nda bbinysofthu yak nukayuk kshr bi niamor. To nhai nd met yindarim htihato nd ksh nukefrn yarim tohkahm. Be nd turoh fasoh fasoh nefmpno yesiswamn nndo kspitat rim tohwom. ²⁰Met yindarim fasoh fasoh nefm niwam be tu hti nambur mifwomt nukeft. Nhai wofnkahm nd rroh fasoh fasoh nefm nukeft yakhato tafont rhukfot. Ndnetmn nhai nukeftpno yarim tohkahm. ²¹To yimam tu dborioh nefm niwam nukeftpno yarim tohwom. Nukeftpno yarim tohwatm, yimam htihato kfo kangm, ‘Rom niwa nefm tu Bro Nkifrarhu dukef yuhat hikwom.’ ”

Jon Baftaisr Jisasrhu toh yuhat kfo ptha hikmo yuhat

²²Nikodemusrpno nakfo ptha buganihato kto tfit Jisasri turhu disaiperm Jerusalemr htanyhato tfit tuha Judia profinsn toh htfasmom. Ndha toh htfashato ndharhof met yindarim baftaisimmorm. ²³Jonr nhaf kmi Ainonthu met yindarim baftaiskfot hemorm. Nd kmit brbo Salimtpno korht, ndombhart bok bu yinham ruhetmn bok met yindarim yihato baftaiskfot yi fakmoum. ²⁴Nd yihart Herotr tafi Jonr yakhato kalabus hta duhatrn hingrna htfasmor.

²⁵ Jonrhu uhik ahik htfasyuk yimami wom Judar, turoh nkifra yuk truf yuhatpno rinahtakhato nnakfo huttmom. ²⁶ Ndnatn wom Jonrhu uhik ahik htfasyuk yimam yimomn Jonr mkfo memomr, “Tisa, nd yimar ninpno rpat Joden mkukor tohhato kfo memo, ‘Nd yimar Bro Nkifrarhu Yoner,’ to nd yimarn bi bok met yindarim baftais yahukatrm bi rorparpno yimam kitm.” ²⁷ Jonr nd mrokfot wanynihato kfo memor, “Yura hefenr wuyorhwa Bro Nkifrar rpa rpa hingnefm kahukrm rpa rpa yimam. ²⁸ Nikom bi tukmoh yimbhindange wanymokomt na nd kfo pthamo mrokfot. Memoyanko, ‘Na htiruhakomn mirahko ka asor nd yimar met yindariroh minrfa hbhakyuk yimar Bro Nkifrar kfo tkrurafmor. Na nhai. Na be rorhu nyingako tohak hanyuk yimaya.’ ²⁹ Yimar turhu kfo nanf tuhant yakyukr, ror tor. Yinowemr ror be tohhato wanukr mett yindarirhu yufat yuta thombat. Mett bi yindarirhu yufat kutewutr yinowemr be bro yindhoreft kekwoth. Ndtot tot nanhu tu bro yindhor nmbuhat yorhwat.” ³⁰ Na kanga rorhu yufatn abrot, nanhu yufat ayohnes. ³¹ Nd yimar ror yura hefenr wutoh tanyhato yawihnamoyer. Yawihnehato rorn yura buriwurm tamoh tamohm. Na, na be ndar bbinysof thofena, ndar bbinysofthu tamoh tamoh nefmn na pthiwa. ³² Ror, ror tu hefenr toh tanyetrn turhu nyingaye hti hik tanyuk nefm yo wany sanyuk mrokfom, nd ndmn pthiwur. To nd ror kfo pthiwa mrokfom nhai bok yimam wuyakkahmm. Dfik yimenrpam wany yakiowomm. ³³ Met yindarim nd rorhu mrokfot wany yakiohato yak hikwam, nd yimam rroh dukefm kangm Bro Nkifrarhu mrokfot tu fipayett. ³⁴ Nd yimar Bro Nkifrar kfo tkrurafetrn ndnatn tu Bro Nkifrarhu mrokfo yuhamn ptha hikwor. Ror mrokfom inji ptha hik bohikwohat to tu Bro Nkifrarhu Yafothar thu dbothat bugayetrn inji ptha hik bohikworm. ³⁵ Nd yimar ror tu Bro Yifemrhu Yinemrn tu marbit hteuwurr. Ndnetrn tamoh tamohm rorhu tirtn htamotrm rorn bi kakitohworm. ³⁶ Ndnetrn fitoh yimam o metm Bro Nkifrarhu Yonrn rroh bro dukefm htemm, nd yimam be inji toh nkifranirahm. Nhai inji narfom, be nhai toh nkifraniruhatm. Bro Nkifrarhu namburpam romn yirahm.”

Jisars Samaria efkottpno nakfo pthamo yuhat

4 ¹ Farisim wanymomt Jisars baftaisimmoa yimaroh thomnafat muhmot, Jonrhut yohnemot. Nd Jisars baftaisimmoa yimam Jisarsn uhik ahik htfasmoamrn rorhu mrokfom wany yakitohmoumm. ² Nd Jisarsru yimaroh baftaisimneft nhai tu Jisarsn baftaisimrmoarm. Nhai. Rorhu disaipermn baftaisimmoamm. ³ Jisars tur hti nhtahato kfo memor, “Kmim bi nanrpaya bi hikwatm tom Farisim bi htihato kfo pthewum.”

^e 3.29 Jisars mett yakruha yimar kanjo inji tohwar. Met yindarim Jisars yakruha kfo nanf metem.

Be ndnatn nd Judia profins htanyhato tfit Galili profinsko yimor. ⁴Judia profins toh tanyhato Galili profinsko yinyeft, Samaria profins yuhat yiyetet yihotat. Ndnetrn Samaria yuhat yimor.

⁵Yimorn Samaria yorhwa taun Sikart mfnahmor. Nd taun Sikart korht brbo Jekofr yinem Josefr kfo nuhasmo tkit nmbuhatpno. ⁶Bingot Jekofr toumo bujr nd tkitt rhumor. Jisasn myau minysafmorn nd bujrpno mrhumor. Marr bi dany marr kanjo toh hanyomor.

⁷⁻⁸Jisasnru disaipern ndha mhtanimomrn taunko yeshri wiknat yimom. Ror turpatr nd bujr rhu hasetrn Samaria efkott yimot bupa tasis. Jisasn nd mett htihato kfo memort, “Bupam wahina.” ⁹Nd Samaria efkott inji wanyaf hanyhato kfo memotr, “Bare, ni finji kfiwa? Ni Judaye na Samaria efkota. To tamohmpno na nndo Samaria efkota kfo yamukona, ‘Bupam wahina?’ ” Judami Samariam nhai rpat rhuhato yemaska inji narmoam. Ndnetn inji kfomotr. ¹⁰Inji kfomotr tfit Jisasn kfo memort, “Bro Nkifrar yahuka tamoh tamohm ni bi wahti hik bohiknm yo na bupa tndauwa yimaya bi wahti nhtana, to tfit ninn toh kekuthato womhtet bupam kfo tndaurfona. Inji tndaurfotna womhtet bupam herfoyann. Nd womhtet bupam yanyeft yimam toh nkifranitm.”

¹¹Jisasn inji kfomotr, tfit mett kfo memot, “Bro yimaye, to ni bupa yakyuk baket duhate. Bujrhu bupam watohngotwom. To fita yakhirhoyann nd ni kfiwa bupam? ¹²Nmoh nkifra Jekofr ndar bujr tou htanihemornom. Bujr mfro yohnemotr bupa tashato rorhu yon tuhanm, sifsif bulmakaum, bupa tashemoahat be baketpraye bupa tasakhemourm. Ndnetn nhai wom fitoh yuhamn bupa tasruhantom. Ka ni kangn, wom yuhatn bupam yakruha?” ¹³Nd Samaria efkott inji kfomotr tfit Jisasn kfo memort, “Fitoh met yindarim nda bujrhu bupam tas yewam, nyunguramm tfit knarahmm. ¹⁴To fitoh yimar nd na heruha bupam fawor, be nhai tfit wom nyunguram knaruhatr. Nd na hayuk bupam yiyafhato mirhurahm, nd bupam tfit yinha kanjo mfrfnah hasohato nd bupamn yakitohruhatmt rorhu toh nmbuhat, be inji toh nkifranirahr.” ¹⁵Jisasn inji kfomotr tfit rot kfo memot, “Bro yimaye, nd ni kfi bupam wahina. Nd bupa yekahann, nhai tfit nyunguram knakhato tfit bupa tasis nierhota.”

¹⁶Inji kfomotr tfit Jisasn kfo memort, “Afo ninhu ramemr wamkfkaknr.” ¹⁷Tfit rot memotr, “Na nhai ram duhata.” Tfit Jisasn kfo memort, “Nd ni kfo yamukohat nhai ram duhate, ndt tu kfot kfiwun, ¹⁸yimam bi yakhna yakhnamonmn bi tirfa yima rhuhamo. Nd 6-yukr to bi tor womr. To mirahn ka ndr nanhu tu ramem mifer. Nhai. Ni kfi mrokfot tu kfot kfina.” ¹⁹Jisasn inji kfomotr kfo memotr, “Bro yimaye, bi wany nhtewann ni ka profete. ²⁰Nom Samarianmoh nkifram Bro Nkifrar bro lotum yakitohmoahat nda kminysofr mrfinyhato lotu hakumoum. Tfit arihatn niko Judako kangko, ‘Be Jerusalemrpar yihato walotuko.’ ”

⁴ 4.20 Nd mett kfomo kminysofr Gerisimr kfomot. Samaria profins korhr nd kminysofr. Samariam bro lotum yakitohmoahat to nd kminysofrpar muhato lotumoum. Nd kminysofrhu kfo nuhas mrokfot Lukr kfomort sapta 9 ves 53 kfotn.

²¹Mett inji kfo mott tfit Jisars kfo memort, “Bar mete, na kfiwa mrokfom wawany yakionm. Tor wom yihar riyorhwor. Nd yihar nhai ndar kminysofrn yuwa muhato Bro Yifemr loturuhatkomr o Jerusalemr yihato loturuhatkomr. ²²Niko Samariako Bro Nkifrar lotutwohat niko be nmbuha nmbuha mrokfom wanyhato lotutwoko. Nhais tawisaf marnyahato lotukahko. Nom tu Judanom Bro Nkifrar lotutwohat nhais be lotu furakahnomr. Nmoh nkifra tndh mrokfot kfo nuhas-wotnom Bro Nkifrar yimam nrfa htikyayuk yuhats. Nom nd tndh mrokfot bi nkiframn yo profetmn ptha hnamotmt nom wanyhato ndnettn nom Judanom tawisaf marnyahato Bro Nkifrar lotutwonomr. ²³To kfiwanko, yihar niayukr to bi asor bi niaror. Yimam Bro Yifemr kangm alotunom, nhais tfit kminysofrn o Jerusalemr dukahato loturuhatm. Nhais. Bro Nkifrarhu Yafothats thu nawohruhattm tu Bro Nkifrar dukewa dukef yuhats kanjo loturahmr. Ndhets yimam Bro Yifemr hifats hti yindhorrwor. ²⁴Mounti bbinysoft Bro Nkifrar thu yurhato kukatohwor. Ndnetsn yimam kangm Bro Nkifrar alotunom, turhu Yafothats thu nawohkahttm tur dukewa dukef yuhats kanjo lotukfot.” ²⁵Jisars inji kfo mott tfit nd Samaria efkott kfo memot, “Na tawisafwa, Bro Nkifrar kfo htamo yima nrfa hbhak-yuk yima Kraistr nierahr. Ror niere, rorn kfo nuhas bonuhas bugarahnom tamoh tamoh mrokfom.” ²⁶Rot inji kfo mott tfit Jisars kfo memort, “Na to nda. Na ndann kfo pthanuhiwann.”

²⁷Rof inji nakfo ptha haso hanyomo fijo disaiperm mfnahmom. Be yihom hti fohtasmomr nd Samaria efkottpno nakfo ptha hasetfn. Rom inji yihom htimohats be gonng yagonngt toh natohmom. Nhais womr marimor, “Ttiwon miruhanr, ‘Tamohmpno nd mettpno naphthiwan? Yo tamoht kangn ayaka?’ ” Nhais womr inji kfo ttiwonmorr. ²⁸Be nd mett bu baket wuskam wahtanymotmn taunko tfit yimot. Yihato kmi thofm mkfo memotm, ²⁹“Bar yimako, waniakah-komn wahtikomr wom yimar. Na nahnayuk tamoh tamoh nefm kfo hik bohik bugerm. Ka tor nd yima Kraistr Bro Nkifrar kfo mott.” ³⁰Be inji mkfomottm taunthu tuhant yindars sinyahato yi htimomr Jisars.

³¹Nd yiharpno disaiperm Jisars kfo memomr, “Tisaye, ni nuwa afo waya.” ³²Rom inji kfo mott tfit Jisars kfo memomr, “Nanhu yayuk yeshrim niko nhais tawisafkakhomm.” ³³Disaiperm tum rinahti rinahtihato kfo memom, “Ka nom taunko tohetnomn wom yimam yeshrim hnahumr.” ³⁴Jisars inji wanyaf hanyhato kfo memomr, “Nanhu yeshrim akfo nuhasanko. Nd na tkrorafmo yimarhu dukef yuhats na be hikhato nd ror kfo yuk hingrnafats afo na hingrna bugakfot. Tot nanhu tu yeshrt.

³⁵Wom mrokfot kfo kangko, ‘Kto husfihusyuk yamtpno ka mswirroh yeshrt bi yeshriyettn yakrahm.’ To tfit kfiwanko, mswir mswirroh

yewurit afo wayukatohkomt bi finji yorhwam? Bi yak yibon nefrpayet bi. ³⁶Nd yimar mswirroh yewurithu yak nhafoh htfasyukr dborioh marufat bi yekwarn, nd mswir mswirroh mtoh nkifraniyuk yewurit kak htfaswort. Ndnettn nd yimar yewuri nuhtayukr yo yewuri yak nhafoh htfasyukr rpat yindhorrahf. ³⁷⁻³⁸Bi womm nuhta htamo yewuriroh yakneft kfo tkrur-afomoyanko. Bi wommn yikiat hta-motmt, niko be rroh yikiat htayuk yewuritn yihato fakmoko. Ndnettn nd mrokfot niko kfiwat, tu kfot kfiwuko. Womr yewuri fan nuhta hanyuker, tfit womrn mongko tohhato nd bi yak yibon hanyet yewuriroh yak nhafoh hnayuk yimayer.”

³⁹Nd Samaria efkott taun yihato mkfo memohat, “Na nahnayuk tamoh tamoh nefm kfo hik bohik bugerm.” Inji mkfomohat, boknambok Samaria thofm wanyhato rroh bro dukefm Jisasr htamom. ⁴⁰Jisasr nd mettpno naphamo bujrpno rhu hasetrn Samaria thofm yihato mkfo ttiwon-momr rompno afo toh tanyneft. Inji mkfomotmr afo hus marf tohno tanyorm. ⁴¹Nd ror tohmo yihaf tohhato kfo pthayuk mrokfom hifa wanyomm. Ndnetmn bok met yindarim wany yakiohato hikmomt rorhu mrokfot. ⁴²Nd Jisasrhu mrokfom wany yakiohato hikmo yimam yihato nd mett mkfo memomt, “Ni mirahn ka nd ni kfoyuk mrokfo-rpatpno riwanyakhato ka nmoh bro dukefm rorn htewunom. Nhai. Nom tunmoh nyingaye yo yimbhindange hifa wanukwanomn ndnatn kangnom ror tu ndar bbinysofthu met yindari-roh nrfa htikyayuk yimayer.”

Jisasr kingrhu ofisarhu yonr yak marnyamo yuhat

⁴³Jisasr hus marf Samariat toh tanyhato tfit Galili profinsko yimorko. ⁴⁴Bingot tu Jisasr bi kfo memor, “Bro Nkifrarhu profetrhu yufat bi kmi kmim rhu htfaswort. Turhu kmiti turhu kuny shofm, rompno nhai yufapa duhater.” ⁴⁵Jisasr Galili profins yimohat, yindhorakmomr. Nd Jerusalem rhumo bro Pasofa burwa yihar rom tum yimomn nd Jisasr hingrnamo mirakerkfom turoh nyingaye htimomm. Ndnatn tfit Jisasr Galiliko yimohat yindhormomt rorhu yi nmbuhat.

⁴⁶Jisasr Galili profins yihany yi hanyhato bupa mifm tfit wain bupam yak kekutmo kmi Kanat mfnahmor. Nd yihar kingrhu ofisarhu yonr taun Kaperneamko dbohnetr rhumor. ⁴⁷Nd ofisar wany memohat Jisasr bi Judiako htanyhato Galiliko nier, nd ofisar yimorn Jisasr mkfo ttiwonmorr Kaperneamko yihato rorhu yonrhu yak marnyanest. Rorhu yonr bi nohyuk tkitt rhumor. ⁴⁸Inji kfo pthamotrr tfit Jisasr kfo memorr, “Niko mirakerkfom hti duha, nhai nann nikmoh bro dukefm htakahkma.” ⁴⁹Kingrhu ofisar kfo memorr, “Broye, bmbri wania. Nanhu yonr nohhirahra.” ⁵⁰Jisasr nd ofisarhu mrokfot wanyhato kfo kangrr, “Wanju, ninhu yonr nhai nohruhatr.” Be wom ofisar nd Jisasr kfoyuk tngt wany yakiohato yimor.

⁵¹Nd ofisar yihotat yi hanyhato tafi taun Kaperneamt mfnah duha turhu hingrna yimam toni hnehato yihotatn mkfohiyak memomr, “O, ninhu yonr tor yima nfriyer. Nhai nohrror.” ⁵²Rom inji mkfohiyakmotmr tfit ror ttiwon kangrm, “To fitoh yiharn nd dbohneft thu trohrotr?” Tfit rom kfo memomr, “Yihofnano 1-kilok krif marr dbohneft thu troh tanyrotr.” ⁵³Be yifemr inji wany mohat tfit duka memor, “Dajohmn, na Jisasr to ndhtet yiharn kfo mariora, ‘Ninhu yonr nhai nohruhatr.’ ” Be nd ofisar ndt htihato rori yo nd rorhu rpa kuny shofm Jisasrn rroh bro dukefm rihtakmom. ⁵⁴Tot ndt husyuk mirakerkfo Jisasr Judiat toh tany tfit Galiliko yihato hingnamot.

Jisasr nd bro rhu krna lotu yiharoh mrokfo yuham kfo nuhas bonuhasmo yuhat

(Sapta 5–10)

Betesda yuk bfar Jisasr yak marnyamo yimarhu mrokfo yuhat

5 ¹Tfit kto Judaroh wom bro lotu yiharhu yemro burwat Jerusalemr htamotmt, Jisasr Jerusalemko yimor.

²Nd Jerusalemrhu wom bro kmi yifhatikt kutewumt Sifsifroh Yifhatikt, to brbo nd kmi yifhatiktpno hingrna-momr wom bro yuk bfar. Hibru yarmumat kutewumr Betesda.^g Nd yuk bfarhu manoh manoh thmbmn yimaroh rhu mskayuk tirfa kuny nafom hingrna habrimomm. ³⁻⁴Nd kuny nafomn rhu hasomoum dbohna yimam, nyinga kunyjetm, wura bebetm, yo wura noh minysafetm.^h

⁵Ndha nd tkittn rhumor wom dbohnet yimar. Nd yimar 38 gunyjimm rorhu dbohneft hatohmort. ⁶Jisasr yau hanyhato nd yimar hwe kkor hasetr mhtimorr. Nd dbohneft htimorr bi rihatohngotakmor. Inji htihato kfo ttiwon memorr, “Nine tu waduka. Kangn nd dbohneft athu trohta?”

⁷Jisasr inji kfomotrr tfit nd dbohna yimar kfo kangr, “Bro yimaye, nda tek bupam hamuh dbrufwohat to fitoh yimarn yaknihato wahtewotra bt nd dbohneft thu trohkahta? Buparoh hamuh wohnepam htihato kanga tukann yudbat aikahann amitohniya, wommn bi dimandinihato mitohnitadm dbohnefm thu trohwomm.” ⁸Inji kfomotr Jisasr kfo memorr, “Wasinya! Wasinyakahnn yitwat wayakkahnt wayauwakni.” ⁹Be yudbat

^g 5.2 Wom yimam kutewumt Betsata. ^h 5.3-4 Ndar Bro Nkifrarhu rfa borngthu mrokfom hti hik bohiket yimam ndar hus vesfhu mrokfom hti nhta yak nhtamommn kfo memom tom wom mrokfom. Nd mrokfom kfo memom, “Nd wonk wonk dbohnet yimam rhu hasohato nd yuk bfarhu hamuh wohnepam hti hasomoum. Wom yiham Brorhu mounmotr nd yuk bfar yimoarn yohnenimour. Yohnenihato bupam hamuh dbfamourm. Nd dbohnet yimam nd hamuh wohnepam hti hasohato bi nd hamuh wohnepam wuthani hanyetmn fitoh yimar fukni gngonr, nd yimarhu dbohneft thu trohmoutr.”

nd yimar marnyanimor, nndo memom ka kparn watuyekwor. Be nd tur hwe hasoyuk yitwat miyak riraknihato fauyaknimor.

Sabat yiharn ndhtet neft rhumot. ¹⁰Ndnetn Judaroh bro yimam inji htiyakmohat kfo memomr, “Bare, tamohmpno nda bro Sabat yiharn nd yitwat yihom hauyak mhauyekwant? Boririfhut kfo kangt, ‘Mirahn Sabat yiharn yitwat yihom hauyak mhauyakant.’ ” ¹¹Tfit ror sinyahato kfo memor, “Nd na yak marnyafoyuk yimar kfo famura, ‘Wasinyakahnn yitwat wayaknikahnt wayauwakni.’ ” ¹²Tfit kfo ttiwon memomr, “To frohrn kfo yamurn, ‘Yitwat wayaknikahnt wayauwakni?’ ” ¹³To nd wura noh minysafet yimar nhai hti hik marnyaf-rmorr nd ror yak marnya tanyuk yimar. Yonmar yima rifinyrn Jisahr nd yimar yak marnya tanyumohat to be nd yima rifiny buharn tayinyarnihato frtkunimor.

¹⁴Kto Jisahr Bro Nkifrarhu temper kmifar rim fnahnihato nd yimar yiro temper kmifar toh hasetrn rim htimorr. Rim htihato kfo memorr, “Wahti. Ni bi tu yimaye. Nd ni hatohmo yonmari dbohneft be bi thu troh tanyumotn. Arihat mirahn tfit wom tamoh nefm arim naya. Tfit finji rim narahn, to be nd yiha be tu bro krhopam yakrahn.” ¹⁵Be nd yimar ror yak marnyamo yimar hti hikhato Judaroh bro yimampno yihato kfo nuhas memorm, “Nd na yak marnyamo yimare, Jisaser.”

¹⁶Be nd Judaroh bro yimam inji wany hikak marnyahato Jisahr rihti dbnotakhato riphtha namburak memom, “To nd yima Jisahre frohm kfo memomr, Sabat yiha ndhtet hingrnefm wah-ingrnatwa?” ¹⁷Jisahr nd rroh kfo hutt mrofkfom wanyhato kfo memorm, “Nanhu Yifemr nhai rhu witakahr hingrnanef. Na to nd yuhatn na nhai rhu witakfot hingrnanef.” ¹⁸Be nd ror kfomo tngrrpno Judaroh bro yimaroh yima yuhum kahm kindo wakur sinyahato kfo memom, “Nome ndar yimar finji anakahtnomr anohr. Sabat yiham nhai mikahr nd yihar be wom tamoh nefm finji na duha. Yo nhai be nd nefrpat nakahr, Bro Nkifrar kangrr rorhu Yifemer. Kangr Bro Yifemr kanjo aruha, nd dukeftn nd nefm newurm.”

Bro Nkifrarhu Yonrhu yakitohyuk hingrnefm

¹⁹Jisahr nd Judaroh bro yimam kfomo mrofkfot wanyhato tfit ror kfo memorm, “Na kfo mifwanko, Yonr turhu Yifemrhu hingrnefm hingrnewur. Nhai be turhu yima yuhurn o dukefrn tamoh hingrnefm hingrnakahrm. Nhai. Ror turhu Yifemr hingrnayuk hingrnef yuham hti hikakhato hingrna hik hanitr. ²⁰Nd Yonr be Yifemrhu mondt yihom furwarn nd ror niwa nefm yak nuhaswatrr newurm. To mirahko ka be nd nefrpat hti rahnom. Nhai. Tu bro bro nefm yak nuhasruhatrr tfit rorn nd nefm nikompno naruhatrm nikom tfit hti kshrfahato kfo mirahko, ‘Mamai! Ndart tamohtet nefet?’ Mfham danyr yohtnehrm. ²¹Ndt nhai be kfo nhehkfoyet. Bro Yifemr noheh yimam yak kasinyahato yima

tkonham kafkni yahuka kanjo, to be nd yuhatn yinem Yonr turhu hti fijo yimam tkonham kafkni yahukrm. ²²Yo nhai tfit Bro Yifemrn kotkfot yakitohruhatrt. Nhai. Nd hingrneft bi Yonrhu tirtn htamort. ²³To be ndnatn nda bbinysofthu yimam be yinem Yonrhu yufat yuta hagrharahm Bro Yifemrhu yufat wuyuta hagrha hakutwa kanjo. Fitoh yimam nhai yinem Yonrhu yufat yuta hagrhakahm, nd yimam nhai nd yonr kfo tkruryuk Yifemr kfo hagrhakahm.

²⁴Na kfo mifwanko, fitoh yimam na kfo tkrurafyuk Yifemrn rroh dukefm rhuhato nanhu mrokfom hikwom, toh nkifranirahm. Nhai nd kotkfot tohruhatm. Be mrokfo duhatm rhurahm. Nd hel yita yihotat bi htanyhato Bro Nkifrar htayuk dfa tikr bi rim tohnhato hefenrhu yihotat kau hanitwom.

²⁵Na kfo mifwanko, yihar niayukr to bi asor bi niaror. Nd hel yi hanita met yindarim yinem Yonrhu tngt wanyrahm. Wanyakhato Bro Nkifrarhu yihotat toh hanyrahm. ²⁶Yimaroh rhu tohefr tu Yifemrn kakitohworr. Nhai wom yima furam yakitohkahmr. Yifemr yakitoh hasohato tfit tu Yinemrhu tirtn yimaroh rhu tohefr fak htamorr. ²⁷Yo kotkfothu yakitohneft bi tu Yinemr, nmoh Bro Najomr, turhu tirtn fak htamort. ²⁸Mirahko nd na kfiwa mrokfompno mfha tha duhatnom arhunom. Yihat nieraht, noheh yima bugam yopm toh hanyukm tfit Yonrhu naku tngt wanyhato ²⁹tfit sinya hanyrahm. Fitoh yimam toh marnyem nd yimam tfit sinya thombat, be mrokfo duhatm rhuruhamn dborioh rhu nmbuhat yakhato toh nkifranirahm. Fitoh yimam fasoh nefm nayetem, nd yimam sinya thombat, be kotkfot tohniruhamn rroh toh nmbuhat, fasoh toh nmbuhat yakrahm.”

Jisasrhu rhu toh nmbuhat womm htihato kfo pthamo yuhat

³⁰Jisar tfit kfo memorm, “Na nhai wom hingrneft be nanhu yima yuhurpar wakfakhato hingrnakfot. Nhai. Na tukianhu Yifemr kfo htafmo mrokfo yuhatn hikwoyann met yindarim nayuk tamoh tamoh nefm htihato kak hta bohtahukanm. Ndnatn na yimaroh nefm yak hta bohtiwohat na tuka kfo tkrurafmo Bro Yifemrhu mrokfo yuham hikhato kak hta bohta marnyahukanm. Nhai nndo mando riyohne ayohnekaha.

³¹Be na tukiann, na tukanhu toheft aptha srhant, be nhai nanhu mrokfom wany fugharfotkomm. Nhai. ³²To tor womr riyorhwor. Rorn nanhu yufat kfo ptha yimbu hikwort.ⁱ

³³⁻³⁴Yo Jon Baftaisr tu nanhu rhu toh nmbuhat kfo ptha yimbu hikmort. Ndnetn nikmoh wom yimam Jon Baftaisrpnio yihato rorhu kfoyuk mrokfom wanyakmomm. Nanhu dukeft duka kanga, nd mwanakyuk mrokfom hikrahkomm, Bro Nkifrar nrfa htiyakrahko. To

ⁱ 5.32 Nda veskfot kfo yamuka, “tor womr riyorhwor,” ndr to Bro Nkifrar kfiwort.

na nhai duka mekoaha, 'Tfit wom yimarn buha tohhato nanhu rhu toh nmbuhat rorn yimampno kfo ptharuhatrt yimam wanyhato hikrahma.' Nhai. ³⁵Jonr kshr kindo niahato fakitohmorr. Ror nd yakitohmo kshrhu nukeftpno afo myindhor tefinimoko.

³⁶Yima Jonr niahato kfo pthamo mrokfom rom tu nanhu rhu toh nmbuhatu mrokfom kfo pthamor. To nd Yifemr na hemo hingrnefm na hingrniwam, tom nd hingrnefmn yimam kak nuhaswomm na Bro Yifemr kfo tkrurafmo yuhathu tu hingrnefm. Nd hingrnefmn yimam htihato kfo kangm, tom tu Bro Yifemrhu hingrnefm. ³⁷Na Yifemr tkrurafmotra nda bbinysoft niamoya. Turn nanhu rhu toh nmbuhat kfo ptha nuhasmor. To rorhu tngt nhai nikmoh yimbhindange wanyrmokomt yo nhai rorhu nyingatikt nikmoh nyingaye htirmokomt. Nhai. ³⁸Na nd Bro Yifemr kfo tkruryuk yimaya, to na nhai hikkahkma, ndnettn nhai rorhu mrokfom yakitohkahkomm.

³⁹Nikmoh dukeft duka kangko, 'Bro Nkifrarhu mrokfomn tu toh nkifraniyuk dborioh rhu nmbuhat yak htarahmnom.' Ndnettn nd mrokfom htitakomn kak nhta bonhtewukomm. To nd mrokfom to nann kfo hik bohikwom. ⁴⁰To niko nhai wany yakiohato na hikkahko. Ahikko to hifa rhu nmbuhat herfoyanko.

⁴¹Na nhai mikaha, mrokfom apthakahta yimam wany kafhurrahma. Nhai. ⁴²Na hti hasiwanko nikmoh yuhuwaf marbim nhai Bro Nkifrar rhukahm. Nhai. ⁴³Na niamohat, tu Bro Nkifrar tkrurafmotra fawihnamoya. To niko nhai marimoko, nd na kfoyuk mrokfot wuthu kmbriyakhato ayak hiknomt. Nhai. Be wom yima furar be turhu fijo niahato mrokfo kfo pthanest niko be yudbat myoh brurnihato bmbri hikaknitkomt. ⁴⁴Niko ndhtet met yindariko be tu nhai mif yak hikruhatkomt nanhu mrokfot, nhai mif. To nikmoh bro dukefm be kangko, 'Be tunom nayuta yindhorhato bro yufat ayak hasonom.' Nhai wofnkahko Bro Nkifrarpar yahuka bro yufat.

⁴⁵To niko mirahko ka nann kotimruhanko Bro Nkifrarhu nyinga-tikhato. Nhai. Nd niko kotimyuk yimar tor riyorhwor. Mosesrn kotimrahrko. Niko kangko, 'Nda Mosesrhu mrokfotn hifa tkitt htarahntnom.' To nd mrokfotn tfit toh kekuthato kotimrahtko. ⁴⁶Nd Mosesr wandfamo mrokfom to nanhu rhu toh nmbuhat wandfa hikmor. Ndnettn kanga niko Mosesrhu mrokfot yakhato ahikko, nann hikrfoko. To nhai. ⁴⁷Na bi htitanko nd Mosesr wandfayuk mrokfot nhai yak hik marnyakahkomt. Ndnatn to nanhu mrokfot nhai yak hikruhatkomt."

Jisahr 5,000 yimam yeshr hemo yuhat
(*Matyu 14.13-21; Mak 6.39-44; Luk 9.10-17*)

6 ¹Tfit kto Jisahr tfit mmbrrt yaknihato tek Galili barithu mkuko yimor. Nd tek barithu wom yufat kutewumt Taiberias. ²Boknabok

met yindarim Jisasr hingrnamaoa mirakerkfom htimoumm. Yimam tamohetet tamohetet dbohnefm hatohetm ror kfomour marnyanimoum. Ndnetmn yonmari rifuhetr yihom hikak mhikakmoumr. ³Ndnetrn wom kmir muhhato turhu disaipermprno afo rhumom. ⁴Jisasr inji namohat nd Judaroh bro rhu krna yihar, kutewumr Pasofa burwar, nd yihar bi brboh hanyetrn turhu disaipermprno rhumor. ⁵Jisasr memor, “Ayukatohafoya,” asha htihakmorm yonmari rifuhetr. Be ror nd yonmari met yindari rifhur htihakhato tfit Filiftr ttiwon rhti memor, “Nda yonmari rifinyr niwarne, to yeshrim fitha wiknahato yahukanomm?” ⁶Nd ttiwon mrokfot Jisasr kfomot, be yuwi Filiftrhu yima yuhurhu was tiwonneftn inji ttiwon rhtimor. Tu Jisasr ror tor rhumor rorhu yima yuhur nd yimaroh finji nayukr.

⁷Jisasr inji kfomotrr tfit wom Filiftr kfo memorr, “Mirahnom 200 kina yak nhafohkahnomn 200 kinakfet bretpam ayaknom nda yonmari rifhur href finji yak nhtahukam?” ⁸Tfit tu Jisasrhu disaiperr Andrur, Saimon Pitarhu habhir, ror waruhato kfo memor, ⁹“Asor wom yima damiagr kakitohwor bari plauapaye tonet 5-pela bretpami hus yira bjhenf. To kangnome nda yonmari yima rifinyre ka hifa kak nhombra twanhiwum nd 5-pela bretpenmi hus yira bjhenf?” ¹⁰Jisasr sinyahato disaiperm kfo memorm, “Nd yimam wakfokahtkomm afo ndha nd kivr suhtn asibosi rmon hanyam.” Be kfomotmm tuha kivr suhtn sibosi rmonmom. Nd yindarim nd rifinymom, 5,000 yindarim rifinymom.

¹¹Be nd tuhan yindars sibosi rmonmotm Jisasr nd bret nuwat yakmortn Bro Nkifrar wukfo yindho-rakhato yak tif botif rmonmortn fak nhtahemorm. Yimam be turoh yak fijo fakmom. Yo nd yira bjhenf yak nhtahemohat, nhaf rpahtet neft namor. ¹²Ye furkihmotm Jisasr turhu disaiperm kfo memorm, “Waikahkomn nd rroh yesmbhehm wayak nhafohkomm, rhu gbitnarahm.” ¹³Be nd turhu disaiperm sinyahato nd 5-pela bretparoh yesmbho hta hanyuk bretpam fak nhafoh bugamomm. Yak nhafohhato kpm hmbremohat 12-pela kpm hmbremomm nd yesmbhehm.

¹⁴Met yindarim nd Jisasr namo mirakerkfot htihato be tfit tum rinakfo nakfo memom, “Dajohmn, nd Bro Nkifrarhu rfa borngt kfo hnamo profetr ka asor bi niamor.” ¹⁵Nd rom nakfo pthamohat, Jisasr bi wanymormn ror duka memor, “Arm bi inji rinakfo pthekwamn tir tir yak rim htahato kfo mirahma, ‘Rorn nmoh kingr tohrahr.’” Jisasr nd dukefr yakmotrr nd tkitt htanymortn tfit turpetr yura kminysofko muhmor.

Jisasr yura tek yuhat yau hanyomo yuhat
(*Matyu 14.22-33; Mak 6.45-52*)

¹⁶Krifn disaiperm tfit tek bariko yimomwe. ¹⁷Yimomn mmbrrt yaknihato memom, “Tek barit hir hayuknihato tfit Kaperneamko

riyahnom.” Yifungta hanyomot nhai bi Jisasn mifnahrnrom. ¹⁸Hir hanyetmn bro wifort sinyahato sifot rpat sinyamot. ¹⁹Nd wifortpno rihirhany rihirhany, ka bi 5 o 6 kilomita kanjo bi rihir hanyetmn ee Jisasn htiyak hanyomomr yura tek yuhat yau hnehato brbo mmbrrtpno fau yaknimor. Rom inji htiyakhato fakrmemom. ²⁰Be bmbri tu Jisasn kfo kangrm, “Mirahko ayakrmenom. Na Jisasa niewa.” ²¹Be inji kfomotrm disaiperroh yima yuhum mirhuhato rroh mmbrrtn tfit fak kmbremomr. Mikmbremotr be yudbat nd mmbrrt rim fnahmot rom yiyuk tkittn.

Met yindarim Jisasn yau hambromo yuhat

²²⁻²³To nd Jisasn kfo bruttnahato yeshrim yak nhtahemo tkitt toh hasomo yimam, tfit ndwom dbha marrn barat hirmo mmbrrm htihat kfo memom, “To nom yihof Jisasn yeshrim herohat afo rpa mmbrrpat htironom. To nd mmbrrt to bi disaiperrpam krif fakniromt. Jisasn nhai hikrrorm.” To ndha hirmo mmbrrm Taiberiuskorhof mmbrrm hirmoum. ²⁴To Jisasn rorhu disaiperm hti hambromohat, be tfit nd Taiberiasroh mmbrrm myaknihato Kaperneamko hir hikmomm.

Jisasn hefenrhu bretpayer

²⁵Kaperneamko rim htanihato Jisasn hambro hanyhato mhtimomr. Mhtihat kfo ttiwon memomr, “Tisaye, to nine asombha niarohate fitoh yiharn niaro?” ²⁶Be rom inji ttiwon-motmr tfit Jisasn kfo memomr, “Na kfo mifwanko, niko na hambro hnewohat nhai be na nahniwa mirakerm htihat kfo mikahkma, ‘Dajohmn! Tu Bro Nkifrarhu Yon mifer.’ Nhai. Be nd bretpam yak yurhhato ye furkihmo yuhat htimokomn ndtpno tfit kak hambro htfaswokma. ²⁷Mirahko be yatiyeft yakyuk yeshrt adukanom. Yiro yafothat yakyuk yeshrt dukakfot. Nd yafothathu yeshrt ye hmbrihato toh nkifranirahko. Nd yeshrt na Bro Najoma hiruhanko. Bi Bro Yifemr nd hingerneft bi fak htamora.”

²⁸Jisasn inji kfomotrm tfit rom ttiwon memomr, “To nom finji nahato nd Bro Nkifrar kfo yuyuk hingerneft yak hikruhanomm?” ²⁹Rom inji kfomotmr tfit Jisasn kfo memomr, “Bro Nkifrarhu hingerneftu hingerneft inji korht: Nikmoh bro dukefm nd tu Bro Nkifrar kfo tkrurafomo yimarn rhukfot.”

³⁰Rom nd mrokfot wanyhato tfit Jisasn ttiwon memomr, “To ni finji kanjohtet mirakerkfot hingerনারুহাতনত nom htiruhanomn kfo miruhanom, ‘Dajohmn! Tu Bro Nkifrarhu Yon mifer.’ To ni tamohtet hingerneft hingerনারুহা? ³¹Nmoh nkifram nungur tik furat, kutewumt deset, nd tkitt hwe toh hnehato manakfot yakmohat, to rfa borngt kfo kangt, ‘Yura hefen yuhat yawihnyayuk bretpam ndm hemotrm famom.’” ³²Be rom inji kfomotmr tfit Jisasn kfo memomr, “Na kfo mifwanko, Mosesn nhai yura hefen yuhat yawihnyayuk bretpam yakhato hermorko. Nhai. Nanhu

Yifemrn kahukrko tu yura hefenkorhof bretpa mif mift. ³³Nd bretpat Bro Nkifrar heyukt yura hefen yuhat wutoh tanyuket. Nd bretpat yayuk tuhant yindars be toh nkifranirahm.” ³⁴Jisasr inji kfomotr tfit rom kfo memom, “Bro yimaye, nom kangnom, nd bretparpam yiha yiha wahi hanyswannom.” ³⁵Rom inji kfomotm tfit Jisasr kfo memorm, “Na to nd toh nkifraniyuk yafothat heyuk bretpaya. Yimam nanpno nierahm be nhai tfit yatinohruhatm. Yo nann rroh bro dukefm rhurahm, be nhai tfit bupa knaruhatm.”

³⁶Jisasr inji kfonihato tfit kfo memorm, “Mrokfot to bi kfiyanko. Niko na nahnayuk nefm ar bi htietko, to nhai nann nikmoh bro dukefm rhuhato hikkahkma. ³⁷Yimam Bro Yifemr bi nann fahur nanpno nia tohrahm. Nhai kfo krmah o yak thu inji narhotanm. ³⁸To na hefen wuhtanyhato yawihnamohat, nhai be tukianhu dukefthu hikneftn yawihna-armoya. Nhai. Memoya, ‘Bro Yifemrhu dukef yuhatn na be hikhato nd ror kfoyuk hingrnafat hingrnaruha.’ ³⁹Na Bro Yifemr kfo tkrurafetann fitoh met yindarim bi tu Bro Yifemr nanhu tirtn bi hterm na nhai womr yak troh tanykfot wuroh ndar bbinysofthu bati yihar. Nhai. Nanhu tirt bi hterm yahot tathakni bugaruhanm. ⁴⁰Nanhu Yifemrhu yima yuhur inji duka kangr, nd dodh met yindari bugam Yonr yukatohhato ror yak hikwam, rom tu dborioh toh nmbuhat yakhato be toh nkifranikfot. Na tukann wuroh yihar nann yahot tathakniruhanm.”

⁴¹Jisasr kfo memotr, “Na yura hefen yuhat yawihnayuk bretpaya,” nd mrokfotpno Judam wanyhato rroh yima yuhum nhai marnyarmomm. Kfo hutt memom, ⁴²“Nd yimar nom tawi-safwonomr. Josefrhu yinem Jisaser. Rorhu yifammaf nom tawisafwonomf. To tfit tamohmpno kfo yamukar, ‘Na hefen yuhat fawihnamoya?’ ”

⁴³Jisasr kfo memorm, “Be tmifko tukmoh rim pthata mpthataneft. ⁴⁴Na tu Bro Yifemr kfo tkrurafmotra fawihnamoya. Nhai wom yimar be turparhu duka fijo wayibon sinyahato nanpno niakfot. Tu Bro Yifemrn nd yimar thu yuhurworre ee btn nanpno niakfot. Kto wuroh yihar nd yimar yahot tathakniruhanr. ⁴⁵Profetm wandfamo mrokfot kfo memom, ‘Tu Bro Nkifrar mrokfom hirahm.’ Yimam nd ror hayuk mrokfom wanyhato dukefm yekwam nanpno niewum.

⁴⁶Nhai wom yimar Bro Yifemr htirmorr. Nhai. Nd tu Bro Nkifrapno toh tany niayuk yimarpn Bro Yifemr htimorr. ⁴⁷Na kfo mifwanko, yimar rorhu bro dukefm nann rhuhato nanhu mrokfom wany yakiohato yak hikwar, tor nd yimarpar dborioh toh nmbuhat yakhato toh nkifranirahr. ⁴⁸Na nd toh nkifraniyuk yafothat heyuk bretpaya. ⁴⁹Nd nikmoh nkifram nd nungur tik furat yutewa deset, ndko hwe sohhnahato manat yi hnamo yimam be bi noh witamom. ⁵⁰Nd bretpat yura hefen yuhat yawihnayukt ndt womhtet bretpayet. Yimam nd bretpat yanyeft to be nhai tfit nohruhatm. ⁵¹Na to nd yura hefen yuhat yawihnamo toh

nkifraniyuk yafothat heyuk bretpaya. Yima nd bretpat yak ye hmbrirahn to be toh nkifranirahn. Nd bretpat na yakhiruhath to tukanhu yima nmpayem. Ndar bbinysofthu met yindariroh rhu nmbuhath dukahato suh nanyorruha.”

⁵²Jisatr inji kfomotr, Judam wanyhato tum rinakfo nakfo memom, “Bar yimako, tone nda yimare finji turhu nmhapam yakhato hiruhatrnom yeruhanomm?”

⁵³Rom inji kfomotm tfit Jisatr kfo memorm, “Na kfo mifwanko, nhai Bro Najomanhu nmhapami yo nanhu kkupam yak yarfokomm be nhai dborioh rhu nmbuhath yakruhatko. ⁵⁴Yimar o mett nanhu nmhapami kkupam kekwoomm nd yimam be toh nkifranitm. Kto wuroh yihar yahot tathakniruhanm. ⁵⁵Nanhu nmhapam tom tu yeyuk yemrot yo kkupam tom tu yeyuk bupam, ndnetann inji kfiwanko. ⁵⁶Yimar nanhu nmpami nanhu kkupam yewar, bi ke hmbriye-kwora. Ror bi nann thu nhombrewur yo na bi rorn thu nhombrewa. ⁵⁷Na tu toh nkifraniyuk yafothat heyuk Yifemr kfo tkrurafmotra fawihnamoya. Na to nd Bro Yifemr nanhu rhu toh nmbuhath yakitohwatrt tohwa. Nanhu toh nmbuhath inji ruhettn, ndnettn yimar nanhu nmpam yanefth to be rorhu rhu toh nmbuhath yakitohrhotant tohrah. ⁵⁸Tot tu bretpa mift yura hefen yuhath yawihnamot. To mirahko ka nikmoh nkifram yamo kanjohot bretpayet. Nhai. Rom yamo bretpat nhai ndt yehato toh nkifranirmom. To nd ariharhof bretpat yimam yakhato yanyefth be inji toh nkifranirahm.” ⁵⁹Jisatr Kaperneam taunthu rhu rifinyuk Judaroh rmont ruhatho nd mrokfom kfo ptha nuhasmorm.

Toh nkifrani yuhathu kfo nuhas mrokfot

⁶⁰Bok disaiperm Jisatr kfoyuk mrokfom mwan y frnatahato kfo memom, “Jisatr mrokfom inji kfo pthaneft to frohm wanyhato hikruham?” ⁶¹Jisatr bi htimorm rom inji kfo pthamoahat. Inji htihat kfo ttiwon memorm, “Ka nd na kfoyuk mrokfot wanyhato mfrnahirtewuko? ⁶²To kto Bro Najomr mikahtr, nd tur toh tanymo kmikor muhwa, to niko htiyaf hany thombat to finji? ⁶³Bro Nkifrarhu Yafothatn kahuktnom tu toh nkifraniyuk yafothat, nhai yima mifmn. Nd na kfoyuk mrokfot, ndt tu yafothet mrokfoyet. Nd mrokfotn kahuktm yimam toh nkifraniyuk yafothat. ⁶⁴To tom nikmoh womm nhai wany yakiokahmt nda na pthiwa mrokfot.” Bingotn Jisatr bi htimorm fitoh yimamn nhai wany yakioruhathmr. Yo bi htimorr fitoh yimar hndhnarahr. ⁶⁵Ndnatn Jisatr wom mrokfot kfo memorm, “Yimam nhai wany yakiokahm. Nd yuhath niko bi kfo kanganko, nhai wom yimar be turparhu duka fijo wayibon sinyahato nanpno niakfot. Tu Bro Yifemrn nd yimar thu yuhurworre ee btn nanpno niakfot.”

⁶⁶Be nd yiharpno Jisatr nd mrokfot inji kfomotrt bok disaiperm frttrhommr. Nhai tfit uhik ahikrmoamr. ⁶⁷Be Jisatr inji htiyaf hanyhato

nd turhu 12-pela disaiperm ttiwon memorm, “To nikone, rpat htany bugarahkma?”

⁶⁸Tfit Saimon Pitar waruhato kfo memorr, “Broye, nom ni htanyruhanomn to wom frohrpno rim tohruhanom? To ninrpanhu mrokforpat harhuwott tu toh marnya hatohyuk yuhat. ⁶⁹Nom ninn nmoh yima yuhum htahato duka kangnom, ni tu Bro Nkifrar yak htamo yimaye.”

⁷⁰Ror inji kfomotrr tfit Jisasr kfo memorm, “Rot nann niko 12-pela disaipermo fakmoyanko. To ror tor nikmoh womr. Rorn Satanru hingrneft hingrnayuk yimayer.” ⁷¹Nd ror kfomo yimar to Saimon Iskariotrhu yinem Judasrn kfomor. Nd Judasr to nd 12-yuk wom disaiperm yimayer. To rorn kto frfnahnihato tfit Jisasr hndhnamotrr yahr kmim yihato wasmomr.

Judaroh briaaha kuny nafo mkuroh rhuhatoye burwa yihar Jisasr yi htimo yuhat

7 ¹Jisasr nd mirakerm Galili thofm yak nuhasnimohat, afo tuha Galili distriktn afo fau habrimor. Judiako bi yinyeft nhai. Judiakorhof bro tohak yimam bi rorhu wasnefthu wajis bi haruhetmn to be Jisasr nhai bi marimor, “Judiako bi yiruha.” ²Judaroh briaaha kuny nafo mkuroh rhuhatoye burwa yiham bi brbo rhu hnetmn, ³Jisasrhu wom habhim kfo memorm, “Nom kangnom ni nda kmit wahtanykahnn tu Judiako waiswa. Tu Judiako waikahnn nd ni hingrniwa womhtet womhtet miraker hingrnefm wahingrnakahtnm tunhu disaiperm afo htirahmm nd hingrnefm. ⁴Wom yimar kangr, ror niwa nefm yimam ahtimm, ror nhai be hingrna kafroh-kahrm. To ni kangn, mirakerm ahingrnayanm, tafontn met yindariroh nyingatikhatoye wahingrnakahtnm ahtimm.” ⁵To tu Jisasrhu habhim nhai rroh bro dukefm Jisasrn rhurmom. ⁶Be rom inji kfomotrr, tfit Jisasr kfo memorm, “Nanhu tu yi yihar tafi afo bi niakahr. Niko fitoh yuha fitoh yuha yinyefm niko tuko yakitohwakommn yiham, niko tuko yi furaknitko. ⁷Niko nda bbinysof thofm nhai be mfro hti srkahmko. Na be rroh gobenann be fndr hitiwoma. Kangm, “Tamohmpno kfo ptha nriyafwarm nom niwa fasoh fasoh nefm?” ⁸Nd niko Jerusalemr yihato Judaroh kuny nafo mkuroh rhuhatoye lotunefm yi shombat, na nhai hik hanyrhotanko. Nanhu yi yihar nhai bi niakahr. Tuko waiswako.” ⁹Inji kfaf nuhasafhato ror tuha Galilitn toh gari hasomorm.

¹⁰Ror wom habhim afo htiya-fmormn bi kitwome, ee ror kto mongkor yimor. Nhai yimam htiyafmormr ror sinyanimohat. ¹¹Nd Judaroh kuny nafo mkuroh lotu yiharn Judaroh bro yimam Jisasr yukatoh hasotihato kfo ttiwon hambro memoum, “Bar yimako, nd yima Jisasre to fitor? Nhai niarfor?” ¹²Tuha met yindars be nhowi brumhamn nakfo nuhas nakfo nuhas memoum, “Ndr tu dborioh yimayer.” Tfit wommn kfo memoum, “Nhenoye, ndr

yima frnhehet yimayer.”¹³ Met yindarim Jisasrhu mrokfom kfo pthamoahat, Judaroh bro tohak yimam yanhohato, nhai be masat tafontn kfo ptha nriyaf inji narmonoam.¹⁴ Nd Judam turoh bro yiham rhu haso hanymom Jisasr yiro Bro Nkifrarhu temper kmifar rim fknenihato met yindarim mrokfom hemourm.¹⁵ Judaroh bro tohak yimam Jisasr kfomo mrokfom wanyomohat tuha mrokfo duha rhumomn tfit afo Jisasr yukatohhato hifa mmbra memom, “Ndhtet skurr yi juha yimar to finji kanjo ndhtet duka tungunefm yekwarm?”¹⁶ Jisasr tawo kfo memorm, “Nda mrokfom, na nd kfiwam, niko mirahko ka be tukanghu yima yuhuruhem. Nhai. Nd na kfo tkrurafyuk Bro Nkifrarhu mrokfom kfo ptha nuhaswanko.¹⁷ Wom yimar kangr, ‘Be tu Bro Nkifrarhu dukef yuhah ahik mifa,’ nd yimarn yakrahrt nda na kfo pthiwa mrokfothu mna yuhah. Rorn yak nhtarahrt nda na kfiwa mrokfot tu Bro Nkifrarhu mrokfot kfiwan o tukanghu dukefrn niewatm pthiwanm.¹⁸ Yimar be turhu yima yuhurn mrokfom wakfo pthakneft, nd yimar kangr be yuwi yimam akfo kafhurma. To yimar nd tur kfo tkrurafyuk yimarhu yufat kfo kafhurwort, nd yimar tu dborioh yimayer. Nhai yimam frnhehkahrm.

¹⁹ Bingot Mosesr hemo boririfhu mrokfom, to nhai nikmoh wom rpar myakni marnyakahrt nd boririfhu mrokfot. To tamohmpno tfit nann kfo yamukako, ‘Ror nhai hikkahr nkifra boririfhut.’ Nd nambur yima yuhumpno nanhu waskfot kfiwuko?”²⁰ Ror inji kfomotr, tfit met yindarim sinyahato kfo memomr, “To frohm waskfot kfiwamn? Nine ka womhtet kmi yarhr mthu nawohtrn inji kfo mumiwun.”²¹ Rom inji kfomotm tfit Jisasr kfo memorm, “Na Sabat yiha wom mirakerkfot hingrnamotant, niko to htihato tuha yafotha duhatko rhumoko.”²² To niko Mosesrhu nkifra boririfhu mrokfot nkifra tha pukneft yak hikwakomn womnam Sabat yihamn yonroh tham pukwokomm. Nd tha pukneft nhai be Mosesrn buha wahtakmorm nd hingrneft. Nhai. Bingot bi nikmoh nkiframpno rihingrnakmomt nd hingrneft.²³ Nikmoh nkifra tha puk yuhah Mosesr kfomot nhai yafhokahkomt. Yonr nurneft 8-yuk marrn tha pukwokomm. To Sabat yiharn nd yonrhu tha puk yihar rhuneft nhai mekahko, ‘Afo Sabat yihar rhunihato tfit ndwom yiha tha pukrahnomr.’ Nhai inji nakahko. Nd Sabat yiharn tha pukwokomr. To tfit tamohmpno na Sabat yiha wom yimar yak marnyamotanr niko kfo namburwako?”²⁴ Mirahko be nyingaye htuyuk tamoh tamoh nefm htihato bmbri mrokfom tubatu furakninomm. Afo hti nhta yak nhta marnyahato ee btn mrokfom tukfot.”

Met yindarim memom, Jisasr ahti hiknomr, tu Kraismifer?

²⁵ Jerusalemrhu wom met yindarim nd Jisasr pthamo mrokfom wanyhato kfo memom, “Ka nda yimarn Judaroh bro tohak yimam

^j 7.21 Nd Jisasr kfomo mirakerkfot ka nd Betesdathu yuk bfar hingrnamo mirakerkfotn kfomom. Nd tndh mrokfot htikfot Jon 5.1-18 kfotn yo tfit htikfot Kisim Bek 31.14-15 kfotn.

kangm awasnom? ²⁶To nd yimar to asor nda yonmari yima rifiny buhar pthiwohat, to nhai wom rpa yimar kfo wokkahrr. Nhai. Ka ror pthiwohat, ka rorhu mrokfom wany nhtiwamn ka duka kangm asor met yindariroh minrfa htikyayuk yimar Bro Nkifrar htangotmor. Ka inji dukewamn nhai kfo wokkahmr?” ²⁷To tfit wommn kfo memom, “Nd niko kfiwa tngr hifa. Tmift nd niayuk yima Kraistr nhai wom yimar tawisafruhattr rorhu trha yuhat. To nda nom kfo pthiwa yimar ror nom tawisafwonomt rorhu nia yuhat.”

²⁸Jisasr Bro Nkifrarhu temper kmifar tohato met yindarim kfo yahrnya memom, “Niko ka duka kangko ka tawisafwokma yo nanhu trha yuhat ka tawisafwokomt? Nanhu nia nmbuhat, nhai na be tukanhu fijo niarmoya. Tu Yifem mifr kfo tkrurmotra niamoya. Niko nhai tawisafkakhomr. ²⁹Na, na tawisafwanr. Na rorpno toh tanymoya. Rorn kfo tkrurmotra niamoya.” ³⁰Inji kфомotr rom wanyhato memom, “Ayaknomr.” To nhai. Tafi rorhu yak yihar bi niarmor, to be nhai wom yimar bi yakaknirmorr. Nhai.

³¹Bok met yindarim rroh bro dukefm Jisasrn yihato kfo memom, “Ka asor nd yimar met yindariroh minrfa hbhakyuk yimar Bro Nkifrar kfo tkrurafmor. Ka rorn nd Kraistr hingrnayuk mirakerkfom mfro hingrnewur.”

Bro Nkifrarhu temperrhu tohukatohyuk polism Jisasrhu yakt yimo yuhat

³²Yimam nd Jisasrhu hingrnfroh mrokfom nhowi nakfo nuhas nakfo nuhasmoatm, Farisim wanymom. Wanyhato memom, “Jisasr myakhato kalabus htarahnomr.” Ndnettn romi prisroh bro yimam yihato Bro Nkifrarhu temperrhu tohukatohyuk polism kfo tkrurafmotm rom yimom. ³³Jisasr kfo memor, “Na be inji dfik yiham tohno tanyrhoyanko tfit yiruha tukia kfo tkrurafyuk Yifemrhu kmiko. ³⁴To nd yiha yak hambro hasorahkma, to nhai htirhotkma. Nd na yiruha kmit niko nhai yiruhatkomt.” ³⁵Be Judam inji wanyhato tum rinakfo nakfo memom, “Bar yimako, fitohko yiruhatr nom hti hambro hasoruhanom? Ka ndu nmoh wom yimatm kantri Grikko tohyukmpno yihato ndkorhof yimam mrokfom hirahr? ³⁶Yo kfo kangrnom, ‘Yak hambro yak hambrorahkma, to nhai htirhotkma.’ Yo tfit wom kfot kfo kangrnom, ‘Na yiruha kmit niko nhai yiruhatkomt.’ Tone finji dukahato inji kfiwarnom?”

Tu yafothet bu yinhar bupam mfrfnah hasoruha yuhat

³⁷Nd lotu burwa yiharoh wuroh tikofhna yihar ndr tu bro yihar rhumoumr. To nd wuroh bro yihar rhumorn Jisasr wasinyahato kfo yahrnya memor, “Ni fitoh yima nyunguram knewun, nanpno waniekahtn, bupam hiruhann. ³⁸Mrokfot Bro Nkifrarhu rfa borngt yorhwat to inji

kfo kangt, yimar nanhu mrokfom wany yakiohato hikwar, rorhuko tu yafothet bu yinhar bupam be mfrfnah hasorahm.” ³⁹Nd Jisasn kfofomotr, ndt yimam rorhu mrokfom wany yakiohato yakruha Bro Nkifrarhu Yafothat, ndtn kfofomotr. Nd yiham Jisasn tafi nohhato sinyu duhatrn ndnetn Bro Nkifrarhu Yafothat nhai bi yimam hermorm.

Met yindarim nayak mkumo yuhat

⁴⁰Wom met yindarim Jisasn kfofomotr mrokfom wany nhtahato kfo memom, “Dajohmn, ka asor nd profetr Bro Nkifrar kfo tkrurkfofomotr.” ⁴¹Womm waruhato kfo memom, “To tawom ndr. To nd yimar Bro Nkifrar kfo memo, yimaroh minrfa htikyayuk yima Kraistr nierahr.” Tfit womm waruhato kfo memom, “Nheno. Ror arhur to nhai Galili yuhat niarmotr. ⁴²Bro Nkifrarhu rfa borngt bi kfo hta memotr, ‘Kraistr nianeft tu Defit frikef yuhatn nieruharn Defitrhu taun Betlehemtn minurrah.’” ⁴³Be ndtpno rinakfo nakfakhato nafak mkumom. ⁴⁴Womm wasinya fnahhato memom, Jisasn ayaknom, to nhai, nhai womr tir htarmorr.

Judaroh bro tohak yimam Jisasn kfofomotr mrokfom nhai wany yakiofomotr

⁴⁵Nd temperr tohukatohyuk polism tfit yimomtr prisroh bro yimami Farisim kfo ttiwonak memom, “To tamohmpno nhai yakna duha yirfokomr nd yimar?” ⁴⁶Inji kfo ttiwonakmotmm tfit kfo memom, “Nhai wom yimar ror pthiwa kanjohot mrokfom kfo pthakahr. Nhai.” ⁴⁷Tfit Farisim kfo wok memom, “Ka kfo nheh bonhehmorko? ⁴⁸To htitkmnom nom Farisinomi Judaroh bro tohak yimam wany yakiofomotr nd yimar? Nhai mif. ⁴⁹Yimam rorhu mrokfom wany yakiohato hikwam, nd yimam boririfhut yakitoh duhatm, romn wany yakiofomotr. Bi Bro Nkifrar yak tutfakfofomotr nd yimam.”

⁵⁰To Farisiroh womr, rorhu yufat Nikodemusr, ror bingot bi Jisarnpno yihato naphthetfn, ndnat womm pthamohat tfit ttiwon memom, ⁵¹“Nmoh nkifra boririfhut nhai inji kfofokot, wom yimar tafi rorhu mrokfom wany hik marnya duha, be bmbri finji naknikfofomotr.” ⁵²Ror inji kfofomotr tfit rom kfo memom, “Bare, nine rorhu kmi Galili thofe? To wahtint Bro Nkifrarhu rfa borngt yorhwa mrokfofomotr. Mrokfofomotr nhai kfo mekaht wom profetr Galili profinsn nierahr. Nhai.”

Wom ramet mett ijoh yuhat yimomtr Jisarnpno hanyomotr

⁵³Nd nia rifiny hanyuk yimam bi turoh kuny kmifako yi hanyomotr.

8 ¹To Jisarnpar afo tuha rhu hasohato tfit yura Olifet kmit muhmom. ²Tfit bi dbha ksfut yohnemom Bro Nkifrarhu temper kmifar yimom. Met yindarim yimomtr rhu hasetrn rifiny hmbremomtr. Be Jisarn waruhato mrokfom hemomtr. ³Met yindarim mrokfom he hasetrn

wom boririfhuthu tisami yo Farisim wom ramet mett wom yima furar yimoatt rom htihato yaknimomtn nd met yindar rifinyrpnno mhatohmomt.

⁴Mhatohhato Jisasr mkfo memomr, “Tisaye, nda mett wom yimarpno fasoh neft na hasettn hti nriyafaknimomt. ⁵Mosesr yakitohyuk boririfhuthu inji kfo kangt, wom mett ndhtet nefet nem be tahiye tahiye frdbofna nohkfot. To nom inji na thombat ni finji kforuha?” ⁶Nd rom kfo ttiwonmo mrokfot be yuwi memom, “Inji akfo ttiwon rhtikahnomr finji kfiwure, nd ror kfoyuk mrokfot nom tohhato yakrahnomr.” Rom inji kfo ttiwonmohat, Jisasr nhai mfhat kasinyarmort. Ror bbinysoft tario-bttahato bbinysoft tir pinyafe wandfa-mour.

⁷Masat masat ttiwon hasuknamoatmr Jisasr wasinyahato kfo memorm, “To niko ndar tohwako nhai womr wom fasoh neft narmor ee rorn ndar mett barkof tahis atutwart.” ⁸Ror inji kfonimormn tfit nyingatiktt bbinysoft tariobttahato tir pinyafe wandfamour. ⁹Be rom nd mrokfot wanyomomn be mrokfo kfo duha mrokfo kfo duha fnahni hanyomom. Nd bro yima boyimat tohak gngonmotm, ee bt wom womt rifiny hanyukm mongtn fnah yakitohmom. Jisasr turpar tariobt hasetr htanyomomr. Mettne rorhu nyingatikko tohmout.

¹⁰Be Jisasr mfhat kasinyahato nd mett kfo ttiwon memort, “Ndasha tohhasi yimame bi fitoh yuhat yitam? To nine frohm tohhato ni nayuk nefm kfo pthiwamm?” ¹¹Be inji kfomotrt tfit kfo memotr, “Bro yimaye, to nhai womr.” Tfit Jisasr kfo memort, “Na nhai finji kforhotann. Wain. Waikahnn mirahn tfit wom fasoh neft anaya.”

Jisasr ndar bbinysoft yak nukewa ksher

¹²Jisasr tfit kfo memorm, “Nann nukeft hatohhato nda bbinysoft kak nukewant. Fitoh yimam nanhu mrokfot wanyhato hikma, rroh nda bbinysofthu toh yuham yi marnyarahm. Nhai yifungt yau mmo bommiwa kanjo yau mmo bammoruhatn.” ¹³Wom Farisim nd mrokfot wanyhato Jisasr kfo memomr, “Ni be tunhu hingr nefroh mrokfomi yo tamoh tamoh nefroh mrokforpamn kfo ptha srhwon. Ndnatn met yindarim nhai nd ni pthayuk mrokfom wany fugha-ruhatmm.” ¹⁴Rom inji kfomotm tfit Jisasr kfo memorm, “To hifa inji kfo kangko, na be tukianhu tamoh nefroh mrokforpamn ptha srhwa. Na, na sinya tanyuk kmir na tuka tawi-safwanr yo na yiruha yuhat na tuka tawisafwant. Ndnatn nanhu toheft kfo ptha yimbu hikwant. To niko nhai tawisafkalkomt nanhu kmit yo nhai tawisafkalkomt na yiruha yuhat. Ndnatn nanhu toheft niko nhai hti hikkfot. ¹⁵Niko kak nhtewukma ndar bbinysofthu yimam yak nhtewa kanjo. Na, na nhai inji wom yimarhu nefm htihato kfo pthakaha. ¹⁶To na kanga wom yimarhu nefm htihato akfo pthaya, nhai turpeta kfo pthakaha. Nhai. Nd na kfo tkrurafmo Yifemrpnno tohhato nonn kfo pthewuno. Ndnatn nd na pthayuk mrokfom met yindarim wanyneft rom wany yakiorahma. ¹⁷Mosesrhu boririfhuthu mrokfot inji kfo kangt, ‘Wom hus yimaf kfo srhyuk mrokfom be

rpa yuhat mrokfom kfo hikfm, be nd mrokfot tu kfo mif kfoyet.' ¹⁸Na tukianhu hingrnfroh mrokfo yuham kfo ptha srhwam, na tkrurafoyuk Yifemr to be na kfiwa yuhatn kfo hikworm."

¹⁹Be Farisim inji wanyhato ttiwon memomr, "To nd ni kfiwa yifemre fitha yorhwar?"

Tfit Jisasr kfo memorm, "Na nhai tawisafkakhma, nhai nanhu Yifemr niko tawisafkfot. Na tawisafrahko, nanhu Yifemr tawisafrahkomr."

²⁰Ror nd mrokfom met yindarim kfo hemohat temper kmifarn brbo ofa maruham htamoa tkittpno mrokfom hemorm. Tafi rorhu yak yihar bi niarmor, ndnetmn nhai yimam sinyarmom rorhu yakneft.

Jisasr kfo memor, "Na yiruha kmit, niko nhai yiruhatko."

²¹Met yindarim Jisasr wompam tfit kfo memorm, "Na frtrohruhanko.

To niko yak hambro hasorahkma. Niko tukmoh fasoh fasoh nefm nahaso nahasoruhakomn nohrahko. Nd na yiruha kmit nikom nhai yiruhatkomt."

²²Judaro bro yimam nd Jisasr kfomo mrokfot wanyhato tum rinakfo nakfo memom, "Bar yimako, to tamohmpno kfo yamukarnom, 'Niko nhai yiruhatkomr nd na yiyuk kmir?' Nd mrokfote finji dukahato inji kfirt? Ka turn yak nadborrahr?"

²³Rom inji kfomotm tfit Jisasr kfo memorm, "Niko ndar bbinysoft watohyukeko. Na yura hefenr wutohyuka. To na mirahko ka nda bbinysof thofa. Nhai. ²⁴Na kfo famuyanko, niko tukmoh fasoh fasoh nefm na hasoruhakomn nohrahko. Niko nhai kfo miruhatkoma, "Tor Bro Nkifrarhu kfo tkrurafyuk yimar.' Ndnetn na kfiwanko, niko tukmoh fasoh fasoh nefm na haso-ruhakomn nohrahko."

²⁵Kfo ttiwon memomr, "Bare, nine frohe?" Tfit Jisasr kfo memorm, "Na bi asonhof rikfo nuhasakmoyanko. ²⁶Na nd niko niwa nefmpno bok mrokfom kforfoyanke yo jasm kanjo ruhato nikmoh nefm yak nhta-herfoyanke. Tmift na nhai be nanhu dukefrn na tamoh tamoh mrokfom kfo pthakfot. Na, na be nd na kfo tkrurafyuk Yifem mirru tng yuhatn hikhato ndar bbinysofthu yimam mrokfom kahukanm." ²⁷To rom wanymohat nhai duka marimom, "Jisasr ka Bro Yifemrn kfiwurnom."

²⁸Ndnatn Jisasr kfo memorm, "Na Bro Nkifrarhu kfo tkrurafmohat, kto niko na Bro Najoma yura bgre mishu wuhta yiharn, nd yiha nyingam yoh dborhahato hti dukarahko. Yo hti hikrahko, na nhai wom neft be tukanhu dukefrn hingrnakaha. Na Yifemr kfo htiwa yuhatn hingrna hikwa. ²⁹Na kfo tkrurafyuk Yifemr toh tkafwora, nhai frtrohhato turpetrpaya yak mmbrafinykaha. Nhai. Na niwa nefm tur hti yindhorwa nefm na hikwa, ndnatn nhai frtrohkahra." ³⁰Bok met yindarim nd Jisasr kfo pthamo mrokfot wanymohat rroh bro dukefim rorn htamom.

**Nd tu yafothet mrokfot met yindarim mhti hikakruhamtn,
nd fasoh fasoh nefm frtrohhato frfnahrahm**

³¹Be nd Judam, Jisasrhu mrokfom wany yakiwetm, kfo memorm, "Niko nanhu mrokfot yakitoh kihrahkomt, be nanhu disaipar mifko

rhurahko. ³²Nanhu disaipar mifko rhuhatu nd tu yafothet mrokfot mhti hikakruha-komtn be nd mrokfotn nd niko kihmbre htatewa fasoh fasoh nefm yafhohato frfnahrahko.” ³³Be rom nd mrokfot wanyhato kfo memom, “Nom Abrahamrhu frikef yuhathu yonenom. Nom nhai wom yimarhu yinhitn hingeru hafknekahnom. To tamoh dukeftpno kfo yangannom, ‘Tfit frfnahrahko?’ ”

³⁴Jisars kfo memom, “Na kfo mifwanko nda yima yimat fasoh nefm niwam, rom be turoh fasoh nefm kihmbre htatewumm. ³⁵Wom slefr wom ripharpno tohwohat, nhai be rompno rim tohnihatu rorhu yufat rompno rhukaht. Nhai. Be hingernefroh hingeru hanyeftn tohekworm. Tu nasak yonrpar yifammaroh yufampno korhr. ³⁶Ndnetn bi Yinem Yonrn nd fasoh fasoh nefm mtitikt kanjo kihmbritayukm bi frtmbho tebikr trufekrko, to be niko nhai wom fasoh nefm kihmbrekahmko.

³⁷Rot to niko Abrahamrhu frikef yuhayet. To tmift nanhu mrokfot nhai rhukahtko. To ndnetkomn nanhu wasneft waji yaukma. ³⁸Na kfo pthiwa mrokfot na tukianhu Yifemr kfo hta bohtayuk mrokfo yuhamn kfo ptha hikwa. Niko rot tukmoh yifemr kfo nuhasyuk mrokfo yuhamn hikwoko.”

³⁹Judam nd Jisars kfo pthayuk mrokfot wanyhato tfit kfo memomr, “Abrahamr to nmoh nkifrarer.” Tfit Jisars kfo memomr, “Niko tu Abrahamrhu frikef yuhathuko arhuko, to be nd ror namo nef yuham yak hikrfoko. ⁴⁰Na kfo pthiwa mrokfom, na tu Bro Nkifrarhu tu mrokfo mifm kfo pthiwa. To tfit kangko awasnomr. To ndt nhai tu Abrahamrhu neft hikkahko. ⁴¹Nd niko niwa nefm, ndm niko tukmoh yifemrhu yuhamn kak hikwoko.” Tfit rom kfo memomr, “Nmoh mmemrom nhai ijoh tonehato hiyaurmomnom. Nhai. Nmoh yifemr, to Bro Nkifrarpar.” ⁴²Rom inji kfomotm, tfit Jisars kfo memomr, “To na to froha? Na to rorpon wusinya tanyhato niayuka asha tfit nia tohwa. Niko tu Bro Nkifrarhu mifko arhuko, to na yakrfokma nikompno tohrfoya. Nanhu nia nmbuhat, nhai na be tukanhu fijo niarmoya. Tu Yifemr kfo tkrurmotra niamoya.

⁴³To tamohmpno na pthayuk mrokfo yuham wany hik duha yitakomm? Ndt nhai be sfno. Nanhu mrokfom nhai wanyruhatakomm. ⁴⁴Niko tukmoh yifem Satanrhu yonkomn kangko tukmoh yifemrhu dukef yuhatn ahiknom. Bingot to frohmn yima wasmoam? To ror yima wasmoarn nhai tu mrokfot yakitoh-rmoar. Yo yima kfo nhehneft to frohm yifemmoamt? To rorn yifemmourt. Ror nd neft bi mhatoh fnahmort. ⁴⁵Nd na kfiwa mrokfot tu yafothet mrokfot kfiwanko, to niko Satanrhu yonkomn nhai wany yakiokahkma. ⁴⁶Ka na fasoh nefm nayet yimayann nhai wany yakiokahkma? To niko inji duka thoft, to bt wakfo nuhaskma na niwa fasoh fasoh nefm. To na tu yafothet mrokfot ptha thoft, to tamohmpno na pthayuk mrokfom wany yakio duha yitakomm? ⁴⁷Bro Nkifrarhu yonm Bro Nkifrarhu mrokfom wanukwomm. Niko nhai ka tu Bro Nkifrarhu yonko rhukahko, ndnetkomn nhai rorhu mrokfom wanykahkomm.”

Jisasr kfo memor, “Abrahamr tafi trha duha na bi inji rhungotmoya.”

⁴⁸Tfit Judam sinyahato Jisasr kfo memomr, “Nome ka kfo mifwonom nom kfo yamukahat ni Samaria thofnn kmi yarhr thu hamumiwurn?”

⁴⁹Rom inji kfomotm tfit Jisasr kfo memomr, “Na nhai wom kmi yarhr thu hammokahra. Na tukianhu Yifemrhu yufatn wuyuta grhiwota, to tfit nikomn nanhu yufat yiro wahtewukomt. ⁵⁰Na nhai be tukianhu yufatn yura yura htakaha. Tor wom yimar, rorn nanhu yufat yura wuhtarhra, ror jaser. ⁵¹Na kfo mifwanko, wom yimar nanhu mrokfot wanyhato yak hikrahrt, nd yimar nhai nohruhatr. Be tu nhai mif.”

⁵²Tfit inji kfomotr Judam kfo memomr, “To nom bi wany nhte-wunomn ni ufasohtet kmi yarhr thu hamumiwatrn bi kfo mmo bamumiwun. To Abrahamr Bro Nkifrarhu mrokfom hiketr to nohmr, yo profetm Bro Nkifrarhu hayuk mrokfom kfo pthamoam to nohmom. To tamohmpno tfit nom kfo yangannom, ‘Wom yimar nanhu mrokfot yak hik marnyarahr, nhai nohruhatr?’ ⁵³Bar yimako, ka tu inji kfiwohat ka kangn nanrpaya tu bro yufeta. Ka nohmo nmoh nkifra Abrahamri profetme ka nhai yima furayem?”

⁵⁴Tfit Jisasr kfo memomr, “Na be tukianhu yufat yura wuhtayant, nanhu yufat fipa duhatt rhurfot. Tu hifa nanhu Yifemr, nikmoh Bro Nkifrar, rorn nanhu yufat wuhtamort. ⁵⁵To niko rorhu ruheft nhai htirmokomr. Na awi htiyeta rorhu ruheft. To na tfit kfo miruha, nhai htirfoyanr, to be niko kanjo kfo brurmaha rhurfoya. Na bi rorhu ruhefm hti hiketann to be ndnatn rorhu mrokfom kak hik marnyewanm.

⁵⁶To nikmoh nkifra Abrahamr dukamohat nanhu nia yiharhu htineft, ror yindhormor. To na niahato turhu nyingaye htimohat, yima yuhur mirhumorr.” ⁵⁷Judam nd mrokfot wanyhato Jisasr kfo memomr, “Bare, ni tafi 50 gunyjim duhaye, to finji kanjo htiyafmonr Abrahamr?” ⁵⁸Tfit Jisasr kfo memomr, “Na kfo mifwanko, Abrahamr tafi mmemt hiyau duharn, na bi inji rhumoya.”^k ⁵⁹Rom inji wanyhato tahim yakmomn memom, tahiye frdbofna nohnomr. To nhai, Jisasr nhofijo temper kmifar htanymorrn fnahnimor.

Nyinga kunyjet yimarhu mrokfot

9 ¹Wom yiha Jisasr wiyauyau hanymorn nyinga kunyjet yimar mhtimorr. Mmemt ror hiyaumohat bi inji nyinga kunyjetrn hiyaumotr. ²Jisasrhu disaiperm nd nyinga kunyjetr htihato ttiwon memomr, “Tisaye, frohmn fasoh fasoh nefm namotm nyinga kunyjetr mmemt hiyaumotr? Nd tu yimarn fasoh fasoh nefm namotr o yifammafn fasoh fasoh nefm namotf nyinga kunyjetr rhumor?”

^k 8.58 Jon 8.24 htikfot.

³Tfit Jisasr kfo memorm, “Nhai ndar yimar wom fasoh neft narmor yo nhai rorhu yifammaf wom fasoh neft narmof. Nhai. Nd yimar inji rhumohat Bro Nkifrar memor, ‘Nanhu hingrneft rorpno tafont mhfnahrhotant met yindarim htirahmt.’ ⁴Na Bro Nkifrar tkrurafmotra fawihnamoya. Nda mar nukar yorhwa fijo nom Bro Nkifrarhu hingrneft hingrnakfot. Kto tfit mirkahtt yifung tiwa, yimam nhai wom tamoh hingrnefm hingrnaruhatmm. Nhai. ⁵Na afo nda bbinysoft tohhato nann nukeft bbinysoft kahukant.”

⁶Jisasr inji kfonimorn bbinysoftn wabruktumor. Wabruktuhato nd brukpami bdrpam rpat yaktk botkak-mormn nd nyinga kunyjet yimarhu nyingamn rifak yenyomor. ⁷Riyak yenyafhato kfo tkruraf memorr, “Siloam bujr warim yuk trufafont nd bdr yenys.” (Nd yufa Siloamthu yimbu yuhat inji korht: Kfo tkrurafkfot). Be nd nyinga kunyjr yimorn fuk truf thumorm nd nyingaf thu yenyomo bdrpam. Rim yuk truf tanyhato tfit kmifako yimohat nyingam bi yukatohetm kmifako yimor.

⁸Nd nyinga yukatohetrhu kmi thofmi yo ror barkof afo nyinga kunyjetr rhuhato buha yihota yuham rhu hasohato met yindarim maruha wuskam tndaumoam, htimomrn tum rinakfo nakfo memom, “Barenko, nd yimare ka ndu yihotam rhu hasohato maruha wuskam tndaumoa yimayer?”

⁹Womm kfo memoum, “Uwa to tawomer.” Tfit wommn kfo memoum, “Nhai. Arr womer. Rpahtet ruhetfn inji hti mumiwunomr.” Tfit turn kfo memourm, “Nhai womm, to tawom naya.”

¹⁰Tfit rom ttiwon memomr, “To nyingam finji netnm yukatohwanm?”

¹¹Tfit ror kfo memorm, “Nd rom yutiwa yima Jisasr, rorn brukpami bdrpam rpat yak yeny boyenyakhato nanhu nyingam nde yak yenyafhato kfo tkrur famura, ‘Siloam bujr waikahnn nyingatikt wayuk truftwant.’ Inji kfefitra na yihato tek bujr nyingatikt yuk trufhat, be nyingam rifukatoh-ekanm.” ¹²Tfit rom ttiwon memomr, “To nd yimare fitha inji yorhwar?” Tfit ror kfo memorm, “To na nhai tawisafkaha.”

¹³Be nd yimar yaknimomrn Farisimpno hanymomr. ¹⁴Jisasr nd yimarhu nyingam brukpami bdrpam rpat yak yenyakhato nyingam htahato nyinga yukatohmohat, nd hingrneft Sabat yihar hingrnarmort.

¹⁵Farisim-pno hanymotmr tfit romn wompam ttiwonmomr rorhu nyingam frdbtakmo yuhat. Tfit ror kfo memorm, “Rorn brukpami bdrpam rpat yak yenyakhato nyingam htitra tfit bujko yihato nd yak yenyafyuk bdrpam yuk truftanm nyingam frdbtakma.” ¹⁶Be wom Farisim inji wanyhato kfo memom, “Nd yimar Sabat yiharhu boririfhut nhai yak hikkahrt. To mirahko ka Bro Nkifrar kfo tkrurafmotrr niamor. Nhai.” Tfit wommn kfo memom, “Yimar, ndhtet mirakerkfom nayetr, to finji kanjo ufasoh nefm hingrna-rform?” Rom tum inji rinakfakhato nafak mkumom. Womm Jisasrpno tohmom, womm rom tum inji tohmom.

¹⁷Farisim tfit wompam ttiwon memomr, “Ninhu nyingam yak marnye yimare, ni finji dukiwanr?” Ror tfit kfo memor, “Nd yimar, ror profeter.”

¹⁸Nd Judaroh bro yimam nhai marimom, nd yimar tu nyinga kunyjetr rhumotr nyingam marnyamomr. Nhai. Memom, fura kfoyet. Ndnnetmn tfit nd yimarhu yifammaf nakuyakmomf. ¹⁹Be rof niamotf ttiwon memomf, “Nifn wakfofn. Ndarre nifnhu yoner? Mmemt hiyaumohate ka bi inji nyinga kunyjetr hiyaumotr? To finji netr rorhu nyingam bi yukatohwarm?” ²⁰Be nd yonrhu yifamma sawohf kfo memof, “Nda yonr nnoher. Ror nurmohat nyinga kunyjetr nurmotr htimononr. ²¹To nda rorhu nyingam frtrhahato yukatohwa yuhat nhai tawisafkahno, yo yimam rorhu nyingam yak marnyayukm no nhai tawisafkahnonm. Turn wattiwonkahtko kfo ptha nuhasahrko. Bi bro damiager turn ptharahr.” ²²Nd yonrhu yifamma sawohf bi Judaroh bro yimaroh yima yuhum bi tawisafetfn to mrokfom kfo pthamohat tfit kfo memof, “Tu yonrn kfo ptharahr.” Bi Judaroh bro yimam kfo hta memom, “Frohr kfo kangr, Jisahr tor nd yimar ndar bbinysof thofroh nrfa htikyayukr. Inji kfoyuk yimar nhai nom Judanmoh lotukfot rhunho hakuruhatrn.” ²³Yifamma sawohf bi nd mrokfot bi wanyetfn to be tu yonr kfofom mrokfo kfo pthaneft.

²⁴Tfit wompam nakumomr nd bi marnyaniet nyinga kunyjr. Tfit wompam yimotr kfo memomr, “Ni Bro Nkifrarhu nyingampno wakfo miftwannom ni asomif tfit kfo pthiwohat. Ni nd barkof kfi yimar nom tawisafwonomr tu fasoh fasoh nefm nayet yimayer.” ²⁵Inji kfofotm, tfit kfo memomr, “Yo ka, ndhtet ufasoh nefm nayeter? Ndm na nhai tawisafkaha. Na tawisafwat akfo nuhasanko. Bingot na nyinga kunyjeta rhu hnamoya, tfit ariha na bi kukatohwa.”

²⁶Tfit rom ttiwon memomr, “To ror finji namorn? Finji namotr ninhu nyingam yukatohwamn?” ²⁷Tfit kfo memomr, “To bi kfo nuhasanko. Kfo nuhastanko nhai wanyrfoko. To tamohmpno kfo yamukako, ‘Wompam awany hatohnom?’ E, kangkone, ‘Rorhu disaipenko arhunom?’ ”

²⁸Farisim inji wanyhato kfo memomr, “Arom rhupete, tfit nomn yari yutewun. To tunn rorhu disaipere. Nom nndoh Mosesrhu disaiperenom. ²⁹Nom wany hnamo mrokfot Moses-rpar Bro Nkifrar pthamorr. To nd yimare fitoh yuhat niamotr nom nhai tawisafkahnomr? Nom mmiwunomt rorhu nia yuhat.” ³⁰Be nd yimar kfo wok memomr, “Nd niko kfiwa mrokfot be tu nndohtet hnomha mrokfot kfiwuko. Nd yimar nanhu nyingam yak marnyamomr mumiwukomt rorhu nia yuhat. ³¹Nom womt htinom Bro Nkifrar nhai wanyhekahrm fasoh fasoh nefm nayet yimaroh mrokfom. Yimar Bro Nkifrarhu yima yuhur ruhato rorhu dukefrn hikwar, tor nd yimar tamoh mrokfom Bro Nkifrarprno kfo pthaneft wanukrr. ³²Bingot mifn nmoh nkifram toh hnamompno nhai wom tndhkfot wanyrmonomt, kfo marimom wom yimar mmemt nyinga kunyjetr hiyaumotr, kto tfit wom yimarn wom hingrnefm hingrnamotr nyingam frtrhahato fukatohmor. Nhai. ³³To Bro Nkifrar akfo tkruraf duha yirr nd yimar to nhai wom tamoh nefm narfotrm.”

³⁴Farisim nd mrokfot wanyhato kfo memomr, “Ni wanurtamohat fasoh fasoh nefm bi rpat mihasuhmonm. To tfit frohm yamuka akfo tebosa?” Be inji kfohato nd rifiny kunyr toh hasetr fak tuhafmomr.

**Yimam, Bro Nkifrarhu mrokfom yak hik duham,
nyinga kunyjet yimam kanjo korhm**

³⁵Judarah bro tohak yimam nd yimar yiro rifinyuk kunyr ruhetr yak tuhafmotmr Jisasr inji wanyhato fak hambro hanyomorr. Yak hambro hanyhato mhtimorrn ttiwon memorr, “Ni Bro Najomrhu dukefrpno korhn o nhai?” ³⁶Tfit nd yimar kfo memor, “Bro yimaye, nd ni kfiwa Bro Najomr to froher? Wakfo nuhaskahtna nanhu dukefr be rorpno htaruhanr.” ³⁷Tfit Jisasr kfo memorr, “To bi htitwonn. To nd ninpno pthiwa yimayer.” ³⁸Tfit nd yimar kfo memor, “Broye, nanhu dukefr ninpno htewanr bi.” Be inji kfonihato Jisasrhu wurampno mtabokmehato mfhat wasimort.

³⁹Jisasr kfo memor, “Na nda bbinysoft niamohat nda yimam niwa fasoh fasoh nefroh tafonthu yak htaneftn niamoya. Ndnnett met yindarim, nyinga kunyjetm yorhwam, tfit yukatohhato nann hikrahm. Tfit nd nyingetm, rom tfit nyinga kunyjetm ruhato yau mmo bammorahm.” ⁴⁰Wom Farisim Jisasr pno tohetmn Jisasr nd mrokfot tumohat kfo ttiwon memomr, “Nome ka rpat nyinga kunyjetenom?” ⁴¹Tfit Jisasr kfo memomr, “Niko nyinga kunyjetko warhuko, to nhai wom tamoh mrokfoyetko rhurfoko. Nhai. To tfit tukomn kfo kangko, ‘Nom hifa dborioh nyingetenom.’ Ndnatn niko nayuk fasoh nefm tom afo korhmko.”

Jisasr sifsifroh tu dborioh tohukatoher

10 ¹Jisasr tfit wompam kfo memor, “Na kfo mifwanko, yimar nhai nd sifsifm yorhwa gnathu yifhatik yuhat rim fnahnikaahr, be turn buha gnat muhnihato miftohnir, ndhtet yimar rikoh yimayer. ²Yimar tu yifhatik yuhat rim fnahnitar, ndr tu sifsifroh tohukatoher. ³Nd sifsifroh gnat tohukatohwa tohukatohr yifhatikt yak tfanyekwatrr rim fnahnitr. Sifsifroh yufam yutahato nakuneft rorhu tngtn wany tonitatm kak hfhanwatrm fnahnitm. ⁴Sifsifm rim hfnahti thombat turn hatoheworm. Sifsifm bi rorhu tngt wany nhtetmn be rorn kak hikwom. ⁵Rom nhai wom yima furam hik furakfot. Nhai. To wom yima furar nakuneft wany kakrmitmr. To rom nhai wom yima furaroh tngm wany tonekfot.” ⁶Jisasr nd kfo nhombra mrokfot kfo pthamohat rom fak mmotamomt, nhai yakrmomt. ⁷Ndnatn Jisasr kfo memomr, “Na kfo mifwanko, nanrpaya nd sifsifroh rim fnahni yuhathu yifhatika. ⁸Ndwom womt nanhu nyinga yuhat tohak hanyukm, rom rikoh yimayem, wuska teh hbotfayet yimayem. To ndnatn sifsifm nhai rroh tngm wany tone-rmoamm. ⁹Na, na tu yihota rim fnahni yuhaya. Yimar nanpno nierahr, Bro Nkifrarhu tirmn

rhurahr. Nhai wom tamohm finjina finjinaruhatmr. Yarim fnahna rim fnahnihato ye wussoh htfas hakurahr.

¹⁰Rikoh yimar nianeft ror nhai wom tamoh dukefrpno niakahr. Nhai. Ror be nd sifsifroh yak rikohhato was yenyeftn niewur. To na niamohat, nhai nd dukefr niarmoya. Na yimaroh toh marnyaneft dukahato niamoya. Yimam nanpno tohhato be nhai tfit wom tamohm yak hambroruhatm o dukaruhatm. ¹¹Na, na sifsifroh dborioh tohukatoha. Dborioh tohuka-tohr inji niewur, ror turn rorhu sifsifroh tamoh nefm mfha htewurm. ¹²Yimar be maru dukefrn hingrna-neft, nhai sifsif tikat mifr tohukatohwa kanjo sifsifm tohukatohkahrm. Nhai. Yifako tohwa yaum htiyakneft sifsifm yakrme htanyrahrm. Yakrme htany-ruhatri yifakorhof yaum niahato sifsifm ye jborfahato rpa rpa hik tubaturahmm. ¹³Nd yimar inji nayukr rorhu dukefr be maru hingrna dukefrparn korhrr. Rorhu bro yima yuhur nhai sifsifmn rhukah.

¹⁴⁻¹⁵Na tukia sifsifroh tu dborioh tohukatoha. Nanhu Yifemr na tawisafwora. Ror na inji tawisafwa kanjo na inji tawisafwanm nanhu sifsifm. Yo na Yifemr tawisafwa kanjo nanhu sifsifm inji tawisafwoma. Na sifsifm dukahato kanga anoha, nhai mrokfom. ¹⁶Tom nanhu wom sifsifm. Nhai bi ndarwom sifsifmpno bi tohkahm. Ndmn kanga aiyakkahanmn wom sifsifmpno rpat htahato nanhu tngt bi wany nhtarahmt. Rpat wom sifsifmpno htahato rpa tohukatohrpaya yakitohruhanm. ¹⁷Na, na be wofnwa mfha htahato tfit sinyaneft. Ndtпно nanhu Yifemr yindhori mifwora. ¹⁸Nhai wom yimarn nanhu yak nadborhato nohkfot. Nhai. Na be tukianhu fijo mfha htaruha. Na tukianhu Yifemr bi inji kfo htamora. Ndnatn kanga, mfha htahato tfit sinyaya, be inji naruha.”

¹⁹Judam nd mrokfot wanyhato tfit nafak mkumom. ²⁰Bok yimam kfo memom, “Kmi yarhr thu hamumiwattr inji kfo mumiwur. Tamohmpno rorhu mrokfom wany yakitohwakomr?” ²¹Tfit womm kfo memom, “Ndm to mirahko ka kmi yarh thu hamumet yimaroh mrokfoyem. Nhai. Kmi yarhm athu hammomr nd nyinga kunyjet yimar yak marnyarforr?”

Judam nhai hifa nyingam htarmoamr Jisasr

²²Bro frfon wormr tohmo yiharn Judam bro tofs Jerusalemko faki-tohmom. Nd tofs rom rhumot bingot Bro Nkifrarhu temperr Judam hingrnamohat nd yiha Bro Nkifrarhu tirtn nd temperr htamomr. To nd yihar tfit Judam rhuhatu rhu duka hanyomom. ²³Jisasr temper kmifar yihato Solomon yufet kuny mkur yihom fauyak mfauyakmour. ²⁴Yihom yauyak myauyak hasetrn Judam rifiny hmbriyaknihato kfo ttiwon memomr, “Nome ar nohof rigariyakronomn ninhu toh yuhati ninhu nia yuhathu kfo nuhasneft. Fitoh yiha kfo nuhas-ruhannom? Ka ni ndar yimann Bro Nkifrar kfo htamor yimaroh nrfa htiyakyukr?”

²⁵⁻²⁶Jisasr tfit rroh mrokfot kfo wok memomr, “Na to bi kfo nuhas hnamoyanko, to niko nhai wany yakiohahkma. Nanhu Yifemrhu yufat-

pno hingrnefm hingrnewohat niko nhai ndmn mhti nhtak mikahko ndr ndhtet yimayer. Niko to nanhu sifsifkonn btn wany yakiokahkma, niko wom nndoh yima furayeko. ²⁷Nanhu sifsifm awi nanhu mrokfom wany yakiowoma. Na tawisafwoyanmn nanhu mrokfom hikwomm. ²⁸⁻³⁰Toh nkifraniryuk yafothat yahukotanm nhai finjinaruhاتم. Bi tu nngrajohet Yifemr bi nanhu tirtn htayet yimam nhai wom yimar tfit nia yakruhاتم. Nani nanhu Yifemr nhai wom nndoh nndoh. Nnoh ruheft rpat. Ndnatn Yifemrhu tirtn bi ruhetmn nhai wom yimar niahato yakkfot.”

³¹Judam nd mrokfot mwanhato tfit tahim yakmomm memom, tahiye frdbofna nohrahnomr. ³²Tfit Jisasr kfo memorm, “Na fak nuhasmoyanko nanhu Yifemrhu bok dborioh dborioh hingrnefm. To fitohtn niko hti namburhato yangako afrdbofnanomr?”

³³Judam sinyahato tfit kfo memorm, “Nom nhai nd ninhu dborioh hingrnefm htihat tahiye frdbofnakfot kfokahnom. Nhai. Tunn kfo yamukatn, ‘Bro Nkifrarhu tkitt ayakant.’ Tot nd yuhatn kangnom, tahiye afrdbofna nohnomn. To ni be yima furann kangn, ‘Tfit Bro Nkifrar kanjo aruha.’ ”

³⁴Jisasr inji wanyhato kfo memorm, “Niko htiyeteko. Niko yakitohwa Bro Nkifrarhu yirmoht inji kfo kangt, ‘Na inji kfo memoyanko, “Niko Bro Nkifrar kanjo korhko.” ’ ³⁵Mrokfom, Bro Nkifrarhu rfa borngt yorhwam, nhai kfonihato tfit kfo kekutkahrm. Nhai. Bingotn bi Bro Nkifrar yimam mrokfom hemoahat inji kfo memourm, ‘Niko Bro Nkifrar kanjo korhko.’ To mrokfom, Bro Nkifrarhu rfa borngt yorhwam, nhai kfonihato tfit kfo kekutkahrm. Nhai. ³⁶Na tu Yifemr bi kfo htahato kfo tkrurafmotra nda bbinysot fawihnamoya. To ndnetann na tfit kfo yamukahat, ‘Na Bro Nkifrarhu Yinema,’ to tamohmpno wany namburhato kfo yamukokma, Bro Nkifrarhu tkitt kangr ayaka?

³⁷Na ndar tukianhu Yifemrhu hingrnefm nhai hingrnakahanme, ee btn nanhu mrokfom wany yakio duha. ³⁸To na, na hingrnewanm rorhu hingrnefm. Na Yifemr thu hamuhmora na tawo thu hamuhmoyanr. To nd na pthayuk mrokfomn nhai wany yakiokahkomme, tfit na hingrnayuk hingrnefmndm wamhti dukakko. Wamhti dukakkahkomn waduka wameko, ‘Rof nito rofhu toh nmbuhat nhai nndo nndo.’ ”

³⁹Inji kfo motr tfit memom ayaknomr to nhai, ror yak hhrifnimormn yimor.

⁴⁰Be Jisasr tfit yimorn tek Jodent yau hayuknimortn rim fnahmor bingot Jonr yimam baftaisimmoa tkittn. ⁴¹Ndha tohetrn bok met yindarim ror mhtimomrn kfo memom, “Rot Jonr hingrnomoa hingrneft nhai wom mirakerkfom hingrnarmoar. To Jonr ndar yimarhu mrokfom kfo pthamoahat, be tu fipet mrokfom kfo pthamourm.” ⁴²Jisasr ndha tohmohat bok met yindarim rroh bro dukefm htamourm.

Jisasr Judiakoni Jerusalemko yimotr Judaroh bro yimam memom, “Awasnomr.”

(*Sapta 11–12*)

Lasarusrhu noh nmbuhat

11 ¹Wom yimarhu yufat Lasarusr. Nd yimarhu kmit Betanit. Turhu kmit tohhato dbohneft rifakakmotr. Nd kmi Betanitn tohmouf Martati tuthu nmem Mariat. ²To nd met Mariatn Jisasrhu wuram sanda welpaye yuk wunahato tfit tuthu yuke tmarifaye wuram trk domtmotr. Nd dbohnamo yima Lasarusr to nd Marta Maria met najohfhu mndaremer. ³Nd met najohf Jisasrpnno mrokfot htafhato kfo memof, “Broye, nd yimar ninpno nabnot hakutar dbohnewur.” ⁴Jisasr nd mrokfot wanyakhato kfo memom, “Nd dbohneft nhai Lasarusr wundiat minohnihato mifahniruhatr. Nhai. Nd dbohneft tuhan yindariroh Bro Nkifrarhu bbukeft htihato Bro Yifemr bro yufat hayuket. Yo nd yuhatr Bro Najomr bro yufat yakrahr.”

⁵Jisasr Marta Maria najohfi rofhu mndarem Lasarusr be tu marbit htamourm. ⁶Lasarusrhu dbohna mrokfot wanyakmohat nhai bi marimom, “Bmbri yirhoyann rorhu dbohneft htihiruhanr.” Nhai. Afo wom hus yihaf toh tanyomr nd ror tohmo kmit. ⁷Nd hus yihaf toh tanyhato Jisasr disaiperm kfo memom, “Tmifnom ashart ahtanykahnomt tfit ainyom Judia profinsko.” ⁸Jisasr kfo yibonmotr Judiako yinyeftpno disaiperm kfo memom, “Tisaye, ni dukewun ayuwonanoh nmbuhat Judam tahiye tahiye frdbofna noh hany sitamohat, tamohmpno yamuka tfit Judiako ainyom?” ⁹Tfit Jisasr kfo wok memom, “Marr yuwa muhhato yohni thombat ka nhai 12-pela auakfot mar nukeft rhukaht? Yimam ndar bbiny-softhu mar nukeftpno yauwamn nhai suhkahm. ¹⁰Yimam yifung yauhato suhwam, yifung nkrt yak tato hanyhato mimpno mfrgughato suhwom.”

¹¹Jisasr inji kfonihato tfit kfo memom, “Nmoh yimatem Lasarusr be hwitr. Na yi shombat yak thakruhanr.” ¹²Jisasrhu disaiperm nd mrokfot wanyhato kfo memom, “Broye, be hwe mif thombat, rorhu dbohneft htanyrahr.” ¹³Disaiperm nhai marimom Jisasr kfiwohat Lasarusr bi nohetrn hwekfot kfiwurr. Rom memom, “Ka be hwe mifneft kfiwur.” ¹⁴Ndnettn Jisasr kfo nuhas marnya memom, “Lasarusr bi noh mifmor. ¹⁵Na hifa nhai bi marimoya bi yirhoyann Lasarusr htiruha. Nhai. Niko mdukakmoya. Memoya, ‘Rpat yiruhanomn rom turoh nyingaye htiruhamn rroh bro dukefm htarahma.’ Yo be waniako yi htirahnomr.”

¹⁶Jisasr pthanimotr you Tomasr, rorhu wom yufat Didimusr, wom disaiperm kfo memom, “Wasinyako. Aikahnom rorpnno rpat nohrahnomr.”

Jisasr kfo memor, “Na noheh yima kasinyayet yimaya. Na yimam kasinyahato toh nkifraniyuk yafotham yahukotanm toh nkifranitm.”

¹⁷Jisasr kmi Betanit mfnahmohat Lasarusr bi tahi muht rim htafhato bi husfihus marm bi tohetm mfnahmor. ¹⁸Nd kmi Betaniti Jerusalemr nhai wuri wuri rhukahf. Wom kmit toh tany tfit manoh wom kmit yinyeft be 3 kilomitakforpat yauniyetet. ¹⁹Brbo brbo ruhetfn ndnettn tum Judam yimat yimat toht yima nur bb kunys yi tohnhohato Marta Mariarof bmtamof rom htihato.

²⁰Nd nur kunys rhu hasetmn Martat Jisasrhu yi mrokfot wanyamohat be wasinya fnah twanhomotn Mariat kunys rhu htanymottn fnahnihato Jisasr yi rim htimot. ²¹Jisasr rim htihato Martat kfo memotr, “Broye, ni asha atohkahnn nanhu mndaremr nhai inji nohrmotr. ²²To nanhu yima yuhur duka kanga asomift ni Bro Nkifrapno tamohm wukfo bruttnarahnr, wany yakiohato wahirahrn.”

²³Inji kfmott Jisasr kfo memotr, “Ninhu mndaremr tfit sinyarahr.” ²⁴Jisasr inji kfmotr tfit kfo memotr, “Uwa, nanhu yima yuhur duka kangr wuroh ndar bbinysofthu bati yihar sinyarahr.” ²⁵Jisasr kfo memotr, “Na ndar yimaya na noheh yima kasinyayet yimaya. Na yimam kasinyahato toh nkifraniyuk yafotham yahukotanm toh nkifranitm. Yimam na htihato rroh bro dukefm nann htem, htirahnm nd yimam ar bi nohetm tfit sinyahato toh nkifranirahm. ²⁶Yo yimam yima nfrim tohhato na htihato rroh bro dukefm nann htem, nd yimam nhai nohruhahm. Nhai. Rom be inji toh nkifranirahm.” Jisasr nd mrokfot pthanihato Martat wattiwon memotr, “Ni nd na kfiwa mrokfot wanukohat wany yakio kangr tu kfot kfiwa?”

²⁷Tfit Martat kfo fakio memotr, “Uwa nanhu Bror, na ni kfiwa mrokfom wanyhato htitann ni tu Bro Nkifrarhu Yone. Ni nda yimann Bro Nkifrar kfmotr nda bbinysofthu tuhan yindariroh minrfa htihakneft.”

Jisasr nurmor Lasarusr riduka yuhuwapahato

²⁸Martat Jisasrpnno inji ptha tanyhato tuthu nmem Mariat rim htihakmott. Rim htihakhato nhowi yimbhindangm kfohe memotr, “Tisar tor bi nier. Ni kfefern.” ²⁹Mariat be inji wanyhato yudbat memotr Jisasr yi htiruha. ³⁰Jisasr tafi kmit rim fnahrmor. Martat rim htimo tkittn yuhre rhu hasomor. ³¹Mariatpno yima nur bb kunys rhu hasomo Judam Mariat fnahnimott rom htiaf hanyhato memotr ka yima gur rhyuk tkitt kangr, yikahann yihom nur tanyruha, ndnetmn mhikaknimomt.

³²Mariat yimotn yihom fnahmot Jisasr rhu hasomo tkittn. Rim fnahhato Jisasrhu wurampno brbo rim tabokmehato kfo memotr, “Broye, ni asha atohkahnn nanhu mndaremr nhai inji nohrmotr.”

³³Jisasr htimotr Mariat nurmoatt yo nd rotppno yiyuk Judam rpat nurmoatm tfit Jisasr rom htihato rorhu yima yuhur tfit wamortakihato

memor anura. ³⁴Yima gur htamo tkitt kfo ttiwon memorm, “Fitha htamokomr?” Kfo memomr, “Broye, afo wania wahti.” ³⁵Be Jisasar nurmor. ³⁶Judam inji htihato kfo memom, “Wahtiko rorhu yima yuhur nd yimar korhr.” ³⁷Tfit womm rirhuhato kfo memom, “Nda yimar to nyinga kunyjm fak marnyamorm. To tamohmpno nhai kformotr ndar yimar nhai nohrmotr?”

Jisasar Lasarusr kasinyamo yuhat

³⁸Jisasarhu yima yuhur nhai marnyarmorr. Be nd nur rifhurpno yimor yima gur htamo tkitt. Kmi yihofr hingrna htamo tahi muht ndtn htahato tfit wom tahis yakhato muht frtittafmomt. ³⁹Jisasar kfo memorm, “Nd yopthu tahis wayaktakomt.” Inji kfomotr Martat, nd nohmo yimarhu mndaremt, kfo memotr, “Broye, nd yimar bi husfihus marm bi ruhetrn tahis yaktewohat yima gu mthefr fnahwor.” ⁴⁰Jisasar rothu mrokfom wanyaf hanyhato kfo memort, “Na bi kfiyann, ninhu yima yuhur duka kangr kasinya mifwor, nd dukefr kakitohwo htitwont Bro Nkifrarhu bro bbukeft.” ⁴¹Be nd muht frtittafmo tahis faktamomt. Yaktamotmt Jisasar yura hefenr wuyukatohhato kfo bruttna memor, “Bro Yifeme, na kfo yindhorwann. Na kfo bruttnaneft wany yakiohnewuna. ⁴²Yiha yiham na ninpno kfo bruttna hna thombat wany yakiohnewuna. Na ndar tohwa yimam dukahato inji kfiwa, htiruhamn duka mirahm tu Bro Nkifarn kfo tkrurafmotrr niamor.”

⁴³Jisasar inji kfonihato yufat yutahato mfro rinakumor, “Lasaruse, wari-sinyana.” ⁴⁴Be Lasarusr sinyahato yarim fnahna twanhomor. Rorhu tir wurami nyingatikt nohet yimam rir borirmoa rmonthaye kitf botfmomr. Be yuht rmontha kitf kihetr fnahnamor. Jisasar kfo memorm, “Nd rmontham kitf botfetm wayak nyusakafokahtkomr ayir.”

Bro yimam waji famom. Memom, “Jisasar wasrahnom.”

(Matyu 26.1-5; Mak 14.1-2; Luk 22.1-2)

⁴⁵Nd tuhant yindars Lasarusrhu nur kunys niahato Mariat rhunhoyukm, Jisasar Lasarusr kasinyamo yuhat htihato nd yiha hti memom, tu Bro Nkifrar kfo tkruraf mifmorr. ⁴⁶Tfit wommn Farisimpno tfit yihato mkfo nuhas bonuhasmomm Jisasar nayuk nefm. ⁴⁷Be ndnatn Farisimi prisroh tohak yimam Judaroh kaunserm yakhato kfo ttiwon memomm, “Nd yimar bok mirakerkfom hingrnewur. Niko finji dukewako, finji ananomr? ⁴⁸Nom be inji rihti marsisakrahnomr kmikmi rorrpar hikrahm. Bi kmikmi rorn mhikaknitm htirahko tfit Romrhu bro yufet yimam mrokfo naphakhato nieruhamn Bro Nkifrarhu temperr riyohniyakrahr ee yuht kantrikfot bha wohnrarahmt.”

⁴⁹Nd bro yimam rhumom tor wom yimar rhunhomorm. Rorhu yufat Kaiafasr. Rorn nd gonyjimr htamomr rroh bro tohak prisr. Ror

wasinyahato kfo memorm, “Niko ka be tu nhai yima dukefm! ⁵⁰Kangko yuht kantri bugat abha wohni duha rhumot, to be rpa yimarpar Judanmoh tkitt yakhato nohneft hifa. Nd dukefrpar hikkfot. Mirahko tfit wom dukefr ayaknom.”

⁵¹Kaiafasr kfomo mrokfot nhai be turhu yima yuhurn ptharmor. Nhai. Ror nd gunyjimr prisroh tohokr tohetrn kfo htata mrokfekt kfo memor, Jisasr Judaroh tkitt yakhato nohrohr. ⁵²To mirahko ka Jisasr Judarpam dukahato nohmor. Nhai. Bro Nkifrarhu yonm wur fitoh fitoh tkitm riruh aruh hanyukroh yak nhafohhato rpa yimarhu yon kunys kanjo yak htaneft dukahato nohmor.

⁵³Tor nd yiharn Judaroh bro yimam Jisasrhu was yuham riphakmomm. ⁵⁴Jisasrhu was mrokfot bi yiro yiro nakfo hafkniyettn Jisasr nhai Judaroh nyingahato yau nriyafrmoar. Ror mrokfot wany nkriyaf tanyhato nd kmit htanymortn yimor wom nungur tik furat yorhwa kmi Efraimtn. Ndha turhu disaipermno tohmom.

⁵⁵Nd kmit tohetmn Judaroh bro Pasofa burwa yihar rhumomr. Wuri wuri toh hanyuk yimam bi Jerusalem-rpar bi yi rifiny hanyhato rroh tamoh tamoh fasoh nefm bi yi hanyhato bi fak wus bowus hanymoumm. ⁵⁶Jerusalemr yi rifinyhato tfit Jisasr fukatoh hambromoum. Yukatoh hambrohato tfit tum Bro Nkifra rmonrhu temper kmifar tohhato nakfo ttiwon nakfo ttiwon memoum, “Niko finji dukewako? Rore ka niahato rhunhorahrnom ndar nom yorhwa bro yihar o ka nhai?” ⁵⁷Prisroh mtihak yimami Farisim bro mrokfot kfo memom, “Fitoh yimam Jisasr fitha htitwomr mrokfot bmbri nompno aniekahtt yakrahnomr.”

Mariat Jisasrhu wuraf sanda welpaye wunamo yuhat
(*Matyu 26.6-13; Mak 14.3-9*)

12 ¹Afo yuhre 6-pela yiham Pasofa burwathu rhuyuk yiham afo ruhetmn Jisasr Betaniko yimor. Nd kmi Betanit, Jisasr kasinyamo yima Lasarusrhu kmiyet. ²Betani thofm Jisasr htihakato you yeshrt yakhato Jisasrpnno yimam rpat rhuhato nuwa famom. Martatn nd htamo yeshrt fak nhta nhombrahemotm. Yimam Jisasrpnno rhuhato yeshri yamom, Lasarusr tor rhuhato fenyhomorm. ³Mariat nd bro marukfoyet sanda knt yakhato Jisasrhu wuram fuk wunamotr. Yuk wunanihato tfit tuthu yuke tmarifaye trk domtmotr. Nd sanda knt yuk wunamohat mtha yarfon gbefr yuht kunys thu kasi bugamort. ⁴Mariat nd hingrneft Jisasr hingrnamottr tfit Jisasrhu wom disaiperr tu nd Jisasr hndhnaruha yima Judas Iskariotr, rorn kfo memor, ⁵“Bar yimako, tamohmpno nd met Mariat yonmar bro marukfet sanda knt be wawurasohtt. Marifotnom, nd sanda knt 300 kinakfoye yimam wiknarfotmt tfit nd maruham yakhato wuskapa duha yimamn nd maruham hi hanyrfonom.” ⁶Judasr nd mrokfot pthamohat nhai wuska duha yimaroh he mifneft dukahato

kfo ptharmor. Turhu rikohneft kfo rhtimor. To rroh maru kpt to frohm yakitohhato yak nfhotimoamm? To ror. To rorn yakitohhato tfit rorn kak rikohmourm.

⁷Jisars Judasr pthamo mrokfot wanyhato kfo memor, “Inji akfowah-komt. Aruhess nd sanda knt. Aharhu-kahttt afo nanhu nohhato yop yihar afo nierahr. ⁸Nd wuska duha yimam, rom yiha yiha nikompno toh hasiwum. Na, na nhai wom tohnhorhotanko.”

Prisroh bro yimam memom, “Lasarusr awasnom.”

⁹Bok Judam wanymom Jisarsru Betanithu toh nmbuhat, ndnetmn memom Betaniko yihato Jisars htirahnom. To nhai be Jisarsru htinefrpat marimom yirahnom. Nhais. Jisars Lasarusr kasinyamo mrokfot bi wanyetmn, be memom Jisars yi htihato Lasarusr htirahnom, ndnetmn yimom. ¹⁰Ndnetmn prisroh bro yimam bi kfo habofkni htamom Jisars Lasarusrofhu rpat wasneft. ¹¹Nhais be sfno nd Lasarusrhu wasneft kfo ptha kasinya-rmomt. Rroh dukeft duka memom, “Ni Lasarusnn, Jisars kasinyamotr Judam ndt wahtiyafhato prisroh bro yimaroh tngm bi yakhato yiho tuhaf tanywamm bi Jisarsn hikwom.” Nd dukefmpno memom, “Lasarusr awasnom.”

**Jisars king kanjo Jerusalemr mfnahmo yuhat
(Matyu 21.1-11; Mak 11.1-11; Luk 19.28-40)**

¹²Jisars Betaniko Lasarusrhu kunys nuwa ye tanyhato nd wom marrn memor, “Yiruha Jerusalemko.” Bok met yindarim Jerusalemr turoh Pasofa burwat rifinymom. Wanymom Jisarsru Jerusalemkorhof yi nmbuhat. ¹³Rom inji wanyhato yomkpo kanjohot twa gham yakmomn yihotoha yuhat toh gariyakmomr. Toh garihato yimotr rom grha hayuyak hanyhato kura het grhahato kfo hany memom, “Wa! Wa! Wa! Tunga Nkifrara wayak marnyatwanr ndar Isrerroh kingr Brorhu yufatpno niewar.” ¹⁴Jisars yimohat donkir mrhumotr nd donkirn hiyau hanyomorr. Ror donkir rhuhat yimohat to gonborngt kfoyuk mrokfot rhu hikmot. Nd mrokfot gonborngtn profet Sekaraiair kfo memor,

¹⁵“Niko Saion thofko, mirahko ayakrmenom.

Wahtiko nikmoh kingr bi donkiyenrn myorhtr hnewurr.” *Sek 9.9*

¹⁶Jisars donkir hanyomohat Jerusalemko rorhu disaiperm nhai yima yuhu yakrmomt mrokfothu yimbu yuhat. Kto Jisars nohhato sinyani bi bro yufat yaketrn nd mrokfothu yimbu yuhat fak dukamomt. Nd rom Jisars kfo yindhorakhato namo neft gonborngt kfo hik twanhomott.

¹⁷Lasarusr yopt husfihus yiham rhuhat tfit Jisars kasinyamohat bok tuhan yindarim Jisarsrno tohhato htimomr Jisars Lasarusr nakuhato sinyamohat. Romn tfit wommpno yi rhuhat Jisars namo neft naptha nuhas hi hanyomom. ¹⁸Womm wanyhato ndnetmn Jisars yihota yuhat

toh gari hasomomr. ¹⁹Farisim inji htiyafo hanyhato tum rinakfo nakfo memom, “Niko htitko? Yimam bi rorrpar bi hikwom. Nom kangnom, akfo rafonomm, be nhai. Tuhan yindarim ror hingrnamo mirakerkfot napha nuhas hihany, napha nuhas hi hanitamn bi rorrpar kak hikwom.”

Wom Grik thofm memom, “Jisasr ahtinom.”

²⁰Nd Pasofa burwa yiharhu lotuneft Judam niamohat wom Grik thofm rpat hik hnamomm Jerusalemko. ²¹Nd Grik thofm niahato afo Filifrpno yimom. Nd yima Filifr Galili profinsko kmi Betsaida thofer. Rorpno niahato mttiwon memomr, “Broye, nom kangnom, Jisasr ahtinom.” ²²Yo be Filifr wany sanyhato Andrupno mnahtiyaknihato Jisasr mkfo memofr, “Ni Grik thofm kangm, ahtinomn.” ²³Jisasr tfit kfo wok memorm, “Bro Najomrhu bro yufathu yak yihar bi brbohwor. ²⁴Na kfo mifwanko, wit tpit nhai bbinysoft misuhhato nohrfot, to be inji rpa tpirpat rhuraht. Misuhtn fnoht, tfit frdborhahato sinyaruhatn dmet dmet hirrahmt. ²⁵Yimar be turhu toh marnya nmbuhat mfro dukewur, kto nd toh marnya nmbuhat tfit hti hambrafraht. To fitoh yimar nda bbinysofthu toh marnya nmbuhat mong trohhato tfit nhai mfro dukakahrt, rorhu toh marnya nmbuhat toh nkifrarahr. ²⁶Fitoh yimar nanhu yinhit tohwor, nd yimar na hikhnahato nanpno rpat tohkfot. Yimar nanhu yinhit tohrah, nd yimar nanhu Yifemrn bro yufat hirahrr.”

Bro Najomrn kfo grhakfot

²⁷Jisasr tfit kfo memor, “Nanhu yima yuhur krhohato bok dukefm kekma. To finji kforhoya? Ka kfo miruha, ‘Bro Yifeme, na wofnkaha nd krhoparoh yakneft?’ Ka inji kforuha? Nhai. Na kanga finji anaya na nhai inji kfo rafokfot. Na to nd krhoparoh yakneftn niamoya. ²⁸Bro Yifeme, ninhu yufat abrotwat.” Jisasr inji pthanimotr wom tngt yura hefen yuhat niamot. Nd tngt kfo memot, “Nanhu bro yufat bi fak nuhas hnamoyanm. Tfit wompam yak nuhasruhanm.” ²⁹Jisasrpno brbo tohmo tuhan yindarim nd mrokfo kfo tngt wanyhato kfo memom, “Ka toher.” Womm memom, “We, ka mounmotr pthiwur.”

³⁰Jisasr rroh mrokfom wanyafo hanyhato tfit kfo memorm, “Nda niko wanu tngt nhai nann dukahato nd tng yawihnarfot. Nhai. Niko dukahato nd tngt fawihnes. ³¹Ar yiharn Bro Nkifrar nda bbinysofthu tuhan yindariroh nefm yak nhtarahr. Yo nda bbinysofthu tndhr yak wahtarahr. ³²Na ndar bbinysoft tohhato bgre miyeta kasinya thombat tot nd yiharn nda bbinysofthu tuhan yindarim rpat nanpno yarim tohrahm.” ³³Jisasr nd mrokfot pthamohat turhu noh yuhathu mrokfo yuhatn kfo ptha nuhasmorm.

³⁴Yo tfit nd rorhu mrokfom wany yakitohmo tuhan yindarim ttiwon memomr, “Bro Nkifrarhu boririfhut kfo kangt, ‘Nd yimar Bro

Nkifrar tkrurafohato yimam minrfa htihakruhar toh nkifrarahr.' To ni tamohmpno inji kfo yamuka Bro Najomr bgre miyetr tuhegirrahmr? Nd yimare froher?"

³⁵ Jisasr tfit kfo memorm, "Tor afo nukefenr. Nd nukefenrpno afo wawi-yauyauko. Nd wuroh nukefenr wuteh pskeyakrahr to be finji yihotat htihato yauruhako? Yimam nd yifungt wuyau-yauhato yak tato botatiwam nhai yihotat htihakmt. ³⁶ Niko wuroh nukefenr yorhwa fijo nd nukefenr yak hikhato nd nukefenrhu yonko rhurahko."

**Bok Judam Jisasr hingrnamo mirakerkfom htimohat
nhai rroh bro dukefm Jisarn htarmomm**

Jisasr met yindarimpno naptha buganihato be htanyorm. Htanyomohat be yihato rhu kafrohmr. ³⁷ Jisasr ar yonmari mirakerkfom hingrnamoahat nhai rroh yima yuhum sinyahato rroh bro dukefm rorn htarmoam. ³⁸ Rom inji namohat profet Aisaiar kfoyuk mrokfot fak hikmom. Profet Aisaiar to kfo memor,

"Broye, nom pthiwa mrokfom frohm wanukamnom?

Yo frohm nd ni hingrnewa bro hingrnefm htihato rroh yima yuhum sinyewamm?" *Ais 53.1*

³⁹ Be nhai Jisasr nayuk nefm htihato yima yuhum sinyarmomm. Nhai be sfno Jisasrhu mrokfom hik duha yirmomm, tot tfit wom mrokfot profet Aisaiar kfo memor,

⁴⁰ "Bro Nkifrar nyingam takunyj-motrm nhai yukatohruhatm,
yo duka yima yuhum takih-motrm nhai tamoh mrokfom tfit dukakfot.

Nyingetm rhuhato wom nefm htiruhamn,
yo yima dukefetm rhuruhamn mrokfo mna yuham yakruhamn,
yima yuhum yak kekuthato tfit nanpno yarim tohruhamn yak marnyaruhanm." *Ais 6.9-10*

⁴¹ Aisaiar nd mrokfot pthamohat Jisasrhu bro nanyjar bbukeft htihato inji kfomor.

⁴² Jisasr mrokfom kfomoahat Judaroh bro yimam bokm wany yakiomoum. Tmift tafonthu yak nriyafneftne nhai. Farisim yakrme-moamn nhai yak nriyafmoam. Memoum, "Farisim htirahmnom be nhai Judaroh rhu rifinyuk rmonm kfakruhatmnom." ⁴³ Rroh dukeft be duka memoum, "Be yima mifmn akfo yindhor boyindhormnom." Nhai marimoam, "Bro Nkifrarn akfo yindhormnom."

Jisasr pthayuk mrokfomn yak nhtarahmm tuhan yindariroh nefm

⁴⁴ Jisasr buha yima rifiny swirtn nnhuhato kfo ptha memorm, "Fitoh yimam na wany yakiohato hikwom, to mirahko ka nanrpayann hikwom. Nhai. Na tkrurafoyuk Bro Yifemrpno rpat hikwomno. ⁴⁵ Yo frohroh

nyingam nann kukatohwom nhai nanrpaya yukatohkakhm. Nhai. Na kfo tkrurafyuk Bro Yifemrpnno rpat kukatohwomno. ⁴⁶Ndar bbinysoft yiro kspitat rhumohat nann niahato kshr mifakitoh nuka-moyanr. Ndnnetn yimam na hikwom nhai yifung kspt tohhato yak tato botatoruhatm. ⁴⁷Yimam nanhu mrokfom hik duha yitam na nhai htihatof tfit rroh nefm yak nhtahekahanm jasm kanjo. Na nhai ndhtet nefm niarmoya. Na niamohat yimaroh minrfa htihakneft niamoya. ⁴⁸To yimam na mong trohhato nanhu mrokfom yak duha yitam, tot rroh nefroh yak nhtayuk jaskfot. Nd na pthayuk mrokfotn jaskfot kanjo tu wuroh ndar bbinysoftu bati yihar yak nhtarahtm rroh nefm. ⁴⁹Nd na kfiwa mrokfom mirahko ka be nanhu yima yuhuru mrokfom pthiwa. Nhai. Bro Yifemrhu yima yuhuru mrokfom pthiwa. Na to rorn tkrurafomotra niamoya. Ror kfo hta bohtafoyuk mrokfomn na kfo pthiwa. Ndnnetn nd na pthayuk mrokfotn jaskfot kanjo yak nhtarahtm rroh nefm. ⁵⁰Bro Yifemrhu mrokfot tu hifa rhu nkifrani nmbuhat mhfnahnewutt, ndnatn nd na pthiwa mrokfot tu Bro Yifemr kfo yuk tng yuhatn kfo ptha hikwa.”

Jisasr turhu Yifemrpnno yiyuk kfo duka nmbuhat kfo dukamorm turhu disaiperm

(Sapta 13–17)

Jisasr slef yimar kanjo turhu disaiperroh wuram bupaye yukmo yuhat

13 ¹Pasofa burwathu rhuyuk yihar yibonmo marrn Jisasr rhuhato duka hik duka hikhato kfo memor, “Hrek marr yorhwanomn nohok nd Pasofat riruhakrahnomt. Be nda marrn asor nanhu wuroh yihar rhuyukr. Nohokn nanhu nohhato nda bbinysoftu htanyhato tfit tukanhu Yifemrhu yi yihar.” Jisasr nhai duka mmormoarm turhu disaiperm. Rorhu yima yuhur be romn rhumour. Noh-nefrpatpno mfafhonimorm. ²Nd wuroh marr rhumo krifn Jisasri disaiperm rpat rhuhato nuwa famom. Nd yiharn Saimon Iskeriotru yon Judasr, bi Satanr fasoh yima yuhu bebr htamorr Jisasrhu yahr kmimpno hndhnanest. ³Jisasr bi tur fak nhombramort Bro Yifemrhu bro bbukeft bi fakmort yo bi hti hikmort ror niamohat Bro Nkifrarpnno wutoh tanyhato niamor tfit nohnineft tfit sinyanihato Bro Yifemrpnno yirahr. Ndm bi tur hti hik bohik bugamormn, ⁴be Jisasr wasinya fnahhato nuwa yeyuk tebort htanyhato turhu yuke hmbreshar yak hrur thumorr tfit trkthar yakmorn ndar nyuhmor. ⁵Bro dis yakmorn bupam tas hmbremort. Tas hmbrenihato nd bupaye turhu disaiperroh wuram yukaf hanyhato tfit nd ror nyuhmo trkthaye trkaf hanymourm.

⁶Yo be yima yimaroh wuram yukaf hany yukaf hany morn memor, “Saimon Pitarhu wuram ayukanr,” Pitar sinyahato kfo memorr,

“Broye, nine nanhu wuram kangn ayuka?” ⁷Tfit Jisasr Pitar wahtiyak hti hamuhhato kfo memorr, “Ni nhai tawisafkahnt nda na hingrniwa hingrneft. Kto tawisafrahnt.” ⁸Pitar kfo memorr, “Mirahn nanhu wuram ayukanr. Mirah mifn.” Jisasr inji wanyhato tfit kfo memorr, “Nhai ninhu wuram yukrfoyann, nhai nanhu disaipern rhuruhatn.” ⁹Saimon Pitar Jisasr pthamo mrokfot wanyhato tfit kfo memorr, “Broye, kangn ayukanr, to btn mirahn wurarpam ayukanr. Tirfi mfhat rpatn wayuktwona.” ¹⁰Jisasr tfit kfo wok memorr, “Yimam bi yuht yimam yuketm nhai tfit wompam yukkfot. Bdr wurarpam yukkfot. Bi wurarpam fukme, yuht yimam fnhu bugewum. Nikmoh thatipm fnhu bugewumko. To nhai be niko buga kfokaha. Nhai.” ¹¹Jisasr inji kfmohat bi htimor turhu wom disaiperrn yahr kmiroh tirm htarahrr. Ndnetrn kfo memor, “Nhai niko buga kfokaha.”

¹²Jisasr disaiperroh wuram yuk buganimormn tfit tur hmbremoa yuke hmbreshar hmbrenihato rim rhumor tur rhu tanyomo tkittn. Rim rhuhato ttiwon memorm, “Niko tawisafwoko nd na nefinefthu yimbu yuhat? ¹³Niko kutewukma Tisaya yo womnam kutewukma Bror. Rot hifa inji kutewukma. ¹⁴Na nikmoh Tisaya yo na nikmoh Broya nikmoh wuram fukanko. To niko, nd na yak nuhasefi yuhatn niko tuko wuram nayukkfot. ¹⁵Na bi fak nuhasanko to be nd yuhatn wahiktwako. ¹⁶Wawanyko, na kfo mifwanko, hingrna yimar be turhu tohak yimarhu yinhit tohwor. Yo mrokfot hanyuk yimar nhaf kfo tkrurafyuk yimarhu yinhit tohwor. ¹⁷Bi fekkomt nd na yak nuhasefinefthu yimbu yuhat. Nd yuhatn hingrna hikrahko tfit tuko rhu nmbuhat hifa yiruhatt tfit yindhorrhako.

¹⁸Na nhai nikom buga kfokaha. Na tawisafwanm tukanhu yufatpno bi kfo htatayukm. Yo tuka bi htitant nd Bro Nkifrarhu gonborngt bingot htamot tu yimbuefett rhuraht. Nd mrokfot kfo kangt,

‘Yimar, nanpno nuwa yenyho-yukrn,

bi toh kekuthato nanhu wasyuk wajis hatonemort.’ *Sng 41.9*

¹⁹Tafi nd neft mfrpskena duha bi kfo nuhaswanko. Kto nd neft mfrpskena thombat tfit nikmoh yima yuhum nanrpaya htahato kfo mirahko na to nda, tu Bro Nkifrar kfo tkrurafyuka. ²⁰Na kfo mifwanko, frohr na tkrurafoyuk hingrna yimar yakmiyakhato fak marnya bomarnyerr, nd yimar nann yakmiyakhato kak marnya bomarnyewur. Yo nd yimar na yakmiyakyukr, nhai be nann yakmiyakkahr. Nhai. Nd na tkrurafoyuk Bro Yifemrn kakmiyekwor.”

Jisasrhu hndhna yimarhu mrokfot

(*Maty 26.20-25; Mak 14.17-21; Luk 22.21-23*)

²¹Jisasr nd mrokfom kfonihato tfit yima yuhur rimortakihato kfo memorm, “Na kfo mifwanko, nikmoh womrn hndhnrhotra wasrahma.” ²²Jisasr inji

kfomotr disaiperm tfit tum rinahti nahtihato nattiwon memom, “Nd ror kfi mrokfote frohr kfir?” ²³Wom disaiperr Jisasr mfro yuhu mongimoar, ror nuwa yeyuk tebort rhumohat be Jisasrpnno brbo rhumor. ²⁴Saimon Pitar nyingaye rikfo memorr, “Wattiwonnr, frohr kfir.” ²⁵Be nd disaiperr brbo rhu kekutni hanyhato ttiwon memorr, “Broye, ni kfi yimare frohr kfi?” ²⁶Jisasr tfit kfo memorm, “Frohr bretpat yekantn nnari disn bretpat tayifakhato fahuya, tor nd yimarn hndhnarhotra wasrahma.” Inji kfonihato bret nuwat yakhato watayifakhato rihemor Saimon Iskariotru yon Judasrn.

²⁷Judasr nd bret nuwat yakhato famort. Fenyi hanymort Satanr fkne twanhomorr. Jisasr kfo memor, “Judase, kangn finji anaya, to be asomif fura mrom wayakn. Mirahn wom kukna hatoha.” ²⁸Nd yima bugam nuwa yeyuk teborthu mku mku rhu wohnmom, nhai yakrmomt nd Jisasr kfomo mrokfothu yimbu yuhat. ²⁹Judasrn maru gegb yoht haruhetrn, Jisasr inji kfo pthamohat disaiperm duka memom, “Ka Pasofa burwat rhuruha bro yiharhu yeyuk yeshri wiknaneft kfirr. O ka wuskapa duha yimaroh hayuk wuskaroh wikna hanyeftn kfirr.” ³⁰Be nd nnaripam tayifaket bret tifenr Judasr yak yenyimorr fnahnimor. Yihat bi wufak bugamot.

Jisasr nfri boririfhu mrokfot hemo yuhat

³¹Nd yima Judasr fnahnimotr Jisasr kfo memor, “Be bi asor bi Bro Najomanhu bro yufathu yak yihar. Na nohruha noh nmbuhatn Bro Nkifrar bro yufat yakrahr. ³²Nanhu nohneftpno Bro Nkifrar bro yufat yakruha yuhatn tawo Bro Nkifrar sinyahato be yudbat bro yufat hirahra. ³³O arenko, bi brbohwor nikmoh htanyuk yihar. Hti hasiwokma tfit hti hambraforahkma. Judam rpahtet mrokfot kfo nuhas-moyanm yo tfit nikompno rpahtet mrokfot pthiwa. Na yiruha yihotar nikom nhai yau hikruhatkomr. ³⁴Bi wom nfri boririfhu mrokfot kfo nuhas tanywanko. Niko rpa rpa yimako wommpno nayak marnyahato rpat tohkfot. Niko nanhu tirtn rhu bugamoko. Tawo niko wommpno nayak marnyahato rpat tohkfot. ³⁵Niko wommpno nayak marnyahato tohrahko, wom riruh aruhyukm htiruhamn kfo mirahm, ‘Ndm tu Jisasrhu disaiperr mifem.’ ”

Pitar kfo namhimo yuhat

(Matyu 26.31-35; Mak 14.27-31; Luk 22.31-34)

³⁶Saimon Pitar waruhato Jisasr kfo ttiwon memorr, “Broye, ni fitoko yiruha?” Jisasr kfo memorr, “Na yita yuhat ni nhai hik hnewotna. Kto mongkorne ee btn nierahn.” ³⁷Tfit Pitar waruhato kfo ttiwon memorr, “Broye, to tamohmpno nhai hik hnewotann? Na kanga, nann hikhato nann ninhu nohyuk tkitt yakruhant.”

³⁸Jisasr inji wanyhato tfit kfo ttiwon memorr, “Tu kfo mif mifwona? Na kfo mif mifwann, krirhu naku tngt tafi wany juha, husfirpa kfo namhit kfo namhi kangnm, ‘Na nhai tawisafkahanr Jisasr.’ ”

Jisasrn tor Bro Nkifrar pno yiyuk yihotat

14 ¹Jisasr tfit kfo memorm, “Niko nda mrokfot wanuk-wohat mirahko bok dukefm ayakkah-nomn yima yuhum akrhomnom. Nikmoh dukefm be Bro Nkifrar duka yo na duka, be nd dukefrparpno rhukfot. ²Nanhu Yifemrhu kmir yonmari yonmari kuny rmonr korhr. Ndnatn na yi shombat nikmoh kunyroh bi yak hta hanyneftn bi yi hanyruha. Be kuny rmon duha arhut na nhai inji kfo tany hanyrfotanko. ³Na yi shombat kuny rmonm yak marnya hta tanyrhoyanmn tfit niahato miyak htiyakhato be rpat yihato rpat nanpno rpat tohrahnom. ⁴Na yita kmikorhof yi yuhat niko bi htiyeteko.”

⁵Tomasr inji wanyhato ttiwon memorr, “Broye, ni kfiwa yihota yuhat nome nhai tawisafkahnomt. Tone fitoh yuhatn nieruhanom?” ⁶Tfit Jisasr kfo memorr, “Yimam kangm Bro Nkifrar pno ainom, nann yihotaya, yo nann Bro Nkifrar fak nhombranamor, yo nann toh nkifrayuk yafothat yimam kahukanm. Nhai wom fitoh yuhamn yimam Bro Nkifrar pno yikfot. Tu be nhai mif. Nanrpayanpno niakfot. ⁷Bi ahti tawisafkma, nanhu Yifemr hti tawisafrokomm. Ariham bi hti hik bohikwakomrn bi tawisaf-wokomm.”

⁸Filifr wom ttiwon mrokfot wakfo memor, “Broye, nom kamuknom, Bro Yifemr wayak nuhasakhtnom nmoh yima yuhum mirhurahnmom.” ⁹Jisasr tfit memor, “Filif, ni tamohmpno kfo yamuka, ‘Bro Yifemr wayak nuhasnmom?’ Ar yonmar yiham nikompno toh hnamohate ka nhai hti tawisafrokomm? Yimam na htitwom, to Bro Yifemr htitwom. To tamohmpno tfit kfo yamuka, ‘Bro Yifemr wayak nuhasnmom?’ ¹⁰Ni ka nhai duka mikahn na Yifemr thu hamuhmoya yo Yifemr na thu hamuhmora? Nani nanhu Yifemrpno nnoh toh nmbuhat nhai nndo nndo. Mrokfom na niko kfohemoam nhai be nanhu tngtn ptha hnarmottm wany hnarmokomm. Nhai. Bro Yifemr nann mrhuhato mrokfom ptha hnehato mirakerkfom hingrna hnamor. ¹¹Na ptha yamu-kohat na Yifemr thu hamuhmoya yo Yifemr thu hamuhmora, nd mrokfot na kfiwat wawany yakiotwakomt. To nd na pthayuk mrokfomn nhai wany yakiohakomme, tfit na hingrna hnamo mirakerkfomn dukakhato wahiktwokma.

¹²Na kfo mifwanko, frohm rroh bro dukefm nann htewuma, nd na niwa nefm nd yimam narahmm. Uwa, ndt nhai be kfo furakfot kfohaha. Na Bro Yifemrpno yi tohruha. Ndnatn rom naruha nefm tu bro nefm narahm. ¹³Tamoh tamohm nanhu yufatpno kfo ttiwonrahko, hiruhanko. Nd yuhatn Bro Yifemr bro yufat yakrahr. ¹⁴Ndt to bi kfiwant tamoh tamohm nanhu yufatpno kfo ttiwonrahkoma, hiruhanko.”

Jisasr kfo memor, “Bro Nkifrarhu Yafothar yawihnerahr.”

¹⁵Jisasr tfit kfo memorm, “Nikmoh yima yuhum nanpno korhme, na pthayuk mrokfom yak hik marnya bomarnyarahkomm. ¹⁶Na

yi shombat nanhu Yifemr kforhotanr nikmoh toh tamnouhato thu bmtayukr kforuhattr yawihnehato be nikompno toh nkifranirahr. ¹⁷Nd toh tamnouyukr nieruhar to Yafothar nieruharn toh tamnourahrko. Nd Yafotharn yimam kak nuhas bonuhasworm Bro Nkifrarhu tu yafothet nef mimf. Ndar bbinysof thofm nhai hti tawisafkahmr, ndnettn nhai rom yakkfot. To niko awi nd Yafothar nikompno yorhwarn hti tawisafwokomr. Kto nd Yafothar mithu nawohrahrko.

¹⁸Na yi shombat nhai mong trohnhato yon kutenm kanjo yak mmbrafiny hasoruhatko. Nhai. Tfit niahato mihtiruhanko. ¹⁹Ndar bbinysof thofm wurohpam hti hasiwuma hti hambrafrahma. To niko awi hti hanyrahkoma. Na nohhato tfit sinyaruha. Niko to inji nohhato tfit sinyarahko. ²⁰Na nohhato tfit sinyarhota, nd yiharn hti dukarahko nani nanhu Yifemrpnno nnoh toh nmbuhat nhai nndo nndo yo nikomi na nmoh toh nmbuhat nhai nndo nndo. ²¹Yimam nanhu boririfhu mrokfom yakhato kak hik marnyewumm, rroh yima yuhum nanpno korhm. Yo nd yimam nanhu dukefr yorhwam nanhu Yifemr hifa yima yuhur hmbritrm, yo na hifa yima yuhur hmbrihato rompno mfnahhato yak nriyafruhanm.”

²²Jisars inji kfomotr tfit Judasr, nhai tu Judas Iskeriotr, wom nndoh Judasr kfo ttiwon memorr, “Broye, tamohmpno nomrpanompno yak nriyafhato ndar bbinysof thofmpno nhai yak nriyafruhatn?” ²³Jisars kfo memorr, “Yimam rroh yima yuhum nanpno korhm, nd yimam na kfo nuhasyuk mrokfom hikrahmm. Mrokfom hikruhatmm nanhu Yifemr hifa yima yuhur hmbrihato to be nani nanhu Yifemr rompno yihato tohnhorahnonm. ²⁴Yimam nhai tu rroh yima yuhum nanpno rhukahm, nd yimam nhai nanhu mrokfom hik marnyakahmm. Nda niko wanuka mrokfom nhai be na tukanhu dukefrhu mrokfom ptha nuhaskahanko. Nhai. Na kfo tkrurafyuk Yifemrhu mrokfom kfo ptha nuhaswanko.

²⁵Na nikompno afo tohwa fijo nda mrokfom bi kfo ptha nuhas tanywanko. ²⁶Nikmoh toh tamnouyuk Yafothar, Bro Nkifrarhu Yafothar nierahr. Nanhu yufatpno Bro Yifemr tkrurafuhattr nierahr. Rorn nikmoh dukefm yak hta bohtaruhattr na ptha nuhas bonuhas hnamo mrokfom dukarahkomm.

²⁷Na bi htanywanko. Niko rhu haso thombat mirahko tamoh tamoh dukefmpno arhunom. Tamoh tamoh dukefm yafhohato be warhu furatwako. Nanrpaya ndhtet yindhorr yima yuhur kahukwanko, nhai ndar bbinysof thofr ndhtet yima yuhur herfotrko. ²⁸Bi wanukma kfo yamuhar yirhoyann tfit nieruha. Nanhu Yifemr yura mtohekwor, na be rorhu yinhitn ritohtewa. Ndnettn nikmoh yima yuhum nann korhm, be nanhu yinyeft be hti yindhorrakho. ²⁹Nd neft tafi mfrpskina duhattn bi kfo nuhaswewanko. Tfit kto nd neft mfrpskinaneft tukmoh nyingaye htiruhakomm na kfuyuk mrokfom wany yakiorahkomm.

³⁰Nhai tfit wom ptha hatohwota. Nda bbinysofthu tndhr bi tor bi niewur. To ror nhai nanhu toh nmbuhat yak hta bohtakahra. Nhai. Bro

Yifemrhu dukef yuhat hikwa. ³¹Tmift kanga na tukanhu Yifemrhu dukeft rhuhato rorhu mrokfom hikwa yuhat afo ndar bbinysofthu met yindarim afo yak nuhaskahtanm ahtim. Be tmifko wasinyakahtko ainyom.”

Jisasr tu wain tof mifer

15 ¹Jisasr tfit wom mrokfot kfo memorm, “Na tu wain tof mifa. Nnanhu Yifemr wain swir tikater. ²Na nd wain tofanhu yuhtam yukha hir duha yitam wain tof tikatr puk thuworm. Nd yukha horet yuhtarpam be frtept wusworm yukha hir marnyaneft yihato. ³Niko bi nd na pthaheyuk mrokfotn bi fak wus bowus marnyamottko be bi yukha hir yibonwoko. ⁴Ndnetn nanpno niko frtkafhato na nikompno frtkafuha. Nhai wom wain tofthu yuhtam mmem toftpno nadodru duhatm yukha hir furakahm. Nhai. To inji kanjo niko nanpno frtkaf duha yirahko be nhai yukha hirruhatko. Nanpno frtkafrahko ee btn yukha hirrahko.

⁵Na tu wain tofthu mmem tofa. Niko wain tofthu yuhtayeko. Yimam nanpno frtkafhato na rompno frtkafneft nd yimam yukha hirneft yuhtam be yihohathuwom. Nhai hir ffirmkahm. Na duha nhai wom finji naruhatko. ⁶Nanpno frtkaf duha yita yimam kak thuwomm yuhtam puk thuhato fftewa kanjo. Kto nd ffyuhtam yak nhafohhato kandhi thuwomm.

⁷Niko nanpno frtkafhato nanhu mrokfot yakhato yakitohrahkomt, nhai mrokfom, tamoh tamohm ttiwonneft, to be tukmoh duka fijo kfo ttiwonruhatkomr hirahrko. ⁸Niko nanhu disaipar mifko rhurahko tu mfro mfro hir natrahko. Ndtpno nanhu Yifemr tfit bro yufat yakrahr. ⁹Na be Bro Yifemrhu yima yuhurn korhwa. Nd yuhatn tawo nanhu yima yuhur nikomn niamor. Yiha yiha niko be nanhu duka yima yuhurn rhukfot. ¹⁰Na Bro Nkifrarhu boririfhu mrokfom hikhato rorhu yima yuhur rhumo kanjo niko na hayuk boririfhu mrokfom wany yakiohato hikrahkomm, nanhu yima yuhurn rhurahko. ¹¹Na inji kfiwohat nanhu dukeft duka kanga, nanhu yindhor rifhur nikomn arhukahrn be nd bro yindhor yima yuhurparn arhurko. ¹²Na wom mrokfot kfiwanko: Niko tuko niyak marnya niyak marnyakfot na niko dukahato nikmoh rhu nmbuhat yak marnyamo kanjo. ¹³Kfiwanko, Kfiwanko, wom yimar yimat tohtn yimatm dukahato fnohr, tot tu yimat toheft. ¹⁴Nanhu kfoyuk mrokfo yuhat hikrahko, nanhu yimatko rhurahko. ¹⁵Na nhai wom kfo mekaha, ‘Arm hinger na yimayem.’ Nhai. Hinger na yimam nhai turoh tohak yimam hinger newa hinger na yuham tawisafkahm. To na Bro Yifemr pno yakmo mrokfom bi ptha dbruf nuhasmoyanko. Ndnetann kfo kanganko, niko nanhu yimateko.

¹⁶Na nhai nikomn yakrmokma nikompno tohneftn. Nhai. Nann fakmoyanko. Nann yakhato hingerneft hemoyanko. Memoya nd hingerneft wayakni waikahkomn niko hinger nayuk hingerneft fipett rhuhato yukhett rhuraht. Tu rhu nkifraniyet yukham hirrahm. Ndnetn nanhu yufatpno

Bro Nkifrar wom shrm ttiwonrahkomr be hirahrko. ¹⁷Ndnettn boririfhu mrokfot kahukwanko. Nikmoh womm marbit htakfot.”

Bbinysof thofm hti dbnotrahmm disaiperm

¹⁸Jisars tfit wom mrokfot kfo memorm, “Nda bbinysofthu yimam hti dbnotwomkone, mirahko ayak mmonom. Nhai be ar nohofrpa nikomrpakompno inji nakahm. Nhai. Nanpno to inji namom. ¹⁹Be nda bbinysoftho tohwa yimaroh ruheft arhuko, yakmiyakhato hifa yima yuhur hmbreerfomko. To nhai. Ndar bbinysofthu yimampno toh hasetkonn yakmotanko rom tfit kfo kangm, ‘Tamohmpno frtrohwannom?’ Ndnetmn namburhato hti dbnotwomko. ²⁰Waduka hik marnya hanyswako na kfoyuk mrokfot. Wom hinger na yimar turhu tohak yimarhu yinhit tohwor. Ndnettn rom ahti dbnotma, niko to inji hti dbnotrahmko. Nanhu mrokfom ayak hikmm, to inji nikmoh mrokfom hikrahmm. ²¹To nhai. Rom nhai tawisafkahmr na kfo tkrurafoyuk Bro Yifemr. Ndnetmn niko bi nanpno yarim fnahnehato tohwatko be hti srthurahmko.

²²Na nia duha yihato Bro Nkifrarhu mrokfom aptha nuhas duha yianm be nd rom nayuk fasoh nefm be nhai mrokfo duhatm rhurfom. To nhai. Arihat bi mrokfot wanyetmn to be nhai nd rroh fasoh nefroh kamongyuk tkitm. ²³Fitoh yimam na hti dbnotwoma, to nanhu Yifemrn hti dbnotwom. ²⁴Be na niahato rompno tohhato nd yimam hinger nawon duha bro bro nefm ahinger na duha yianm, be rom nayuk fasoh fasoh nefm mrokfo duhatm rhurfom. To nhai, na nayuk miraker-kfom bi turoh nyingaye htimommn tfit hti dbnotwomno nanhu Yifemrpno. ²⁵Nd rom nayuk nefm to bi turoh boririfhut kfomo mrokfo yuhatn bi kak hikwom. Nd mrokfote inji kfiwut:

‘Be hti dbnot furamoma.’

Sng 35.19, 69.4

²⁶Nikmoh toh tamnouyuk Yafothar Bro Yifemrpno tohwor. Nd Yafothar tu Bro Yifemrpno tohhato tawisafwort tu Bro Yifemrhu rhu toheft. Bro Yifemrhu rhu toheft tawisafhato yimam kak nuhas bonuhasworm Bro Yifemrhu tu yafothet nef mifm. Na yihato tkrurafrohanr nierahr nikompno. Nd Yafothar nieruharn nanhu nefm yo hingerneft ptha srh nuhasahrko. ²⁷Yo to niko inji buga waptha srh nuhas-twakomm nanhu hingerneft. Na rihinger nakmohat niko tohnhohato htimokomt nanhu hingerneft. Ndnettn ptha srh nuhaskfot yimam.”

16 ¹“Na nhai wofnkaha niko Bro Nkifrarhu mrokfot miyafhonineft. Ndnatn nd mrokfot kfiyanko. ²Judaroh rhu rifinyuk rmonm kfo yiritikfot kforahmko. Yo wom yiam was beb bobebrahmko. Rom inji na thombat mirahm, ‘Nom Bro Nkifrarhu dborioh nefm newunom.’

³Nd yimam niko ufasoh nefm naruham nhai Bro Nkifrar tawisafkahmr yo na nda tohwohat nhai hti dukakahma. Nhai. Ndnettn nd fasoh nefm narahmko. ⁴Bi kfo nuhasanko nd yimam naruha ufasoh nefm. Kto ndhtet nefm hitnommn tfit wadukatwakomt ndar na kfo nuhaswa mrokfot.”

Jisadr ptha nuhasmorm Bro Yifemrhu Yafotharhu hingrneft

Jisadr kfo memorm, “Na nikompno tohmohat nhai nd nd mrokfom kfo nuhasrmoyanko. Bi tukanhu Yifemrpnio ziyuk yiham bi abrboh hnam, ee btn kfo nuhasrmoyanko. To nhai. Yiham afo wuri ruhetmn ndnettn nhai kfo nuhasrmoyanko. ⁵To be bi kita tukanhu Yifemrpnio. Tur kfo tkruraf-motra niamoya. Ndnnetann bi tfit kita turpno. To niko nhai kfo ttiwon mikahkma, ‘Nine fitohko yita?’ ⁶Na bi inji kfiwota nikmoh yima yuhum bi rinur finywom. ⁷Na kfo mifwanko, nane sinya troh tanyruhanko. Hifa inji sinya trohruhanko. Na sinya troh tany shombat, Bro Yifemrpnio muhruha. Rorpno yirhoyann tfit nd toh tamnouyuk Yafothar kfo tkruraforhotanr thu hamuhrahrko. ⁸Nd Yafothar nieruharn nda bbinysofthu tuhan yindarim yak nuhasrahm fasoh fasoh nefm niewa yihotam, yo yimaroh toh marnyahato yima yuhum wutham rhuneft, yo ariham finji finji toh marnyahato Bro Nkifrarhu kotkfot mrokfo duhatm rhurahm. Nd ndm Yafotharn yak hta bohta nuhasrahm. ⁹To frohmn fasoh fasoh niwa yihotam hikwam? To nd na hik duha yita yimam, romn nd yihotam hikwom. ¹⁰To frohmn Bro Nkifrar hti wuthewar? Nhai wom frohm hti wuthakahr. Ndnnettn nann nohhato Yifemrpnio yihato nhai wom htirhotkma. ¹¹To frohmn Bro Nkifrarpnio mrokfetm rhuruham? Nda bbinysofthu yurmo tndhr, rorn bi Bro Nkifrarpnio mrokfeter. Ndnnettn yimam nd tndhr hikwam to rom inji buga Bro Nkifrarpnio mrokfetem.

¹²Rom tom nanhu yima yuhur yorhwa bok mrokfom. Htitanko nhai yimbhindangm tohetohkahmko nanhu mrokforoh yakneft. Ndnatn nhai ptha dbruf nuhas bugewotanko. ¹³Kto Bro Nkifrarhu yafothet mrokfot mhfnahta Yafothar yak nuhas bonuhasrahmko Bro Nkifrarhu tu yafothet nef mifm. Nd Yafothar nieruharn nikmoh yima yuhum yak hta bohtaruhahrko nd yiharn yak dukarahko nd na pthayuk mrokfom. Nd Yafothar pthayuk mrokfom nhai be turhu fijo ptha fura bofuraruhatr. Nhai. Mrokfom na kfo nuhasyukrpnio ptha nuhashirahrko. Yo ktopakto rhu hanyruha tamoh tamoh nefm yak nuhasrahmko. ¹⁴Na harhuyuk mrokfo rihur rorn yakruharr pthahirahrko. Ror nayuk tamoh nefm nann bro yufat yakruha. ¹⁵Bro Yifemr harhuwa tamoh tamoh nanuhet. Ndnnettn kanganko, nanhu mrokfo rihur rorn yakruharr kfo nuhasrahmko.”

Krhopami yindhorr nmbuhathu mrokfot

¹⁶Jisadr tfit kfo memorm, “Bi brbohwt nanhu yinyeft. Afo hti hambrafrahkma, ee tfit toh hany tefihato tfit htihakrahkma.” ¹⁷Jisadr inji kfo motr wom disaiperm wanyaf hanyhato tum rinahti nahtihato kfo memorm, “Ror kfi mrokfothu yimbu yuhat finji yorhwat? Kfo famur, ‘Toh tefi hasiwakomn hti hambrafrahkma yo tfit toh tefihato tfit

htiyakrahkma.’ Yo womt kfo famur, ‘Ndnettn nann nohhato Yifemrpnio yihato nhai wom htirhotkma.’” ¹⁸Yo kfo memom, “To nd wom mrokfot kfo famur, ‘toh tefinihato,’ nd mrokfo nmbuhath afo myak mmotewunomt nd mrokfo nmbuhathu yimbu yuhath.”

¹⁹Jisars bi htimorm rom ror pthayuk mrokfot myak mmotamohat. Jisars inji htihato kfo ttiwon memorm, “Nikome nd na kfo yamu, ‘Toh tefi hasiwakomn hti hambraforahkma, yo tfit toh tefinihato tfit htiyakrahkma,’ ndtn kak mmotewuko?” ²⁰Wawanyko! Na kfo mifwanko, niko nur dungunangurahko. Ndar bbinysofthu tuhant yindars rom nhai inji naruhatm. Rom be yindhorhato rhurahm. To nhai mrokfom. Niko warhu dungunangu-twako. Kto tfit niko rhu yindhorrahko. ²¹Wom kfo nhombra mrokfot akfoyant. Wom mett yon yak yibonraht rhu kurhiwatn bro krhopam kekwot yon yak yihar. Krhopam yak hanitatn bi yonr fnurnir, bi be. Nd yonrn tfit bro yindhor nmbuhath hnewurt, nd rot hatoh hasoyuk krhopam nhai wom dukakahtm. ²²Niko inji narahko. Nikmoh yima yuhum krho hasoruhamn kto na nikompno nahtiruha yiharn tfit nd krho yima yuhum yohniruhamn tfit bro yindhor nmbuhath yakrahko. Niko yakruha yindhoreft nhai yimam yak nohruhatmt. ²³Nd yihar mfrpskina thombat niko nhai nanpno wom tamoh kfo ttiwonruhatko. Na kfo mifwanko, tamoh tamohm nanhu yufatpno Bro Yifemr kfo ttiwonrahkomr, be yakhato wahirahrko. ²⁴Niko toh hnamo yiham niko nhai inji nawon-rmoko. Afo ariham wanhombrawon-twako. Afo Bro Yifemr nanhu yufatpno wom shrm wakfo ttiwon wontwakomr. Inji ttiwonhato fekkomm, htirahko tfit bro yindhoreftpno rhurahko.”

**Jisars be bi mfrfnahnihato nda bbinysofthu
bbukeft mano mano fahotmort**

²⁵Jisars tfit kfo memorm, “Ariharhof mrokfom kfo nhombra mrokfompno ptha nuhas hnaroyanko. Kto nhai kfo nhombra mrokfompno kforhotanko. Tamoh tamoh rim kfota mkfota mrokfom Yifemrhum be kfo hik bohik nuhasruhanko. ²⁶Kto nd yihar be nanhu yufatpno tamoh tamohm Yifemr kfo ttiwonrahkomr. Nhai nann tfit nikmoh mrokfom Yifemrpnio kfo ptharhotanm. ²⁷Bro Yifemr hti wofnworko. Nhai be sfno inji hti wofnrfoftrko. Na hti yindhorhato niko na htimohat, duka memoko, ‘Ndarr Bro Nkifrarpnio niamo yimayer.’ Ndnettn Bro Yifemr hti wofnworko. ²⁸Na afo Bro Yifemrpnio wutohmoa. Tfit Yifemr wuhtanyhato ndar bbinysoft fawihnamoya. Tohmoyann be bi tfit kanga ndar bbinysoft htanyhato tfit Yifemrpnio aiya.”

²⁹Tu Jisarsru disaiperm inji wanyhato kfo memom, “Nd mrokfom asomif ni pthem, nhai be kfo nhombra mrokfom kanjo ptharfonm. Ptha hik mifnm. ³⁰Nom bi hti hik bugewunomn tamoh tamoh mrokfom yimam duka kkopenhato hus yima yuhetem, ni bi htitnm. Nhai afo

mekahn, ‘Afo turoh tnge kfo ttiwonrahma.’ Ndnatn nom inji htitanomn kangnom, a to Bro Yifemrpn toh tanyhato niayetrn tamoh tamoh dukefm bi htitrm.”

³¹Rom inji kfomotm tfit Jisasn kfo memorm, “Bi duka ppohato bi hti duka tungunewukma? ³²Wawanyko! Na kfo hnamohat to be bi yihayer. Rpen rpen hik tubatuyafrahamko na turpetena tuhaf tanyrahko. To mirahko ka nhai nanhu wom frohr. Nhai. Tor nanhu Yifemr. ³³Nanhu dukeft kanga nanpno waftrkafkahkomn be rhu mmorahko. Ndnatn nd mrokfom kfo pthiyann. Niko nda bbinysoft toh thoft, to ka mirahko ka be toh yindh-orrhannom. Nhai. Krhopam yakrahko. To mirahko riyakrmiyakhato arisuhak-nom. Toh bmtakfot. Bi nann ndar bbinysoftu bbukeft mano mano fahot tkafmoyant.”

Jisasn turhu disaiperm Bro Nkifrarpn kfo bruttnamo yuhat

17 ¹Jisasn turhu disaipermpn mrokfo kfo pthahe buganimormn yura hefenr wuyukatohhato kfo bruttna memor, “Bro Yifeme, be bi asor bi yihar. Ninhu Yonr bro yufati bro nanyjar bbuka rifhur wahenr. Wahekahtnr tawo ror hingrnayuk hingrneftn ni tfit bro yufat yakrahn. ²To bi rorhu tirtn ninhu hingrneft htamont. Rorn tuhan yindariroh bro tohak yimar fak htamo. Ni hayuk yimam rorn toh nkifraniyuk yafothar kahukrm. ³Yimam ni htihato duka kangm, ninrpa tu Bro Nkifraye, yo Jisas Kraistr tu Bro Nkifrar kfo tkrurafmo yimayer, inji duket yimam toh nkifranirahm.

⁴Nd ni hayuk hingrneft bi hingrna bugamoyant. Inji nahato ninhu bro yufati bro nanyjar bbuka rifhur bi nd bbinysoft thofm bi fak nuhas bonuhas bugamoyann. ⁵Bro Yifeme, nda bbinysoft tafi dborha duha na ninpno tohmohat afo bro yufeta tohmoya. Na kanga arihat nd bro yufat tfit wahe-kahtna ninpno tohruha.

⁶Nda bbinysoftu tuhan yindarim, nanhu yufatpno kfo htahemom, bi ptha nuhasmoyann ninhu yufati ninhu toh yuhat yo ninhu dukefr. Ni tunhu yufatpno rhuyukm, to bi nann hemo. Hifa fak hik marnyamomt ninhu mrokfot. ⁷Arihat bi tawisafwom, ndar nanhu tirt yorhwa tamoh tamohm ninn hemoyem. ⁸Nd ni hayuk mrokfo bugam kfo ptha nuhas bugamoyann. Nd mrokfom yak duka tungunamotmm na ninpno toh tany nia yuhat bi wany hikmomtn rroh bro dukeft duka kangm, ni mifnn kfo tkrurafmotna niamoya.

⁹Na rroh dukefrpn kfo bruttniwa nhai nda bbinysoftu yima bugam dukahato kfo bruttnakaha. Nhai. Nd ni tu hayukm kfo bruttniwa. Nd yimam to tunhu yufatpno korhm. ¹⁰Na yakitohwa tuhan yindar bugam ninuhem. Yo ni yakitohwam to nanuhem. Rompn na bro yufat kekwa.

¹¹Na nieruha, na nhai nda bbinysoft wom toh hatohrhota. Na nia thombat rom nda tuha bbinysoft toh hasorahm. Rom asha tuha bbinysoft

toh haso thombat ni tu yura myorhekwa Bro Yifeme, bi ninhu bro bbuka nanyjaret tirtn htewann, wayukatohaf hanyswann, nd yimam ni tunn hemona. Ninhu tirtn rhu haso thombat nayakitohkahmn rpat atohtwam no rpat tohmo kanjo. ¹²Na rompno toh hnamohat ni hemo bro bbuka nanyjaret yafotharpno toh hongmb hnamotanm toh marnya hnamom. Nhai womr frtrohromnom. Nd frtrohmo yimar, ror bi hukrn, rorpar frtrohmohat be yihato nohmor. To Bro Nkifrarhu rfa borngt bi nd mrokfot ruhettn, to be nd neft rhu twanhomot. ¹³Na bi nia yibonwoyann nda bbinysoft afo tohetann nd mrokfom kfo pthiwanm. Kanga tuka hatohwa yindhoreft kanjo rom inji bro yindho-reftpno atohm.

¹⁴Ninhu mrokfot bi kfo pthahe-moyanm. Kfo pthahemotanm nhai ndar bbinysof thofroh dukefm hikkahm. Nhai. Ni dukiwa dukefr, na dhikwar, ndr kanjo inji hikwatm, ndnettn nda bbinysof thofm hti srthuwomm. ¹⁵Na nhai kfo mikahann, wayaktwanm. Nhai. Be kfo bruttna kanga ninhu mofsinhit watabohifat hmbrikahtnm Tndhr nhai finji naruhatrm. ¹⁶Rom nhai ndar bbinysof thofroh dukefm hikkahm. Nhai. Ni dukiwa dukefr na dhikwar, ndr kanjo inji hikwom. ¹⁷Ninhu mrokfot tu fipet mifet. Ndnatn kanga, nd mrokfot nd yimaroh yima yuhum ahingrnakahtn ayak wus bowuskahttm be ninpno rim tohni bugarahm. ¹⁸Na ni tkrurafmotna nda bbinysoft niamoya. Nd yuhatn nd yimam tkrurafrotanm kmi kmim rhu fnahrahm. ¹⁹Rom dukahato na bi ninhu tirtn rhuhato ninhu dukef yuhatn hikwa. Tawo rom na hikwa kanjo ninhu tirtn htahato ninhu dukef yuhat hikrahm.

²⁰Na nhai nanhu disaiperpam dukahato kfo bruttnakaha. Nhai. Rom pthayuk mrokfom wanyhato na hikruha yimam rpat duka nhafoh bugahato kfo bruttniwa. ²¹Na kanga no nito tohwa kanjo rom inji rpat nafrtkafhato rpat atohm. Yo rom nonpno afrtkafkahttm nda bbinysofthu tuhan yindarim htiruhamn nanhu nia nmbuhat duka mirahm tu Bro Nkifra tkrurafmotna niamoya. ²²Nd ni nanpno hayuk bro yufat bi hemoyanm. Nd bro yufatpno rpa yima yuhur rhurahm no rpa yima yuhur yorhwa kanjo. ²³Na kanga na romn thu hamuhkfot, yo ni tfit nann thu hamuhkfot, inji inji anakahnomn rom be rpa yima yuhur rhurahm. Tfit ndar bbinysof thofm inji htiruhamn nanhu nia yuhat duka mirahma, Bro Nkifrar tkrurafmo yimayer. Yo duka mirahm, nanhu disaiperm ni Bro Nkifra mondt htewunm na ni Bro Nkifra mondt htamo kanjo.

²⁴Bro Yifeme, nd ni hemo yimam na kanga na tohruha kmit rom rpat atohtwanom. Na kanga nd na hatohruha bro nukefti bro yufat afo ahtitwamt. Nda bbinysoft tafi dborha duhattn na hti wofnhato hemona nd nukefti bro yufat. ²⁵Tu dborioh nefm yakitohet Yifeme, nda bbinysoft tohwa tuhan yindarim nhai tawisafkahmn. Nanrpaya tawisafwann. Ndar nanpno tohwa yimam, rom tawisafwomt nanhu nia nmbuhat. Kangm, Bro Nkifrar kfo tkrurafmo yimayer. ²⁶Bi fak nuhasmoyanm ninhu yufati

ninhu toheft yo ninhu dukefr. Tfit wom yiha wom yiham yak nuhas hanyruhanm. Inji narhotanm, ni Bro Nkifra na marbit htewa kanjo rom tfit nd neft yakhato womm marbit htarahmm. Yo na inji htirhoyann thu hamuhruhanm.”

Jisasar bro krhopam yakhato nohmorn tfit sinyamor

(*Sapta 18–20*)

Judasr yahr kmiroh tirmn Jisasar htamo yuhāt
(*Matyu 26.47-56; Mak 14.43-50; Luk 22.47-53*)

18 ¹Jisasar Bro Nkifrapno kfo bruttna buganihato turhu disaiperm myaknihato tek Kidront hayuknihato mkuko yimom. Nd tek mkuko rhuyuk olif suhtn yi rhumom. ²Nd olif suhtn bok yiham Jisasar turhu disaiperm yaknimoarm ndha yi rhu rifinymoum. To Jisasar hndhnayuk yima Judasr ror bi htimort nd tkitt. ³Ndnettnd Judasr to be nd yuhāt hanymorm Romroh soldiami polism. Polism prisroh bro yimami Farisim kfo tkrurafmomm. Yahrt tohyuk kfra inyarut yo kshm rpat fakitohakmomm.¹ ⁴Jisasar nd yimam htiyak-mohat nhai yak mmormort rroh yi nmbuhat. Ror bi tawisafmorm rorhu yakyuk krhopa bugam. Bi tawisafetrn kfo ttiwon memorm, “Nikome frohm hambriwako?”

⁵Kfo memomr, “Nom Nasaret thof Jisasar kak hambro hnewunom.” Jisasar sinyahato kfo memorm, “Na to asoya.” Nd Jisasar hndhnayuk yima Judasr, ror rpat nd yahr kmimpno rpat tohmoum. ⁶Jisasar kfo memotr, “Na asoya,” nd yimam tfit mongthur mongthur yihato tuha dangn yukha dangn yukham tmbho thumom.

⁷Tfit wompam Jisasar kfo ttiwon memorm, “Niko frohr hambriwako?” Kfo memom, “Nasaret thof Jisasar hambriwunom.” ⁸Jisasar kfo memorm, “To bi kfiyanko, na asoya. Na hambro hne thombat to bt ndar na hik htfaswam afo aim.” ⁹Ror nd yima yuhur inji mfnahhato inji kfo pthamohat, to bingot mrokfot bi kfo memor, “Nd yimam ni hayukm nhai rroh womr yakrmotmr frtrohrmornom.” Nd mrokfot bi inji ruhettn to be ka yimamn fak htamotmr inji kfomor.

¹⁰Saimon Pitar ror bainat fakitohakmor. Nd bainat kimt teh tundakhato prisroh bro tohak prisru hingrna yimarhu tirmif yimbhindangt frbubafmotrt misuhmot. Nd yimarhu yufat Malkusr. ¹¹Pitar inji namotr tfit Jisasar kfo memorr, “Bainat tfit wathuntwe. Ni finji dukewuna, ka kangn, nd krho nmbuhat bi Bro Yifemr dkfoyukt ayak duha yirte? Nd dukeftpno inji newun?”

¹ 18.3 Nd temperthu prisroh bro yimam kfo tkrurmo polism Bro Nkifrarhu temperr tohukatohmoum.

Jisasr Anasrpno hanyomo yuhathu mrokwot

¹²Nd Jisasrhu yakt yimo yimam Jisasr tir tir yakmomr mtitofe kiboki-momr. ¹³Kibokiyakhato afo Anasrpno hanyomomr. Anasr Kaiafasrhu matoh-emer. Kaiafasrn prisroh bro tohak yimarhu hingerneft fakitohmort nd gunyjimr. ¹⁴To nd Kaiafasrn bro tohak prisr tohhato Judaroh bro yimam bi kfo memorm, “Rpa yimarpar Juda buga-nmoh tkitt yakhato suh nanyorneft hifa.”

Pitar mett kfo nhehmo yuhat

(Matyu 26.69-70; Mak 14.66-68; Luk 22.55-57)

¹⁵Jisasr hanyomohat Saimon Pitari wom disaiperr hik hanyomofr. Nd wom disaiperr bro tohak prisr bi tawisaf-morr. Ndnetrn ror rim fnahnimor nd bro tohak prisrhu kuny kmifako Jisasr hafknemohat. ¹⁶Pitar ror kmifa rim fnahnitn mtoh hasomor. Tfit ndwom disaiperr Pitar hti hambrohato tfit nd kmifa rim fnahnit tohukatohmoa mett kfo ttiwonhato Pitar fknenimor. ¹⁷Nd mett inji htiyaf hanyhato Pitar kfo ttiwon memotr, “Ka ni aso nd yimarhu wom disaipern?” Pitar kfo memor, “Nhai na. Na wom yimaya.” ¹⁸Yifung-nano bro frfoneft yakmottm nd bro tohak prisrhu kuny kmifar yukatohaf hanyuk yimami polism kaht tenghato haunyomom. Pitar ror nd yimampno rpat tohhato kaht haunyomom.

Prisroh bro tohak prisrn Jisasrhu kotkwot yakitohmo yuhat

(Matyu 26.59-66; Mak 14.55-64; Luk 22.66-71)

¹⁹Prisroh bro tohak prisr sinyahato kfo ttiwonmorr disaiperroh nmbuhat yo tu Jisasr mrokwom kfo pthamoa yuham. Ndm kfo ttiwon hik bohik-mourr. ²⁰Jisasr sinyahato kfo memorr, “Na mrokwom kfo pthamoahat nhai wom kafroh tkitt tuhan yindarim yak nhafohhato kfo ptharmoayanm. Briyaha tafontn Judam rifiny hakuta rmonmn yo Bro Nkifrarhu temperr rifinyoatm mrokwom hemoanm. ²¹Ndnettn to tamohmpno na ttiwonwa? Na pthamo mrokwom wanymo yimamn wakfo ttiwonn. Rom tawisafwomm na pthamoa mrokwom.”

²²Jisasr inji kfo pthamotr brbo tohyuk polismanr sinyahato Jisasr nyingatikfrsrfamorr. Frsrfehato kfo memorr, “Tot inji tohak prisr kfo yuk mrokworoh kfo wokneft?” ²³Tfit Jisasr kfo memor, “To na finji kfiya? Faso kfiya? Faso kfo thombat to wakfo nuhasna na kfo yuk tng bebt. To na dborioh mrokwot pthathoft to tamohmpno nyingatikpako be frsrfa furena?”

²⁴To be yuht baklain kiyetr Anasr yakmorr Jisasr tfit Kaiafasrhu tirtn htamorr.

Pitar tfit wompam kfo namhi nhehmo yuhat

(Matyu 26.71-75; Mak 14.69-72; Luk 22.58-62)

²⁵Saimon Pitar afo kahtpno tohhato haunyomour. Kaht haunyo hasetrn wom yimam rorpno tohmom kfo ttiwon memomr, “Ka ni aso

nd yimarhu wom disaipern?” Pitar nhaf kfo memor, “Nhai na. Na wom yimaya.”²⁶ Tfit nd bro tohak prisrhu wom hingeru yimar tohhato Pitar kfo ttiwon memorr, “Ka ni ndar yimann mswirt yihof htiroya?” Ror nd Pitar yimbhindangt frbbomo yimarhu yimater. Ror tohhato htimorr Pitar sinyahato nd prisrhu hingeru yimarhu yimbhindangt frbbomohat ndnetrn inji kfo ttiwonmor.²⁷ Inji ttiwonmotrr tfit wompam Pitar kfo namhi memor, “Nhai.” Pitar inji kfo namhi hanyamor krir nakumor.

Jisatr Pailatrpno hanyomo yuhat

(Matyu 27.1-2; 27.11-14; Mak 15.1-5; Luk 23.1-5)

²⁸ Be Jisatr prisroh tohak yima Kaiafasrhu kmifat ruhetrn tfit Judaroh bro yufet yufet yimam yaknimomr Judiaroh gafanarhu kunyko tfit hanyomomr. Yihat bi nitre dbtaku hanyetn Judam nhai rpat hafknermomr gafanarhu kmifat hanyomohat. Be inji briaahako mtohmom. Turoh nkifra tndht yakitohetmn rom Pasofa burwa tofi yihar bi brboh hanyetr rom nhai tfit tamoh tamoh nefm yihato turoh rhu nmbuhat yak beb hanykfot. Be rhu marnya bomarnyahato Pasofakfot htayuk yemro burwat rom yakfot. Nd dukefetmn nhai fknermom Jisatr gafanar rhuyuk kmir hanyomohat.^m ²⁹ Pailatr fnahnihato nd briaahako tohyukm kfo ttiwon memorm, “Tamoh tofirpno nda yimar yamukako kot atohr?” ³⁰ Kfo memomr, “Ror ufasoh nefm ana duha yir nhai ninpno hnarfotnomr.”

³¹ Pailatr kfo memorm, “To be ndhtet nefi tuko wayaknikahkomr tukmoh boririfhu yuhat wahikko. Yimar finji finji nayetr finji niwakomr nd yuhatn wahiktwako.” Tfit Judam sinyahato kfo memom, “Romroh gafmanr kfo rafo memor, nom Judanom nhai wom tofiet yimar nmoh tire bgre misn kihagir nohkfot. Be tu nhai mif.” ³² To nd nd nefm Jisatrpno rhumom, to bi tur kfomoa kanjo nd yuhatn to be rhu hik twanho mifmom. Bi kfo memor, “Na ndar bbinysot tohhato bgre miyeta kasinyarahma.”ⁿ

³³ Pailatr tfit turhu kmifar rim fnahnihato Jisatr nakumorr. Jisatr yi rim tohmotr kfo ttiwon memorr, “Nine Judaroh kinge?” ³⁴ Pailatr inji ttiwonmotrr tfit Jisatr ttiwon memorr, “Ni inji kfo ttiwonwohate tunhu dukefrn inji ttiwonwona o womm nanhu toh yuhat kfo nuhasmotmn inji kfo ttiwonwona?” ³⁵ Tfit Pailatr kfo memorr, “Tamohmpno ndhtet ttiwon nmbuhat nanhu yima yuhurn wadukakhato ttiwonrfoyan? To

^m **18.28** Nd gafanar o Pailatri rorpno tohyuk yimam rom nndo Rom thofmn nhai hikrmoamm Judam rhuyuk tofim o tamoh nefm. Nd dukeftpno Judam memom, “Nd nddoh kmimpno nhai nom brboh yihato rompno nabnotkfot. Inji narahnom Bro Nkifrar hti bebrahrnom.” ⁿ **18.32** Fasoh net yimam kot tohnhato nohmoahat husfirpa yuham nohmoum. Judaroh kotkfot tohyukm be yakmoamm tahiye tahiye frdbofna nohmoumm. Romroh kotkfot tohyuk yimam hus yuhaf hamoumm. Womnam bgre mimn kihagir nohmoumm. Womnam mfham tmbhomoumm.

na Judayann inji ttiwonrfoyann. Ni tunhu kmi thofmi tunhu prisroh bro yimamn nanhu tirt htaromn. To tamoh neft namotn asha hnaromn?”

³⁶Tfit Jisasr kfo memor, “Nanhu kingdomkfofot nhai ndar bbinysofthtu kingdomkfofot rhukaht. Nanhu kingdomkfofot be ndar bbinysofthut arhut, nanhu hingrna yimam sinya-rromn toh raforrotma nhai yimam yakhato Judaroh bro yimaroh tirtn htarrotma. Nhai. Nanhu kingdomkfofot ndoh womharhofn ndnetmn Judaroh bro yimaroh tirt htaroma.” ³⁷Jisasr kingdomkfofot kfomoatr tfit Pailatr kfo memorr, “Ni ka kinge, ndnetnn kfo kangn, ‘Nanhu kingdomkfofot nhai ndar bbinysofthut rhukaht.’” Jisasr kfo memorr, “Uwa, na to finji kforhoya? Mrokfot to bi tot bi tunn kfiwunt. Na mmemt hiyauhato ndar bbinysofth niamohat, to yimaroh king tohhato Bro Nkifrarhu tu mrokfo yimbu yuha mifthu kfo ptha nuhasyuka niamoya. Yimam Bro Nkifrarhu mrokfo mift yakitohwam, nd yimam nanhu mrokfot wanukwomt.” ³⁸Pailatr tfit kfo ttiwon memorr, “To nd ni kfiwa kfo mif mif mrokfot to tamoh mrokfoyet?”

Jisasr bgre mis frdbkafmo yuhat

(*Matyu 27.15-31; Mak 15.6-20; Luk 23.13-25*)

Pailatr Jisasr pna ptha tanyhato fnahnimorn Judam rim kfo memorm, “Nd yimar htitita nhai wom tamoh neft narmor. ³⁹To niko bi hti hnayeteko, ndhtet bro Pasofa rhuyuk yihamn kalabus tohwa yimaroh womr fnah-newur. Niko tukomn kangko frohr afnahnar, tukomn yufat wayuta-twakomt. Kangko ndar Judaroh kingr afnahr?” ⁴⁰Tng rihar wayur sinyahato kfo memom, “Nhai, nhai rorn. Barabasrn afnahr.” Nd yima Barabasrn kalabus htamohat, rorn rikohnefti yima tatneft damiagt hatonemourm. Nd nefm inji namoatr kalabus htamomr.^o

19 ¹Rom inji waniak waniak-motm Pailatr wanysi wanysi-hato soldiam kfo motrm soldiam wifkfofot yakhato Jisasr nd wife wife smbho bosmbhaknimomr. ²Tfit huhra mtitofit yakmomtn kingroh mfham hatohwa kraunkfot kanjo yakke yakmomtn yuht huhra rmonett mfhatn wathu hamsismomr. Yo kku kkorpa kanjo fnhuyet yuke hmbreshar yakmomn hmbremomr.^p ³Inji natamomrn bt tom yuwi kfo nhehakni memom, “Asor nd rom kfiwa Judaroh kingr.” Inji kfo nhehaknihato tire srfamomr.^q

⁴Pailatr tfit wompam fnahnihato briahako tohmo tuhan yindarim rim kfo memorm, “Wawanyko. Nd yimar tfit kforhota nikompno tfit

^o 18.40 Ndar rfa borngthu mrokfom hti hik bohiket yimam duka memom, Barabasr nhai yindhorrmoar Romm Judaroh kantrikfot tohhato tfit Romm gafman yufat yakhato tohkfot. ^p 19.2 Nd Jisasr hmbremo yuke hmbreshar, briahako yarim ruhakyuk hmbresha kanjohot hmbreshar hmbremomr. Yo nhai batenim duhater, be tirrpaft tuheter. ^q 19.3 Soldiam Jisasr wondh nhta bonhtamohat yuwi memom inji kingm kanjo wondhruhanomrn bt mkfak mkfak srfa bosrfarahomr. Nd dukefetmn kingm hatohwa wondht kanjo wondhmomr.

hnerahmr. Ndt n niko hti kshrfaruhakomn duka mirahko ror nhai wom krhopam htikahr.” ⁵Be Jisadr yarim fnahnamor. Nd mfhat wathu hamsismo huhra mtitofti nd hmbremo kku kkorpa kanjo fnhuyet hmbreshar, ndm rpat yarim hatohmorm. Yarim hatohmotrm Pailatr kfo memorm, “Wahtiko. Asor nd yimar.”

⁶Yarim hatohmotr prisroh bro prismi Bro Nkifrarhu temperr tohukatohwa polism wayur sinyahato kfo memom, “Wahegirkomr, wakihegirkomr. Bgre misn wathu hegirkomr” Pailatr rom pthamo mrokfot wanyhato kfo memom, “To ndhtet neft tuko wayaknikahkomr tukomn wakihegirkomr. Nane htitita nhai wom nefm narmotr btn nann finji narhoyanr.” ⁷Tfit nd Judaroh bro yimam kfo memomr, “Nmoh nkifra thfa mntwat mkfo fnahmot, kfo kangt, wom yimar kfo kangr, ‘Na Bro Nkifrarhu yona,’ nd yimar bi mrokfeter anohtwar.”

⁸Pailatr nd mrokfot wanyhato yima yuhur mfro fanhomorr. ⁹Pailatr tfit gafanarhu kmifako yimorn tfit Jisadr rim ttiwon memorr, “Ni fitoh kmi thofe?” Jisadr asor. Nhai wom mrokfom kfo ptharmor. Be wany marsisamorr. ¹⁰Jisadr Pailatrhu kfo ttiwon mrokfot nhai kfo yakioromotr kfo memorr, “Ni nhai kfo yakiohahna. Wawany. Nanrpaya kforuha ni nhai bgre mis tuhegirruhatmn. Yo nanrpaya kforuha bgre misn tuhegirrahmn. Ndm ni ka nhai tawisafkahnm?”

¹¹Jisadr kfo memorr, “Yura bro kmi hefenr tohwa Bro Nkifrar nd ni hatohwa bro yufat hemotr nanhu mrokfot ninn kakitohwont. Na yiro ritohtayuka na nhai finji kforhota. Ndt mrokfo duhatet. To tmift nd yimar na hndhnayukr, mirahn ka tu dborioh neft namor. Ni nayuk nefmi ror nanpno namo neft yak htineft, ninhu nefm be inji yura kitm, nd ror na hndhnamo yuhat ndt tu krhonano kitt, rothu krhopam broyem.” ¹²Jisadr pthamo mrokfot Pailatr wanyaf hanyhato memom, “Fitoh yuhamn ayak hfhanafoyanr,” to nhai, Judaroh bro yimam wayohrfat wayohrfathato kfo memom, “Nd yimar be inji yafhorahn, ndt ni nhai tu Sisarhu yimatn rhukah. Rorhu yimatn arhun to nhai inji narfotn. Yimar kfo kangr, ‘Na kinga,’ nd yimar kangr, ‘Sisar riyak htafhato tfit nann kinga atoha.’”

¹³Be Pailatr nd mrokfot wanyhato Jisadr fak hfhanmorr. Yak hfhanhato Pailatr ror jadr yorhwa gajis rim rhumor. (Nd Pailatr jadrhu gajis rim rhumo tkitt Hibru yarmumat kutamoumt Gabata.) Nd rhu yefinyuk tkitr tahirpaye thu trku htfas bugamomr. ¹⁴Nd yihar Judaroh Pasofa burwa yeyuk yeshriroh yak hta mska yibon yihar rhumom. Mar bi dany marrn Pailatr kfo memom, “Judako wahtikomr nikmoh kingr.” ¹⁵Judam wayur sinyahato kfo memom, “Wuri air! Wuri air! Yura bgre misn wakihegirkomr!” Pailatr ttiwon memom, “To kangko nikmoh kingr yura bgre misn akihegirre?” Prisroh bro yimam kfo memom, “Nom nhai wom kingm. Sisarpar nom tawisafwonom. Nom rorrparhu yinhitn korhnom.” ¹⁶Pailatr be Jisadr yakhato kfo memom, “Asor Jisadr. Bi tukmoh tirmn htewanr. Tukomn wakihegirtwakomr.”

Jisasr bgre mis kihegirmo yuhat
(*Matyu 27.32-44; Mak 15.21-32; Luk 23.26-43*)

Inji kfonihato soldiaroh tirm htamorr. ¹⁷Be Jisasr fakni hanymomr. Rorhu tuhegiriyuk bgre mis tur tita hatohta hanymort. Kmi taunt htanymortn wom kmi mfhat kutewumt yima Mfha Tpit, ndha hanymort.^r (Hibrukfot futamoumt Golgotat.) ¹⁸Ndha bgre misn tir wuram nire frdbkafhato yuht bgre miyetr kasinyahato tou fopmomr. Wom hus yimaf yakmomf bgre miyETF mano mano tohmof. Womr tirmifko, yo womr kindonko. Jisasr buha tohmor.

¹⁹Pailatr kfomotrm wom mrokfot mimkutn wandfakmomtn Jisasrhu bgre misn yura mfhako frdbkafakmomt. Nd mrokfot rom wandfakhato htamot kfo memot, “NASARET THOF JISASR, JUDAROH KINGR.” ²⁰Pailatr memorm, “Nd mrokfom Hibrukfotn, Romkfotn, yo Grikkfotn inji wawandfa hanyswakomm mimkutn.” Jisasr hegirmo tkitt brbo tauntpno hegiretrn bok Judam rim fnahni mfnahnimoamn nd rom wandfamo mrokfom rim htini mhtinimoumm. ²¹Prisroh bro yimam nd mrokfot htimohat Pailatr mkfo memomr, “Awandfawahn, ‘Judaroh Kingr.’ Wawandfa wame, ‘Nd yimar kfo memor, ‘Na Judaroh kinga.’ ’ ”

²²Tfit Pailatr kfo memorm, “Mrokfot bi inji wandfiyant to be inji arhut.”

²³Soldiam Jisasr yuht bgre miyetr tou yopnihato nd ror hatohmo hmbre wuskar husfihus yimam nhombrahato fak nhta nhombramomm. Nd yiro rim ruhakmoa yuke hmbresharpar fak trohmomr. Nd hmbreshar nhai be nmbuha nmbuha rmontham yakhato nahurmomr. Nhai. Be yuht thar hmbremourr. ²⁴Be inji htitihato soldiam kfo memom, “Be inji yuhtr arhukaht pirai saturahnomr. Frohr winr rorn yakrahrr.” Rom namo neft nkifra rfa borngt kfomo mrokfo yuhatn fak hikmot. Nd nkifra rfa borngt rhumo mrokfot kfo memot,

“Na hatohmo hmbresham yak nhtahato fak nhombrani-momm.

Yiro rim ruhakyuk yuke hmbresharne pirai satuhato yimam fakmomr.”

Sng 22.18

Soldiam to nd nkifra rfa borngt rhuyuk mrokfo yuhatn fak hik mifmom.

²⁵Jisasr tuhegirmo bgre mispitn tohmo met kmime, tu Jisasrhu mmemt yo rothu nmemt, yo Klopasrhu met Mariat ee Makdala efkot Mariat. Nd husfihus metm Jisasr thu hegirmo mispit tohmom. ²⁶Jisasr memor wahtiyafoya htimort turhu mmemt. Yo nd tu Jisasr yuhu mongimoo disaiperr htimorr rorhu mmemtpno brbo tohmor. Inji htihato mmemt wakfo memort, “Nd ninpno brbo tohwa yimar bi ninhu yoner.” ²⁷Tfit

^r 19.17 Nd kmi mfhat kfe sfiohnyet yima mfham kanjo rhumoatt to be futamoumt yima Mfha Tpit.

kecutnihato nd disaiperr wakfo memorr, “Rot bi ninhu mmemet.” Be nd yiha nd disaiperr Mariat kfaknimortn be rorpno ritohakhato rorn rifakitoh-akmort.

Jisasr myaknimo yuhat

(Matyu 27.45-56; Mak 15.33-41; Luk 23.44-49)

²⁸ Jisasr ndar bbinsoft niahato hingrna hnayuk hingrnefm mdukakhato duka hna duka hnamormn duka memor, “Nd na niahato hingrnayuk hingrnefm bi hingrna buga twanho-moyanm. Bi be nanhu hingrnefm.” Inji kfonihato kfo memor, “Bupa knewa.” To nd ror kfomo mrokfot nhai be kfo furarmort. Bi nkiframpno kfo htamo mrokfot to be tfit kfo hik mifmort. ²⁹ Wain buroht rohett tohmot. Wom spans yakmomn nd wain rohtn thu yifakhato hisop yuhtarn kiyakhato Jisasr wuhemotm tmasakmorm spans ruhetmn. ³⁰ Jisasr nd wain bupam yenyi hanymorn wuroht kfoni memor, “Be bibe.” Be inji kfonihato mfhat yohnemotrn mfaknimor.

Wom soldiar kfrat yakhato Jisasrhu kkreko was tiwonmo yuhat

³¹ Nd yimam kihegirmohat Fraide yihar kihegirmomm. To nd Fraide yihar tor Judaroh Pasofa Sabat yiha rhuyuk yeshriroh yak mska yihar. Nd Sabat yiha Judaroh tu bro yihayer, rom nd yihar nhai rom wom tamoh nefm nakfot o hingrnefm hingrnakfot. Turoh nkifra yirmoht mdukakhato duka memom nhai ndar hirwa yimam tfit Sabat yiha hirkfot. Ndnetmn Judaroh bro yimam Pailatrpnio yihato kfo ptha memomr, “Nd kihegiret yimam wuram frwokruhatmm nohrahm. Nohruhatm yak thurahmm. Nhai tfit nmoh bro Sabat yihar nd yimam tfit yura bgre mimn hirruhatm.” ³² Be nd kfofpno soldiam yimomn barkof yimarhu wuraf fryifikatmomf. Rorhuf fryifikatni yo tfit yimomn womrhuf yi fryifikatmomf. ³³ Yo tfit yimomn memom Jisasrhu wuraf afryifikatnomf to nhai, htimomr bi nohetrn to be nhai fryifikatrmomr rorhu wuraf. ³⁴ Be wom soldiar kfrat yakhato Jisasrhu mano kkreko wuwashato htimor kkupami bupam rpat yudbat fnahmom. ³⁵ Wom yimar ndar nefm turhu nyingaye htihato kfo ptha srhwor, rorhu mrokfom kfo mif mifworm. Ror tur htitr nd ror kfoyuk mrokfo kfo mif mifworm, ndnettn niko nd ror kfoyuk mrokfom wany yakiokfot. ³⁶ Jisasrhu wuraf fryifikat duha yimohat to rfa borngt yorhwa mrokfo yuhatn hikmot. Nd mrokfot inji korhwot: “Nhai rorhu wom tpit fryifikatruhatmr.” ³⁷ Yo wom mrokfot kfo kangt, “Tum wasyuk yimarn tfit yukatohrahm.”

Jisasrhu thatipt nfri tahi muhtn rihtamo yuhat

(Matyu 27.57-61; Mak 15.42-47; Luk 23.50-56)

³⁸ Arimatea taunthu yima Josefr yimorn Pailatr mttiwon memorr, “Na kanga Jisasrhu thatipt yakniruhant?” Pailatr kfo memorr, “Hifa,

nhai mrokfom, wayaknitwant.” Be Josefr nd mrokfot wanyhato Jisasrhu thatipt mfakmort. Nd yima Josefr to Jisasrhu wom disaiperer. To Jisasr hikmoahat nhai Judaroh bro yimampno yak nriyafrhoar. Nhai. Be inji kafrohnano hikmourr. ³⁹Josefr nd Jisasrhu thatipt yakmohat Nikodemusr faknhomorr. Nd yima Nikodemusr, to rorn wom yiha yifung yimorn Jisasrpnno mfnahmor. Nd yima Nikodemusr Josefr yaknhot yimohat ror dborioh mtha yarfonet pauraftot hanyomor. Hushtet mtha yarfonet mifhu mtha yarfonet pauraftot hanyomor. Ror hanyomo pauraftothu krhopam 30kg kurhet pauraftot hanyomor. ⁴⁰Josef Nikodemusrof yihato thatipt wuyak thurakmoft tu Judam noheh yimam hingrnamao hingr nef yuhat hikmof. Nd Nikodemusr hanyuk dborioh mthet pauraftot yakmofn yuke yuke rmontha nmbur nmbuham truff wuna hmbre buganimofmn, ee nd pauraftot rmontha nmbur mkuye ki tawonmofr yagr nmbuhar. ⁴¹Nd Jisasr soldiam yakhato bgre mis tuhegirmo tkittpnno rhumor wom bro mswirr. Nd mswirr rhumor wom nfri tahi muhr. Nd tahi muhr nhai wom yimam bi htarmomr.

⁴²Nd yihar Judaroh Sabat yiharhu rhuyuk yeshriroh yak mska yiharn, to be Jisasrhu thatipt yaknimofn nd tuha brbo mswirr rhuyuk tahi muhtr rim htanymofn.

Jisasr sinyamo yuhat

(Matyu 28.1-8; Mak 16.1-8; Luk 24.1-12)

20 ¹Sande yiha dbha ksfu mif Makdala efkot Mariat sinyahato yimot Jisasrhu tahi muhthu htit. Yimotn htimott nd tahi muhtr frtittomo tahis nhai wom rhurmot. ²Mariat be inji mhti tanyhato be tfit mkekutnihato tonayefrpar yimotn mtone fnahmot Saimon Pitari Jisasr mfro yuhu mongimoa disaiperrpnno. Rof htiyakhato ttiwon memofn, “Nine?” Mariat kfo memot, “Brorhu thatipt be bi fakniromr. Yaknihato ka fitha htaromr?”

³Pitarof be inji wany sanyhato rof yimof tahi muhthu htit. ⁴Rpat afo tone hanyomof, tfit buha wom disaiperrn tone dimandihato tone troh tanymorr wom Pitar. Rorn bi tone dimandinihato yima gur htamo tahi muhtr mfnah gungonmor. ⁵Tahi muhtr yifhatikt mtohhato wayirnamorn rihtimor nd yima gur tawonmo yuke rmontha nmburpam. Nhai yiro fknenirmor. ⁶Kto Pitar mongko mtone fnahmor. Ror mtone fnah thuhato be fau hafkneni twanhomor. Yau hafknenihato rim htimorm nd yimarhu yagr nmbuhar tawonmo rmontha nmbur manys. ⁷Yo wom rmontha nmbuhar tng tpithu teh dbkafyukr mfhatpnno mthu kiyakhato mfhatpnno rpat kitawonmor, ndr ror be turpatr yak marnya bomarnyahato mfha mthutamoko rhumor. ⁸Tfit ndwom disaiperr bi barkof mtone fnahmor, ror fknenihato rim htimorm nd yima gur ki tawonmo wuskam. Htihato memor, “Dajohmn, yimar bi sinyani twanhir.” ⁹(To nd Krairhu nohhato

tfit sinya mrokfothu mna yuhathai bi yakrmof. Nd Bro Nkifrarhu rfa borngt yorhwa mrokfot afo yuhre fak mmotamof.) ¹⁰Nd disaiperm mhti hambro tanyhato be tfit yimof kmifako.

Makdala efkot Mariat Jisasr htimo yuhath
(*Matyu 28.9-10; Mak 16.9-11*)

¹¹Makdala efkot Mariat yima gur htamo tahi muhtpno brbo tohhato nurmout. Nur hanyhato wasifamotn memot, “Yiro tahi muh yuhath arihtiyafoya.” ¹²Asha rihtimotf hus moun-motf ganyom hmbresha hmbreyetf rhumof yima gur htamo tkittn. Womr mfha mthutamoko rhumor. Womrne wurasifko rhumor. ¹³Nd mounmotf ttiwon memof, “Bar mete, nine tamohmpno inji nurwa?” Kfo memotf, “Nanhu Brorhu thatipt ka yimam yaknihato nndo htaromt. Ndt hti hambrohato nurwa.” ¹⁴Mariat inji kfone hanyhato memot, kekutniya, htimotr Jisasr. Rot Jisasr htimohath hai duka marimot, “Arr Jisasr.”

¹⁵Tfit tu Jisasrn kfo ttiwon memot, “Bar mete, ni frohmn nur hambriwa?” Jisasr Mariat ttiwonmohath rot duka memot, “Ka nd Jisasr htamo tkitthu mswir tikatr kfo ttiwonwora.” Ndnetn kfo memotr, “Yinowe, nanhu Bror ni yaknihato nndo hta thombath, wakfo nuhasafkahtna tfit yihomakruhanr.” ¹⁶Jisasr tfit tuthu yufath naku memot, “Maria.” Mariat kekutnihato Hibru mrokfotn wukfo memotr, “Rabonai!” Nd mrokfothu yimbu yuhath, “Tisa.” ¹⁷Jisasr kfo memot, “Mirahn bi ayaktiyanr. Na tafitho afo Bro Yifemrpno muharmoya. Be waikahn nanhu nmemrom wakfo wamitwanm, na tfit yura muhatho na yifemwa Yifemr yo niko yifemwa Yifemrpno tfit yiruha yo na kfo bruttnewa Bro Nkifrar yo niko kfo bruttnewa Bro Nkifrarpo tfit yiruha.”

¹⁸Be Mariat yihatho kfo memotm, “Na bi Bro Nungothetr htitawoyanr.” Yo Jisasr kfo pthayuk mrokfom kfo nuhasmotm.

Disaiperm Jisasr htimo yuhath
(*Matyu 28.16-20; Mak 16.14-18; Luk 24.36-49*)

¹⁹Sande krif yifung disaiperm Judaroh bro yimam yakrmihatho kuny kiyake yiro kunys rhu hasetmn Jisasr buha mitohmor. Mitohhatho kfo memorm, “Yima yuhum amirhumko.” ²⁰Inji kfonimorn tirfhu fhuf yo kkrekko kfraye wasmo fhuth fak nuhasmorm. Disaiperm turoh Bror htihatho yima yuhum tfit yindhormomm. ²¹Jisasr tfit wompam kfo memorm, “Yima yuhum amirhumko. Na Bro Nkifrar tkrurafomora. To tawo niko, tfit nann kfo tkrurwanko.” ²²Inji kfonihatho fahsha wunamorm. Yahsha wunanihatho kfo memorm, “Bro Nkifrarhu Yafothath athu hamuhtko. ²³Womm nayuk fasoh fasoh nefm yafhorahkomm, tawo Bro Nkifrar yafhorahrm. Womm nayuk fasoh fasoh nefm hai yafhokahkomm, tawo Bro Nkifrar hai yafhoruhatrm.”

Tomasr Jisasn htimo yuhat

²⁴Nd yiha Jisasn turhu disaiperm pno mfnahmohat rroh womr nhai rhu-nhormorm. Nd yimar, Tomasr. Rorhu wom yufat Didimusr. ²⁵Nd yima Tomasr wom disaiperm kfo memorm, “Nom Jisasn bi htitawonomr.” Tomasr wanyhato kfo memorm, “Na nhai bmbri wany yakioruhankom. Na kanga afo tukanhu nyingaye tirroh fhum yo kkrekorhof fhut htihato tukanhu tirpinyafe yaktiwone, ee btn wany yakioruhankom.”

²⁶Tfit 7-pela yiham rhunihato nd disaiperm tfit yimomn kunys frkihnihato yiro rhumom. Nd yiha Tomasr rhunhomorm. Yiro kunys rhu hasetmn Jisasn buha mitohmor. Mitohhato kfo memorm, “Yima yuhum amirhumkom.” ²⁷Jisasn Tomasr htihato kfo memorr, “Tomas, ninhu tirpinyaft asha yarim htakahnt tirt wahti kothanf. Yo tirt wafhrhtfasnekahnt mano kkreko wahtant. Mirahn hus yima yuhufpno atoha. Rpa dukefrparpno tohkfot.” ²⁸Tomasr turhu nyingaye Jisasn htihato kfo memorr, “Ni nanhu Bro Nungothete. Ni nanhu Bro Nkifraye.”

²⁹Tfit Jisasn kfo memorr, “Hifa ni tunhu nyingaye htihato kangn na Bro Nkifraya. Yimam na tafi hti duha be mrokforpat wanyhato rroh yima yuhum nannpno htewumm, nd yimam rroh rhu nmbuhat hifa yi marnyaraht.”

Nda gonborngt yimbu yuhat

³⁰Jisasn bok mirakerm hingrna-moatrm turhu disaiperm htimoumm. To na nhai nd miraker bugam hta bugarmoyanm ndar na wandfayuk gonborngt. ³¹To nd dfik mirakerroh mrokfo nmbuham na htayukm, ndm be nikmoh hti, yo wany yimbuyukmn htamoyanm. Memoya ndm htiruhamn Jisasn rhu mrokfom yakhato hikrahmm. Nd yima Jisasn tor nd Yonr yimaroh minrfa htikyayukr Bro Nkifrar kfo tkrurafmor. Rorhu mrokfom wany yakiorahkomm, be toh nkifranirahko.

Jisasn tfit disaiperm pno mfnahmo yuhat

(*Sapta 21*)

7-pela disaiperm Jisasn htimo yuhat

21 ¹Tfit wom yiha Galili baritn Jisasn tfit wompam turhu disaiperm pno rim fnahmor. Nd Galili barithu wom yufat Taiberias. ²Jisasn disaiperm pno mfnahmohat inji mfnahmorm. Wom yiha, Saimon Pitar, Tomasr (rorhu wom yufat Didimusr), yo Galili profinshu kmi Kana thof Natanierr, yo Sebedirhu yon najohf, yo wom disaiperm husf rpat toh hasomom. ³Saimon Pitar sinyahato womm kfo tany memorm, “Nane barit rugi htat kitwa.” Womm sinyahato kfo memorm,

“Nom to kamuknom ahiknomn.” Be inji kfomotm rpa mmbrrpat mikmbrenihato yimom. Nd yifungr rugim htati htati nhai wom yirenr yakrmom.

⁴Marr mwondh fnah hanymor Jisaser tek bari thmbtn mitohmor. Disaiperm nhai duka marimom nd yimar Jisaser. ⁵Jisaser mitohhato rittiwon memorm, “Wurenko, yiram fekko?” Rom kfo memorm, “Nheno.” ⁶Rom inji kfo namhimotm tfit Jisaser kfo memorm, “Rugit wayakkahkomt mano tirmifko watukahtkomt bok yiram tuhakraht.” Jisaser kfomo yuhatn tirmifko rugit tuhato memom tfit wateh sohaknomt, nhai watehakkfot. Yirat nhai be kukenhato tuhakrmot. Ndnettn watehakneft nhombratimoum.

⁷Nd disaiperr Jisaser mfro yuhu mongimoar sinyahato Pitar kfo memorr, “Nd yimar Broyer.” Kfo memotr Broyer, Saimon Pitar inji wanyhato turhu yak hrur thumo yuke hmbreshar tfit yakmorn ndr nyuhmor. Nyuhnihato tekt fuknimorn rifune hanymor thmbko. ⁸Wom disaiperm rom bot rhuhato yira rugit riteh hanymomt. Nhai be wuri danyko rihirmom, be brbo thmbtpno hirmom. Boti mano bari thmbt be 100 mitakforpat.

⁹Rom rim dbkafnihato mhtimom kaht yo yirar kahtn kurmour yo wom bret pam htatamorm. ¹⁰Jisaser kfo memorm, “Nd niko yek yiram womm wahnako.” ¹¹Jisaser inji kfomotr, Saimon Pitar tfit mmbrrt mitohnihato rugit ritehakhato teh hawitamort nungurn. Nd rugit tuhakmo yiram 153 yiram tuhakmot. Be tu bro yirarpam tuhakmot. To nhai frt mbrarmomt rugit.

¹²Jisaser kfo memorm, “Waniakahkomn afo nuwa wayako.” Disaiperm bi hti nhta yo wany nhtahato duka memom, “Arr Bror nier.” Ndnatn yakrmenano nhai womr duka marimor, “Kfo ttiwon miruhanr, ‘Nine frohe?’ Nhai.” ¹³Jisaser kahtpno yauyaknihato bret pat yakhato hemorm yo yirar nhaf yakhato hemorm.

¹⁴Jisaser nohhato tfit sinyamohat nd yiha husfirpehyuk htit htimomr turhu disaiperm pno mfnahmor.

Jisaser sinyahato Pitar kfomorr sifsifroh tohukatohneft

¹⁵Jisaseri turhu disaiperm nuwa yenyimomn Jisaser sinyahato Saimon Pitar kfo ttiwon memorr, “Saimon, Jonrhu yone, wur arm rroh dukefr nanpno korhr. To ninn ka marbit htewuna?” Pitar sinyahato kfo memorr, “Broye, nanhu yima yuhur htitnr, nanhu yima yuhur nhai wom frohmpno rhukahr. Nhai. Nanhu yima yuhur ninrpanpno korhr.” Be Jisaser inji wanyhato kfo memorr, “Nanhu sifsifenm wayukatohaf hanyhitwona.” ¹⁶Tfit wompam Jisaser ttiwon memorr, “Jonrhu yon Saimone, ninhu dukefr ka nanrpa mifanpno hta mifwonr?” Saimon Pitar kfo memorr, “Uwa, uwa Broye, nanhu yima yuhur ninrpanpno korhr.” Tfit Jisaser kfo memorr, “Nanhu sifsifm wayukatohafo hanyhitwona.”

¹⁷Jisars tfit husfirpeh ttiwonfeft ttiwon memorr, “Jonrhu yon Saimone, ninhu dukefr ka nanrpa mifanpno korh mifwor?” Saimon Pitar Jisars husfirpeh ttiwonfeft ttiwonmotr duka krhohato memor, “Arr be masat ttiwon hasukna hatohwora. To finji wom finji kforhoya?” Kfo memorr, “Broye, tamoh tamoh nefm htitnm. Nanhu dukefr ninrpanpno korh mifwor.” Jisars kfo memorr, “Nanhu sifsifm wayukatohaf hanyhitwona.

¹⁸Na kfo mifwann, ninhu damiag tohtpno tunn hmbreshat hmbrehato tunhu tire foh thaye dbkafnihato fitoh fitoh tkitm tunn ufau fau htfasmoun. Tfit kto tabou buganihato tirm mano mano tuhayitruhatnm wommn tirm kijbkafakniruhamn wom tkitt hanyrahmn. Nd tkitt nhai be tunhu duka fijo yiruhatr.” ¹⁹Jisars nd mrokfom inji kfomohat to Pitar nohruha noh yuhatr Bro Nkifrar bro yufat yakrahr, nd yuhatr Jisars kfo mrokfom inji kfomorm. Jisars nd mrokfot kfo pthanihato Pitar kto tfit kfo memorr, “Wania wahikna.”

Jisars mfro yuhu mongimoa disaiperrhu mrokfot

²⁰Pitar kecutakhato yihom hti-yakmorr Jisars mfro yuhu mongimoa disaiperr mongko fau hik hnamorf ror Jisarspno. To Jerusalemr Jisarspno wuroh nuwa yamohat to nd yimarn Jisarspno brbo rhu kecutni hanyhato ttiwon memorr, “Broye, frohrn ni hndhnaruharn?” ²¹Pitar kecutnihato Jisars rikfo memorr, “Broye, ndar nnoh mongko niewa yimare finji finji rorhu rhu nmbuhat yiruhatr?” ²²Jisars kfo memorr, “Na tuka kanga afo yima nfrir atohkahrn nanhu nia yihar atoh gari hasorr, to nhai mrokfom. To ni womn tamohmpno kfo pthiwa? Be tunn wania wahikna.” ²³Kto wom Kristenm Jisars kfomo mrokfot yak kecutnihato nnakfo hihany memom, “O, kfo memor nd disaiperr nhai nohruhatr.” To Jisars nhai kfo marimor, “Nhai nohruhatr.” Nhai. Ror be kfo memor, “Na duka kanga afo yima nfrir atohkahrn nanhu nia yihar atoh gari hasora, to nhai mrokfom. To ni womn tamohmpno kfo pthiwa?”

²⁴To nd kfiwa disaiperrn wandfa-morm nda mrokfom. Nom htitnom nd ror kfoyuk mrokfom tu kfo mif mif kfoyem. ²⁵Jisars namo nefm mirahko ka rpa nefm namor. Tu boknabok nefm namor. Be amikahmn nd nef bugaroh mrokfom gonborngmn awandfa bugam, kane finji htarfom gonborngm. Ka nda yuht bbinysoft gonborngroh htayuk tkitm kkopentarfom.